






~~2262~~
M

6-10-158



6

10-f

58

III.55.



HIERONYMI
LAGOMARSINII

E SOCIETATE JESU
ORATIONES SEPTEM.
EDITIO SEXTA

Retractatior & auctior.

ACCEDIT EPISTOLA
SEMEL JAM EDITA,


Qua, quid in M. Tullii Ciceronis contra
L. Pisonem oratione interciderit,
demonstratur.

Ex libris Bibl. S. Mariae in Porticu in Campitello



R O M Æ M D C C L I I I .

TYPIS GENEROSI SALOMONI
IN FORO S. IGNATII.
P R Æ S I D U M P E R M I S S U .



CLEMENTI^{III}
ARGENVILLIERS

S. R. E. CARDINALI



HIERONYMUS LAGOMARSINIUS Soc. J.

S. D.



ACILITAS & humanitas singularis tua, CLEMENS CARDINALIS AMPLISSIME, facit, ut a te majorem in modum atque in summi beneficii loco petere audeam, primum, ut me finas honorem tibi istum, quo recens a BENEDICTO XIV. Pont. Max. auctus es, gratulari, deinde, ut gratulationis hujus meæ aliquod apud posteritatem exstare monumentum patiare. Possum equidem, te inconsulto, vel etiam invito ac repugnante, de tuis

commodis gaudere, quod facio: gaudium vero hoc meum tibi publice testificari, quod facere incredibiliter gestio, tum etiam posteritati publicis litteris prodere, nisi a te prius impetraro, certe non debeo. alterum enim nimis familiare esset, alterum paullo fortasse ambitiosius videretur.

Ac gratulatio quidem mea paucissimis definietur transigaretque verbis, si dixero, Mirifice atque immortaliter gaudere me, non quod Cardinalis es factus, sed quod ita factus es, ut dignissimus esses, qui fieres. Itaque in tanta ac tam sapiente civitate nemo inventus est, cui inopinatus atque improvisus iste tuus honor acciderit: neque tantam lætitiā is, ad te delatus, attulit, quantam, tibi non dicam ereptus, sed vel dilatus, admirationem hominibus attulisset. Sed qui potuit, **BENEDICTO XIV.** summo sacrorum antistite, & reipublicæ munia ac beneficia, non tam pro potestate atque imperio, quam pro justitia atque æquitate, dispen-

sante

v
sante, qui potuit, inquam, ad te
non deferri? Quam ipse viam hono-
rum adipiscendorum in omni vita sua
tenuit, eandem tibi patere voluit,
meritum ac dignitatem. Honorem
ille nec ad indignum deferre, nec
ad dignum non deferre potuisset: ne-
que eum tibi se ut beneficium tri-
buere, sed ut debitum persolvere exi-
stimavit. In quo ipso tibi plus de-
dit, quam si nullo tuo merito ac
tamquam gratis dedisset. cum hono-
re enim iudicium de te suum, quod
ipso honore est multo potius, ac te-
stimonium honorificentissimum dedit.
Tu vero plus illi etiam eo ipso no-
mine debes. quum enim omnibus &
consiliis & actionibus tuis id semper
spectasses, ut fidem & integritatem
tuam Principi tuo probares, neque
ut ille te ullis præmiis afficeret, sed
ut dignum, qui maximis afficereris,
iudicare deberet: non modo illa ipsa
præmia ab eo, sed illud, quod uni-
ce concupisti, iudicium de te suum,
hoc est, præmium omnium amplif-

vi

simum, adeptus es. Ergo & ab illo tantum in te profectum est, quantum proficisci potuit; & tu non potes plus illi debere, quam debes: neque immerito nunc demum tibi non tam honoris istius insignibus ornatus, quam ipso honore, siquidem tantum iudicium accessit, auctus videris. Neque vero aliter sentiunt, qui recte sentiunt. is enim verus ac germanus est honor, quo ejus, qui honore afficitur, dignitas honoratur.

Id in honore tuo contigisse, cum est ad existimationem tuam famamque amplissimum, tum ad animi mei lætitiā ac voluptatem tantum est, ut, si non dicam aliquis omnibus mihi necessitudinibus conjunctus, at tamen non æque dignus, sed ego ipse, certe indignissimus, eundem honoris gradum, fortunæ flatu aliquo (quod factum esse aliquando memoriæ proditum est) ferente, assequutus essem, non æque gauderem. non enim me privata umquam commoda magis, quam publica, delectarunt;

ne-

neque quidquam in humanis rebus esse pulchrius aut jucundius intelligo, quam consentaneum atque æquabilem rerum ipsarum actionumque ordinem, & juris, a natura, id est, ab auctore naturæ, profecti, inter homines conservationem; qua fit, ut suum unicuique certa & stabili cum ratione tribuatur. Jam, honores, & reliqua virtutis præmia, merentibus jure ipsorum quodam deberi, manifestum est; quæ propterea immerentibus, aut non æque merentibus addici, non injurium esse non potest. Possim ne igitur ego, aut vero quisquam, qui modo, hominem se esse, meminerit, vel maximis aut suis aut suorum propositis utilitatibus, hominum injuria delectari? non gaudeam potius, mihi aut meis quod non debetur, id iis, quibus debetur, adjudicari?

Magna est profecto vis æquitatis, præclara species, potens illecebra. Quid? ille ipse BENEDICTUS, a quo honorem istum accepisti, quid in dando maxime sequutus est? quid

præcipuum adamavit? quid sibi amplectendum, quid exornandum putavit? nonne æquitatem potissimum tuam? Est in manibus luculenta illa ejus Alloquutio, in amplissimo orbis terrarum consilio ad Cardinalium collegium sexto Kalendas Decembres habitâ; in qua eorum, quos Cardinales renunciaturus mox esset, insigniora merita, tacitis quidem adhuc atque occultatis nominibus, verumtamen satis aperta cujusque significatione, commemorans, ubi tandem ad designandum te venit, *Erit demum, inquit, qui jamdix eximiam jurisprudentiæ laudem in Romana Curia merito adeptus, & multis in rebus ac difficillimis Apostolicæ Sedis negotiis sub eodem Prædecessore nostro versatus, non paucos denique annos apud nos TOTIUS JUSTITIÆ ADMINISTRATIONE OMNIBUS OFFICII SUI MUNERIBUS MAGNO ET CONSTANTI ANIMO SINE PERSONARUM ACCEPTATIONE SATISFECIT, suisque studiis atque laboribus nos in assiduis, quibus*

bus premimur, curis & sollicitudinibus sublevare non destitit. Hoc quoque justitiæ fuit, immo justitiæ atque æquitatis tuæ præcipuum munus, eum, qui te totius justitiæ administrationi præfecerat, tuis studiis atque laboribus in ejus maximis atque assiduis omnium Ecclesiarum curis & sollicitudinibus sublevare.

Captus est igitur excellenti hac tua *justitiæ administratione* BENEDICTUS; qui quidem illud etiam in eadem Alloquutione testatum continuo voluit, *Unam se meritorum rationem in Cardinalium creandorum electione spectasse.* Non possum non etiam ego hac ipsa sapientissimi Pontificis in mandandis honoribus justitiæ administratione capi: non possum non ea summopere lætari incredibiliterque gestire. Videtur enim mihi illius Republicæ status nostris hisce temporibus esse constitutus, quam tum demum beatam fore princeps ille ingenii atque doctrinæ Plato scribit, si in ea Principum potestas cum sapientia con-

jun-

jungeretur. Principum autem sapientia civili scientia maxime continetur: scientia vero civilis in æquabilis inter cives juris administratione versatur. In hæc sapientissimi Principatus beata incidisse me tempora, mihi certe, atque adeo omnibus, lætandum est atque gestiendum. Quod autem in tuo potissimum honore ejusmodi sapientiæ promendæ atque explicandæ facultas atque opportunitas **BENEDICTO XIV.** oblata sit, id vero illud est, quod mihi plus esse ad animi mei lætitiā, quam si aut ego aut meorum maxime necessario- rum quisquam eundem istum amplissimi honoris gradum adepti essemus, paullo ante affirmabam, quodque iterum omni asseveratione confirmo.

Non vereor, ne, non perinde atque ego sentiam, hoc me tantopere testificari suspiceris. oblitus tui videre, si neminem putares ipsa honestate potius, quam sua quavis utilitate delectari ac duci. descisceres ab æquitate illa, quam præter cæteras

vir-

virtutes tuas in te suspicimus, si homo, ab omni simulatione remotissimus, simulati animi aut fictæ orationis in quoquam, qui nec incredibilia diceret, & de quo tibi, quo animo ea, quæ diceret, loqueretur, non liquido constaret, crimen agnosceres. Ego vero tam me non simulate esse loquutum sentio, ut non modo tibi, atque iis, qui nunc sunt, verum etiam omni consequenti posteritati notos esse sermones hos meos sensusque velim.

Intelligis profecto, jam ad alterum, de quo te mihi rogandum esse initio proposueram, orationem esse delapsam. Rogo igitur te, ut, qui primum illud roganti mihi non denegasti, tibi ut in recenti honore isto tuo gratulari, te non invito, possem, alterum hoc quoque concedas, ut gratulationem hanc ipsam meam posteritati transmittere, te etiam libente, possim. Patere, illam etiam hoc scire, honore me tuo plus, quam si meus honor ageretur, esse

lætatum ; neque me tamen de honore tuo tibi, sed de tua dignitate fuisse gratulatum : quæ quidem si abfuisset, nec lætari ego de honore tuo, nec tibi de honore tuo gratulari potuissem . Id autem scire posteritas hac demum ratione poterit, si, quod a te vehementer peto, eandem hanc, qua tibi gratulatus sum, epistolam huic ipsi orationum mearum libello, quem edo, quemque etiam post me victurum confido, inesse atque præfigi permiseris . quam tu epistolam non tam orationibus præponi, nuncupandi gratia, existimare debes, quam ipsas orationes, epistolæ unius causa, libello apponi . non enim me ulla orationum, sed ingens epistolæ, hoc est gratulationis meæ, perennitatis cura sollicitat . Fuerunt illæ quidem sæpius cum in Italia, tum in Germania Poloniaque vulgatæ . quod ego neque ut fieret, umquam laboravi, neque factum sane moleste tuli . nam neque famam ullam nominis, edendis iis, me consequuturum speravi, neque

in-

infamiam subiturum apud æquos talium rerum æstimatores credidi. in neutram enim partem sunt, ut mihi quidem videtur, insignes; sed in quadam fortasse mediocritate consistunt: ut neque omnes hujus aut superioris ætatis oratores æque tolerabiliter, neque plerique non multo elegantius & scribant & scripserint. ejusmodi certe non sunt, quas ego aut antea mea sponte emissem, aut hoc tempore cuiquam inscribere auderem; tibi præsertim, quem (quod olim de Q. Scævola dictum accepimus) constat inter omnes, & jurisperitorum eloquentissimum, & eloquentium jurisperitissimum esse. Nunc mutata ratio est, mihi que justa ac prope modum necessaria causa oblata, cur eas in lucem, aliquanto retractiores auctioresque, prodire velle deberim. Si hanc, qua gratulatio de honore tuo mea continetur, epistolam ad te solam & incommutatam misissem, non ipsa per se, ut ita dicam, stare ac diu vivere potuisset. ineunda

da mihi propterea ratio fuit , quæ stabilitatem illi ac diuturnitatem compararem . cum aliquo meo opere , paullo , si non re ipsa , at certe mole sua , firmiore , quodque ætatem laturum videretur , conjungendam putavi . Alia quidem nescio quæ , te tuoque nomine minus fortasse indigna , mihi erant in manibus , sed rudia adhuc atque inchoata ; quæ si ante perficere voluisssem , quam hoc gratulationis officio fungerer , nimis fera futura gratulatio mea fuisset . Orationes relinquebantur , quas ante aliquot annos ad Florentinos habueram . his oculos orationibus atque animum adjeci ; easque statim arripui , quas ,

Ut cymbæ instabili , fluctu jactante , faburram ,

meæ paucarum pagellarum epistolæ (quæ propterea verendum erat , ne , quemadmodum ait ille , ventis ludibrium deberet) stabilem quemdam ac perpetuum cursum conciliaturas speravi . Nihil ego aliud , earum novissima hac editione , me spectasse

profiteor; id unum cupii; id, nisi tu meis consiliis ac votis obstiteris, consequar. Cur autem obstes? qui, quem honore tuo tantopere lætari intelligis, velle debes, ejus lætitiā spe illa, nunquam eam in posterorum memoria interituram, cumulari.

Extremum est, ut Deum O. M. enixe precer atque obsecrem, quod quidem & facio, nec facere umquam desistam, ut te saluum atque incolumem ad plurimos annos esse velit, primum, ut **BENEDICTUM XIV.** a quo tu tanto beneficio, ego tanta lætitiā affectus sum, in illis suis Pontificatus maximi maximis curis ac sollicitudinibus, consilio atque opera juvare pergas; deinde, ut homines intelligant, quæ sit sub tanto Pontifice honorum non modo adipiscendorum, verum etiam retinendorum via certissima; denique, ut tu honore tuo, ego honoris tui lætitiā diutissime perfrui possim. Vale.

Ex Collegio Romano. Nonis Decembr. Anno a Christo nato MDCCLIII.

REM-

REIMPRIMATUR,

Si videbitur Reverendissimo Patri Magistro Sacri Palatii Apostolici.

F. M. de Rubeis Patriarcha Constantinop.
Vicesg.

H *Ieronymi Lagomarsinii & Societate Jesu Orationes* legi perlibenter, jubente S. Palatii Magistro Reverendissimo, cui sancte confirmo, atque testificor, nihil iis inesse, quod sanctissimæ Religioni adversetur, esse autem plurimum latinæ elegantię, ac solidæ germanæque eloquentię; & propterea illas posse judico in publicam lucem emitti. Dat. Romæ postridie Kal. Decembris MDCCLIII.

Philippus Bonamicus S. Tb. D. & Sanctissimi
D.N. BENEDICTI XIV. Brevium ad Principes Substitutus.

REIMPRIMATUR.

Fr. Vincentius Elena Mag. Socius Rm̃i P. Magistri Sacri Palatii Apost. Ordinis Prædic.

I N D E X.

O Ratio I. <i>Multam dandam esse litteris, at non multis, operam.</i>	Pag. 1.
Oratio II. <i>Pro grammaticis Italiæ scholis.</i>	16.
Oratio III. <i>Pro lingua latina.</i>	51.
Oratio IV. <i>Pro scholis publicis prima.</i>	85.
Oratio V. <i>Pro scholis publicis secunda.</i>	113.
Oratio VI. <i>In adventu Francisci III. Lorbaringia, Barri & Magni Etruriæ Ducis ad Florentinos.</i>	143.
Oratio VII. <i>Pro scholis publicis tertia.</i>	167.
Epistola. <i>Qua, quid in M. Tullii Ciceronis contra L. Pisonem oratione intercederit, demonstratur.</i>	101.
	ORA-



ORATIO I.

HABITA FLORENTIÆ
III. IDUS JANUARIAS MDCCXXXIV.

CORAM
FABRITIO SERBELLONIO
ROMANI PONTIFICIS
AD-MAGNUM ETRURIE DUCEM
LEGATO, &c.



*Multam dandam esse litteris, at non
multis, operam.*



Uod vulgo reliqui artium libera-
lium magistri vehementer expe-
tunt, quaque re una maxime lit-
terarum utilitatem contineri ar-
bitrantur, ut, qui ad sese do-
ctrinæ comparandæ causa ado-
lescentes accedunt, studium immensum,
quoddam, atque inexplebilem quamdam di-
scendi cupiditatem afferant; id mihi Rhetor-
icæ præcepta nunc primum apud vos, Flo-
rentini, tradere instituenti, neque utile, ne-
que propterea optandum videtur: quin, nisi
modus, ac certa in ea ipsa re adhibeatur
ratio, nihil litteris infestius, nihil juventuti
perniciosius puto, quam nimio isto discendi

A

stu-

studio inflammatos esse discipulos . Nam me
 usus annorum jam ferme decem , quibus in
 hoc rhetorico tamquam curriculo verſor , edo-
 cuit , nullius in humanis hiſce litteris pro-
 greſſus eſſe tardiores , quam eorum , qui hu-
 manitatem omnem tota mente animiſque ſpe-
 ctantes , ita contendunt , ſic impetu quodam
 ſtudioꝝ ſuorum ac tamquam ardore ra-
 piuntur , ut , quemadmodum Herculem aju-
 ſtadium olympicum animam continentem ,
 unoque ſpiritu conſeciſſe , ſic ipſi ſpatia hæc
 litterarum immenſa vix umquam reſpirantes ,
 animamque liberam ducentes percurrere velle
 videantur . Non eos multitudo cognoscenda-
 rum rerum prope infinita , non varietas in-
 credibilis , non difficultas ſumma deterret .
 Artem oratoriam , poeticam facultatem , la-
 tinas , græcas , etruſcas litteras , rerum ge-
 ſtarum monumenta , antiquitatis memoriam ,
 æliqua artium omnia non eodem modo tem-
 pore , ſed eadem , ut ita dicam , opera con-
 ſectantur . iidem & accuſatores acres , &
 defenſores boni , & hortatores graves , & diſ-
 ſuaſores conſiliorum probabiles , & laudato-
 res rerum ac perſonarum periti , & vitupe-
 ratores vehementes (quibus dicendi generi-
 bus eloquentia ferme circumſcripta contine-
 tur) , iidem epici , iidem tragici , iidem co-
 mici , lyrici , bucolici , ſatyrici , & ſi quod
 eſt aliud poeticæ laudis genus , repente eva-
 dere , haberique vellent . Atque utinam
 ætatis hoc eſſet vitium , non naturæ ! Ubi
 ſemel juvenilis hic eorum ardor deſeruiſſet ,
 moderatioribus tum iisdem , ac ſanioribus
 uteremur . Nunc ætates omnes hominis re-
 li-

ORATIO I.

3

liquas discendi nec tamquam cacochæthes corripit, in diesque latius misera contagione serpit ac sævit. Quam multos enim viros, quam multos etiam senes videmus æstu quodam, cognoscendi omnia sic ferri, & tamquam tempestate aliqua perpetuo jactari, ut numquam errandi finem faciant, numquam in ullius doctrinæ tamquam portu conquiescant! Per logica, per physica, per mathematica, per cælestia, per terrestria, per humana, per divina omnia vagantur. Discruciantur intimis sensibus, si quis ullius aut veteris aut novi scriptoris liber non in eorum manus pervenerit: si vero aliquid, sibi antea inauditum, inter legendum offenderint, plane, plane inquam, exanimantur; miranturque quodammodo taciti ipsi secum, potuisse in rerum omnium natura esse aliquid, quod non jam ante didicerint. Sed, si verum quærimus, non est ea discendi cupiditas, sed fastidium. Ut quidam ægro corpore ciborum omne genus appetunt, allatos vero, quum paullulum gustarint, rejiciunt atque adspernantur, aliosque, quos suaves atque jucundos palato suo fore falso autumant, subinde poscunt; sic isti morbida quadam discendi tamquam orexi incitati, quas primum tam avide disciplinas appetiverunt, eas primoribus, ut ajunt, labris gustatas respuunt deinde atque fastidiunt, animumque continuo ad alias deinceps atque alias, mox æque fastidientias ac repudiandas adjiciunt.

Horum ego hominum morbo, quantum quidem possum, sive potius, quantum ipsi, qui sibi sani videntur, me posse sinent (pro

A 2

ea,

ea, qua omnes, qui bonas litteras amamus ac colimus, erga litterarum studiosos caritate, & pro eo, quo erga litteras ipsas, quibus ex hoc immoderato litteratorum hominum studio periculum fane ingens impendet, amore esse debemus) sententiæ meæ atque orationis medicinam adhibebo in hoc tempore. Ea est huiusmodi: ut in animum inducant, sibi que illud persuadeant: *Multam quidem dandam litteris esse, at non multis, operam*. Hoc ego dum planum facere conor; dum ea, quæ adolescentibus, disciplinæ nostræ commissis, censeo profutura esse, dico; dum litterarum studiis modum certosque fines constituo; dum litteras ipsas eadem opera orno atque amplifico: tu me, Præsul amplissime, & litterarum cultor, & litteratorum fautor, vosque omnes, quotquot huc tam frequentes, tantaque alacritate convenistis, litteratissimi viri, multum dubitantem, neque modo iudicia de me vestra, sed conspectum vultusque ipsos verentem, vixque tandem aliorum voluntate atque auctoritate compulsus, non mea sponte, in hanc lucem domestica ex umbra prodire audentem, humanitate vestra atque benevolentia, quæso, sustentate, & mea verba bona cum venia, ut aliorum soliti estis, ac diligenter attendite.

Doctrinarum omnium, ut virtutum, quoddam esse inter se vinculum, neque posse quemquam in una aliqua sic versari, ut excellat, qui non sit reliquarum etiam omnium copiis atque opibus instructus, possum facile Stoicis assentiri. Hinc ille doctrinarum cursus,

O R A T I O I.

sus, ac tamquam orbis existit, quem græci
 propterea *ἐγκυκλοπαιδία* dixerunt: quem qui
 potuit universum conficere, is demum cumu-
 late doctus ac plane sapiens existimatur.
 Præclara profecto res ac magnifica, multo-
 rumque mortalium studiis acerrimis expeti-
 ta; verumtamen ejusmodi, quam nondum
 quisquam assequi complectique potuerit.
 Nam, quamquam nonnullos aut legimus,
 aut audivimus, doctrinis omnibus excultos,
 sapientissimos evasisse, id non ita intelligere
 debemus, quasi nihil ab iis fuerit, dignum
 studiis hominum ac cognitione, præteritum;
 sed ita, ut tantum quisque in cognoscendo
 profecerit, quo plus, qui simile ingenium ad
 discendum attulerint, paremque industriam
 adhibuerint, proficere non potuerunt. Nem-
 pe hanc in omni rerum natura æstimanda re-
 gulam normamque adhibemus, non ut eas
 per se ipsas consideremus, sed ut, ad res
 alias in eodem genere referendo, quantum
 aliis aliæ præstent, judicemus. Nam neque
 magnum appellare possumus in rebus huma-
 nis quidquam, neque multum, neque ali-
 quid tale, nisi cum aliis magnis, multis, cæ-
 terisque similibus unumquodque comparetur.
 Qua etiam ex re fit, ut, quæ summa esse in
 aliquo genere existimamus, ea excellere at-
 que præstare in illo eodem genere dicamus:
 ut non modo sine comparatione judicare de
 rebus non possimus, sed neque judicia ipsa
 nostra sine comparandi significatione iisdem
 de rebus expromere. Atque hæc quidem
 omnis disputatio, non mea, hominis indocti,
 sed sapientissimi Socratis apud Platonem, ex

mediaque ipsa Academia repetita, eo pertinet, ut ne nos vulgi opinionibus abduci abripique patiamur, neve iis, quos in omni temporum memoria, doctissimos, sapientissimos, ac, si Superis placet, minus quidem latino, verumtamen splendidissimo gloriosoque vocabulo *omniscios* appellatos cognovimus, nihil doctrinæ, sapientiæ, scientiæ ullius defuisse arbitremur. Non est profecto, non est hujus imbecillitatis ingenii nostri, non exigui hujus spatii, quod est homini ad vivendum datum, non denique ipsius naturæ rerum, quæ in infinita cum varietate, tum difficultate versatur, omnia pervidere, omnia nosse, omnia meminisse. Fuit ista quondam Sophistarum veterum arrogantia; quorum princeps leontinus Gorgias poposcisse in conventu Græciæ quæstionem fertur; deque omni re, quæ in disceptationem vocaretur, professus fuisse, copiosissime se esse dicturum. Haud paullo arrogantior Eleus Hippias ex eadem disciplina fuit; quem ait Cicero (a), cum Olympiam venisset, maxima illa quinquenniali celebritate ludorum, gloriatum esse, cuncta pæne audiente Græcia, nihil esse ulla in arte rerum omnium, quod ipse nesciret: nec solum has artes, quibus liberales doctrinæ atque ingenuæ continerentur, Geometriam, Musicam, litterarum cognitionem & poetarum, atque illa, quæ de naturis rerum, quæ de hominum moribus, quæ de rebus publicis dicerentur; sed annulum, quem haberet, pallium, quo amictus, foccos, quibus in-

(a) *De Or. l. 3. c. 127.*

O R A T I O I.

indutus esset, se sua manu confecisse. O hominem singularem! o miram professionem, ac prope horribilem! de qua profecto idem sentiendum puto, quod de quorundam testimonio, qui mira quædam de Marco Antistio Pyrgensi dicerent, optimum eum colonum, parcissimum, modestissimum, frugalissimum esse, Marcus Æmilius Lepidus censor libere festiveque respondit (a): *Nihil se illorum credere*. Certe Socrates, qui, cum Gorgia veluti compositus congressusque, de ea arte, quam sophista ille profitebatur, multa subtilissime ac prope divinitus disputans inducitur a Platone (b), eo hominem confidentissimum adigit, in easque angustias, & interrogando & instando, compellit, ut tandem loquacissimus ille obmutescat, quique, se omnia scire, profitebatur, omnino, quid respondeat, reperire non possit. Quanto modestius idem Socrates quantoque commodius, *id unum se scire*, professus est, *quod nihil sciret*? Atqui Philosophiam, morum illam vitæque magistram, primus philosophorum *e celo*, ut ait Tullius, *evocat*; idemque eam, quæ physicis continetur; universam lustrarat, &, id, quod ex Timæo Platonis intelligimus, multis partibus auctam illustrarat. Quid? æqualis Socratis Democritus? quocum Cleanthes, Chrysippus, reliquique inferioris ætatis philosophi comparati, esse quintæ classis eidem M. Tullio videntur (c),

A 4

non-

(a) *Apud Cic. 2. de Or. c. 287.*

(b) *In Gorgia sive de Rhetor.*

(c) *Lib. 4. Academ. quest. c. 73.*

bonne sophistarum, ejusdemque generis hominum levitatem contraria professione auctor gravissimus refutavit? *Nego*, inquit, *scire nos, sciamusne aliquid, an nihil sciamus: ne id ipsum quidem nescire aut scire, scire nos*. Nimis hic quidem, plus certe, quam ille Socrates, non modo de sua, sed de omnium mortalium scientia detraxit. Potuit uterque aliquid, mea sententia, hominum studiis relinquere, neque animos a discendo tam severa tristisque oratione detertere. Sed, quamquam hominum ingenia ac facultatem ex iis angustiis, in quas illi philosophi conjecerunt, in campum paullo patientiorem eduxerimus, nec omnem omnino scientiam ex humanis mentibus sustulerimus, sciendi tamen fines haud ita multum propagabimus; nec, quantæcumque, quamque diuturnæ nostræ contentiones exstiterint, illud efficere umquam poterimus, ut non multo plura, quam quæ scierimus, nesciamus. Modere-mur igitur studiis nostris, discendique immensam cupiditatem illam coerceamus: ne, si omnia omnium artium scire voluerimus, plus, quam natura rerum patitur, hominisque conditio fert, expetere videamur.

Quid? si non modo non omnes artes scientia & cognitione complecti, sed ne singulas quidem perfecte ac cumulate callere possumus? ardebimusne etiam, flagrabimus, æstuebimus omnia cognoscendi cupiditate? an, non potius sapienter omittentes, quæ omnino nos consequi posse diffidimus, in unam artem aliquam studio & cogitatione conversi, illam tamquam Spartam, vel quæ nobis forte

ORATIO I.

te obtigerit, vel quam consilio delegerimus, pro virili parte exornabimus? Equidem (ne Socratem adhuc atque Democritum dimittamus) sæpe mecum ipse quæsi, quid illis hominibus, certe doctissimis, in mentem venerit tam valde testari, *Nilil se scire*: ac propemodum eo aliquando adducebar, ut crederem, voluisse eos, aut discendi spem hominibus, ut soli ipsi scaperent, adimere, aut potius modestiæ opinionem quamdam, apud vulgus ea prædicatione captare. Sed neque ambitionis suspicio in tantam virtutem cadere, neque ullius invidiæ potest: neque profecto, qui tam multis aliis sermonibus doctrinas hominibus commendarant, easque cum auditoribus suis in gymnasiis magna cum voluntate communicarant, quique non minus inscientiæ, quam arrogantæ reprehensionem vitandam esse intelligebant, aut aliorum doctrinarum studia retardare, aut existimationi suæ detrudere quidquam voluerant. Quid ergo est? Illud profecto. Intelligebant sapientissimi homines, scientiam mortalibus ullius artis, nisi omnia, quæ ad illam artem pertinerent, perfecte tenerentur, nullam contingere: nihil esse autem in ulla arte, quod non ad singulas alias pertineret: itaque necesse ei esse, qui unam scire vellet, scire omnes: scire autem omnes non licere: igitur ne unam quidem sciri posse: ac propterea nihil se, nihil quemquam scire. Fateor esse *hanc exilem quamdam* (ut M. Antonii illius eloquentis verbis utar) & *spinosa orationem, longeque a nostris sensibus abhorrentem*: sed eandem verissimam esse.

A 5

con-

confirmo, & tum ad animorum arrogantiam, si quis forte sibi scientiæ opinione placuerit, minuendam, tum ad studiorum impetus, si quis omnia aut pleraque concupierit, retardandos, valere plurimum censeo.

Verum subtilia hæc argumenta, quæ solent a concione repudiari, omittamus: conemur, si modo id consequi poterimus, singularum artium difficultatem hanc planius, ad omniumque captum demonstrare. Ac ne omnia, quod esset infinitum, confitemur; de iis facultatibus, quæ magis in gymnasiis hoc tempore celebrantur, pauca cursimque dicamus: ex quibus haud erit difficile reliquarum facere conjecturam. Principem inter facultates locum, concessu omnium, obtinet ea, quæ de rerum omnium auctore ac principe Deo, de rebusque divinis agit, quamque Theologiam propterea nominamus. Hanc, quod universam mente animisque comprehendere homines non potuerunt, in plura tamquam membra secuerunt: quibus ex singulis immensæ ac perdifficiles facultates existunt. Nam & sacrarum litterarum explicatio, sine veterum monumentorum, temporum, locorum, & sine linguarum, hebrææ præsertim ac græcæ, cognitione, manca est quodammodo atque imperfecta: & dogmatum theologicorum tractatio, non & ipsis sacris litteris cognitis, & sanctorum patrum atque doctorum voluminibus, & conciliorum omnium, tum quæ œcumenica, tum quæ provincialia appellantur, actis diu multumque perspectis, viro

viro est periculosa theologo. Quam partem, longe omnium præstantissimam ac difficillimam, nemo ad hanc diem majori ingenii atque doctrinæ laude, nemo uberius, nemo elegantius Dionysio Petavio persecutus est; neque tamen, quum dies noctesque unum illud opus urgeret, potuit, morte occupatus, quæ inchoarat, absolvere. Quid controversas christianæ catholicæque fidei quæstiones, quid de septem sacramentis (ita enim appellant: neque verebor grammaticorum reprehensionem, modo usitatis rerum vocabulis utar), quid de moribus disputationes commemorem? Nonne in hisce Theologiæ singulis partibus hominum doctissimorum, ætates totas videmus esse contritas? Sed quid partes dixi? vel unum sæpe earum partium caput, de Dei scientia, de auxiliis divinæ gratiæ, de probabili probabiliorque opinione, de sexcentis aliis quæstionibus, si quis modo, quæ de iis sunt ab doctissimis hominibus in utramque partem disputata, velit cognoscere, omne propemodum humanæ vitæ sibi spatium, acerrimumque studium requirit ac poscit. Jam mathematicorum facultas (etenim huic primæ post Theologiam jure optimo deferuntur) tam late patet, tantis, tam multisque ex artibus coalescit, Arithmetica, Geometria, Algebra, Astronomia, Statica, Optica, Musica, Architectonica, atque aliis, ut, si quis non plus una tractare voluerit, negent ei earum rerum periti tractationem umquam defuturam. Certe, quamquam innumerabiles quidam, summis ingeniis præditi, ab antiquissi-

mis temporibus in ejus five singulis, five universis tractandis partibus elaborarint, nequaquam tamen omnia studio atque exercitatione consequi potuerunt. Multa priores ipsi occuparunt, multa posteris intacta reliquerunt. Hinc & Joannis Neperi perutiles illos ad rem trigonometricam logarithmos, & Bonaventuræ Cavalerii indivisibilibus rationem, & Petri Fermatii præclaram illam de maximis minimisque methodum, a Cartesio Ugenioque tam feliciter illustratam, hinc sacram illam in Geometria, quam dicunt Anchoram, hinc analysin mathematicam, hinc Torricellianos tubos, hinc, ut reliqua innumerabilia recentiorum omittam, Galilæi vestri & multa & miranda inventa suspicimus. Sed nondum exhausta est omnis rerum mathematicarum difficultas. Superfunt adhuc plurima, frustra vel a vetustissimis, vel a recentioribus, vel ab utrisque tentata, in quibus nobis, iisque, qui nos ætate consequentur, negotii satis esse superque poterit. Superest longitudinis gradus (utor jampridem facultatum ipsarum vocabulis, ne, si aliter fecero, & obscurus, & nimio plus diligens fuisse videar), superest, inquam, longitudinis gradus deprehendendus; planetarum theoria, tantis partium studiis, Copernico & Tychone suffectis duobus agitata, certa ratione aliqua perspicuaque constituenda; circuli quadratura perficienda; gravitatis, ventorum, marini ætus, magneticæ vis, aliarumque rerum plurimarum causa cognoscenda.

Atque hæc quidem postrema, quæ ad
se

se etiam philosophi putant pertinere, monent me, ut jam de Philosophiæ difficultate, quæ sentio, dicam. Sed nullam sententiam meam hac quidem in re volo interponere, immo ne de omnibus quidem Philosophiæ partibus dicere. De ea modo, quæ physica contemplantur, quid summus philosophus senserit, accipite. Ego enim sic statuo, vix quemquam avorum patrumque memoria aut ingenium acrius, aut vehementius studium, aut majorem solertiam ad res physicas cognoscendas, quam Petrum Gassendum, attulisse. Hominem Aristoteli, aristoteleæque familiæ universæ perinensum aristotelicus laudo; qui contrarias nostris sapientum opiniones, si quando necesse est, reprehendendas, at ipsarum auctoribus parcendum, ipsosque adeo suspiciendos esse semper existimarim. Is igitur naturæ tantus investigator, in eo libello, quem *Dubitationes, & Instantiæ ad Cartesii Metaphysicam* inscripsit: *Quidquid, inquit, fuit nobis de re unaquaque nosse necessarium, illud nobis (Deus) apertum fecit, tribuendo rebus proprietates, per quas innotescerent, & nobis sensus varios, quibus illas apprehenderemus. Quod ad internam vero naturam, & quasi scaturiginem attinet, illam, ut nobis cognitu non necessariam, occultam voluit: & nos, quum nosse affectamus, aut præsumimus, intemperantia laboramus.* Rursusque in epistola tertia ad Petrum Cazzæum Societatis nostræ hominem, familiarissimum suum, capite quinto. *Sed facio, inquit, vir doctissime ac religiosissime, quod, dum in per investigatione causarum natu-*

naturalium versor, nusquam non caligo mihi offundatur: atque idcirco, tamquam incedens in densissimis tenebris, nihil non palpem, nihil non moveam, nullam non tentem semitam, si forte in aliquam speciem vel tenuissimam luculam emergam. Neque enim est, cur existimes, istis me nugis ita hæere, ut ipsas, quasi veritatem ipsissimam, habeam aut colam. Sed, cum totus mundus sit nugarum, plenus, & videre videar nugas quoque esse, quæ vulgo habentur seria maxime, superesse existimo, ut eas nugas deligam, quæ esse minus nugæ videantur. Audiamus illum denique in litteris ad Renerium datis: Sic semper, inquit, afficior, ut existimem, nihil scire licere ex rebus naturalibus, præter ipsarum historiam. sufficit mihi conjecturam sequi, quæ vel umbram quamdam levem probabilitatis habeat: de re seu veritate ipsa Deus maximus viderit, qui, præter rerum corticem, quantum mea capit imbecillitas, nihil cognoscendum mortalibus dedit. O hominem ingenuum, eoque magis intelligentem, quo sese minus intelligere confitetur! Ubi sunt tam modesti doctoris feroculi quidam discipuli? qui, quasi se illis rerum universalium natura e cælo, tamquam numen quoddam, videndam clara in luce contemplandamque præbuerit, ita doctrinæ suæ arrogantia subnixi ambulant. Desinant, se esse aliquid in eo genere, arbitrari, cum tam demisse, tamque propemodum abjecte de se ac de sua facultate germanos philosophos sentire intelligant.

Quid? In rhetoricis operibus arrogantia

tia num est magis ferenda? An est cuiquam M. Antonii apud Tullium vox illa inaudita? *Disertos exstitisse quam plurimos, eloquentem ad sua tempora in hominibus neminem.* An non M. ipse Tullius, *homo ille quidem, ut Fabii Quintiliani, clarissimi rhetoris, verbis utar, dono quodam providentiæ genitus, in quo vires suas eloquentia experiretur,* tamen in suo ad M. Brutum Oratore Antonii verissimam vocem illam fuisse multum & sæpe testatur? Num quis est postea, iis extinctis, eloquens, qualis antea non fuerat, exortus? Ergo a nemine est adhuc perfecti oratoris laus in maximis contentionibus occupata. Nemo se igitur circumspiciat ac jactet: nemo sibi in ea re diutissime contendendum esse non putet.

Eadem ferme est atque una ratio poetarum: quorum, ut oratorum, facultas quum ex omnium artium cognitione efflorescat, studii, laboris ac temporis non minus, quam universæ, requirit. Fac tamen sola Grammatica Poeticam atque Oratoriam esse contentas. Contrahe utriusque facultatis terminos, non definies. Cum autem Grammaticam appello, non eam dico, quam profitentur ii, qui pueris latinæ linguæ rudimenta tradunt, neque ferme quidquam, præter ea, quæ aliis tradunt, noverunt ipsi (de quibus est Luciani illud oppido festivum: Jovem, quem oderit, eum pueris erudiendis addicere), sed eam, quam M. Terentius Varro, omnium romanorum, auctore Cicerone, eruditissimus, quam P. Nigidius, ci-
vita-

vitatis romanæ, teste A. Gellio (a), doctissimus, quam C. Julius Cæsar in libris, quos de ratione latine loquendi ad Ciceronem, scripsit (b), quam ipse Cicero, non eloquentiæ modo, sed eloquutionis etiam parens, quam, ut propiora temporibus videamus, Politianus in *Miscellaneis*, quam Muretus, Lipsius, vir ille eximius Victorius vester, in suis *Variarum lectionum* libellis, quam Turnebus in *Adversariis*, quam tres Manutii, Lambinus, Nizzolius, Gruterus, uterque Gronovius, Grævius, innumerabilesque alii doctissimi viri, cum antiquisque comparandi, in suis sive Præceptionibus, sive, Glossariis, sive Commentariis, graviter copioseque tractarunt. Atqui hoc scitote; tam multa in iis a multis aut mendosa aut suspecta fuisse deprehensa, tam multa, de quibus sententiam eorum minime dissimulari oportebat, ab iisdem esse præterita, ut, qui aliquid judicare de iis rebus possunt, nihil adhuc in hoc genere perfectum a quocquam prodiisse pronuncient. De enarrationibus quidem (quas *Notas* alieno ineptoque vocabulo appellant) in omnes veteres latinos scriptores, quæ ad usum serenissimi Galliarum Delphini inscriptæ circumferuntur, nihil gravius dicam, nisi videri, non tantum plerosque illarum auctores, quantum ingenio ac facultate poterant, voluisse contendere. Hominem Gallum de Gallis illis grammaticis (grammaticorum est enim to-
ta

(a) L. 17. c. 7.

(b) Apud Cic. in Bruto c. 253.

ta illa tractatio) ne quemquam sententia mea violasse videar, testem dabo, atque eum quidem, qui toti illi rei non interfuit modo, verum etiam præsuit, doctissimum virum Petrum Daniele Huetium, cui secundæ partes in Delphini institutione, cum Bosfuetio principe erant creditæ. Is in eo commentario (a), quem de rebus ad se pertinentibus scripsit, *Quamvis, inquit, omnis adhibita est a me diligentia in seligendis perspectæ tantum doctrinæ viris, quibus veterum auctorum commentariis illustrandorum, cura demandaretur: nonnulli tamen vel levius, quam putabam, tincti litteris, vel impatientes laboris, quam mihi commoverant, expectationem sui fefellerunt.* Hæc Huetius. Ecce autem iisdem ferme temporibus, quibus veterum scriptis ab iis hominibus opera navabatur, vir quidam (b) item Gallus, neque ineruditus & valde industrius, Francisci Sanctii, Gasparis Scioppij, Gerardi Joannis Vossii vestigiis insistens, novam artis grammaticæ methodum (sic enim commentationes suas inscripsit) tradere mortalibus instituit. Qui omnium recentissimus in hanc arenam prodierat, quique superiorum omnium grammaticorum laboribus adjuvaretur, is profecto absolutissimum quoddam opus grammaticum perficere debuisset. Verum is multo plura professus est, quam quæ præ-

(a) Editus est Lipsiæ an. 1719. pag. 120.

(b) Claudius Lancelotus Benedictinus. Obiit an. 1695. in Abbatia Quimperlay in inferiore Britannia, cujus incolæ Britones.

præstiterit; majorem omnia colligendi, quam eligendi optima quæque curam adhibuit; superiorum peccata non multâ fastulit; quin novis de suo additis cumulavit: quorum non pauca vir latini ac græci sermonis scientissimus Franciscus Vavassorius a se animadversa vulgavit (a); quædam italicus interpres a se correctâ testatur; plurima nos etiam, quamquam cum illis nullo modo comparandi, adhuc corrigenda superesse, fortasse aliquando ostendemus. Quo magis mirari soleo, potuisse eam methodum italicis hominibus sic probari, ut reliquas veteres ac receptas jam multi fastidiant atque improbent; neque alia ratione, quam quæ in ea traditur, esse pueros in latina lingua instituendos putent. Nimirum habent hoc præter cæteras gentes Itali prope singulare (dicam aperte quod sentio, quodque vos ipsos, sapientissimi viri, sentire necesse est) habent, inquam, hoc Itali, ut bonis suis, quæ & multa sunt, & exteris nationibus invidenda, non sint contenti; aliena, quamquam sane mediocria, sic adamant atque suspiciant, ut pretium rebus, libris præsertim, non nisi peregrinitas apud eos facere videatur. Sed illuc revertor. Videtisne, universam artis grammaticæ regionem, quæ modicis quibusdam finibus circumscribi putatur, nullis adhuc fuisse cujusquam tamquam passibus peragratam? Quam multa in veterum latinorum libris a doctissimis grammaticis ignorentur, an non intelligi-

(a) In libello, cujus est tit. *De vi & usu quorundam verborum.*

ligitis? Cum autem eloquentiæ, ut ait Cicerō (a), *solum & quasi fundamentum sit oratio emendata & latina* (quod idem ad poeticam transferre sane possumus), quantum in hac una re oneris poetis atque oratoribus imponatur, plane perspicitis. Reliquarum etiam principum facultatum immensa, spatia ac difficultatem, me, quantum angustiae temporis patiebantur, commonstrante, cognostis. Possumusne, non singulis peramplam materiem inesse ac tamquam segetem, arbitrari? possumus sive universas, sive plerasque, aut etiam aliquot studiis nostris operaque complecti? possumus ingeniis hominum tantum tribuere, ut tantam vim rerum ab singulis posse comprehendere putemus? Nihilne rerum ipsarum multitudo, nihil varietas, nihil difficultas intelligendi facultati oberit? vitæ hujus denique brevitatem, atque multiplicem occupationem contemplantēs, nonne animos plane despondebimus, omitemusque (ut ait poeta bonus) (b) *multa brevi ævo jaculari*.

Ac si reliquis eruditis hominibus, quibus omnia vel naturæ vel doctrinæ subsidia abunde suppeditarunt, summæ studiorum, suorum contentiones sic e sententia processissent, ut in pluribus excellere artibus possent, magis hoc concedendum nobis putarem, ut multarum artium excellentiam expeteremus. Nunc autem quorum tandem est ista laus, ut pluribus in rebus iidem præstare

(a) *In Bruto* c. 258.

(b) *Hor. l. 2. Od. 16.*

starent? De iis modo, qui hæc litteras humaniores coluerunt, quique maxime noti sunt, quæram. Homerum, excellentissimum poetam, paremne fuisse oratorem putatis? Demosthenem contra, præstantissimum oratorem, ad poeticam Homeri laudem adspirasse arbitramini? Jam Virgilium, latinum Homerum, *illa felicitas ingenii*, ut ait Seneca (a) *in oratione soluta reliquit: Cicero-nem*, latinum illum plusquam Demosthenem, *eloquentia sua in carminibus destituit*. Quales latini poetæ Victorius, Sigonius, Muretus, Perpinianus, Manutii exstiterunt? nonne mediocres? At oratores valde iidem boni. Sannazarius, Fracastorius, Bargæus, Hofchius, aliique complures, oratores vix tolerabiles, at poetæ valde quidem probandi vel in eodem, vel in dissimili carminis genere fuerunt. Quin illud usu ferme semper venisse animadvertere possumus, ut, qui non utriusque facultatis laudem adamarunt, sed in una modo constiterunt, si unam hanc & latinis & etruscis litteris celebrare atque excolere voluerunt, non æque vel latinis vel etruscis satisfecerint. Eximios duos cives vestros dumtaxat afferam. Quis enim nescit, Joannem Casam summum etruscum, oratorem exstitisse? Unam, unam inquam, illam ad Carolum Imperatorem orationem malim ego, quam sexcenta aliorum orationum volumina scripsisse. At vero latina ejusdem sunt illa quidem non contemnenda, veruntamen non ejusmodi, ut similiter se
posse

(a) Lib. 3. Contr.

posse scribere plerique desperent. Nihil potest non modo fieri, sed ne cogitari quidem splendidius, uberius, elegantius Francisci Petrarcae carminibus, sed etruscis. Nam latina quidem, siue epica siue bucolica, nemo iterum legenda existimavit. Equidem ejus Africam si quando in manus sumo, Petrarcam in Petrarca requiro: neque satis possum statuere, mirerne magis illorum temporum atque hominum indulgentiam sane nimiam, qui non optimo latino poetæ lauream illam apollinarem detulerunt, an posteriorum & temporum & hominum severitatem, qui tam multis certe melioribus denegarunt. O rem sane miram ac prope incredibilem! unam eandemque facultatem, ejus modo tractandæ ratione immutata, intimo artificio sententiisque retentis, evadere sic plane aliam, ut duæ dissimillimæ inter se facultates constituentur, quarum in utraque non possit unus atque idem excellere! Quod si ita est, jurene an injuria doctores ii reprehendantur, qui latinæ atque etruscæ poeseos præcepta nolunt conjuncte tradere, vos videtis. Qui secus faciunt, eos ego viros & acutos & doctos & exercitatos & docendi peritos esse, quosdam scio, quosdam puto. Verum videndum est, num id illi judicio suo sensuque commoti, an aliorum voluntate, precibus, ac prope convicio efflagitati coactique faciant. Nam sæpe (quod est profecto indignissimum) præceptoribus stare judicio suo in discipulorum institutione non licet: sed puerorum parentibus, consanguineis, patronis mos est gerendus, tum temporibus, &

cu-



cujusque ætatis studiis, ac tamquam genio indulgendum. Ut ut res habet, ego neminem reprehendo. Tantum peto, ut ne quis nos, ne nostros, ne quemquam nostri similem, in causa fortasse meliore, reprehendat. Nolumus, discentium animos in plura studia magno cum singulorum incommodo distrahi; nolumus, adolescentulorum mentes tanta dissimilium rerum obrui copia; nolumus, e gymnasiis litteratores magis, quam litteratos prodire. Namque ea est hominum, querela, atque haud scio an propemodum justa, quamdam adolescere, atque huic nostræ succrescere ætati juventutem, tinctam illam quidem litteris, sed non imbutam; plus illi coloris, quam succi ac sanguinis inesse; multa profiteri, non item multa præstare; nihil non conari, vix quidquam posse perficere: verendum propterea esse, ne semidoctorum in immensum numerus augeatur, & ne singulæ disciplinæ suis tamquam tutoribus certis orbatae, aliquando profugæ ex Italia in exterarum gentium tutelam venire ac fidem cogantur.

A quo periculo prohibete res italias, adolescentes optimi (vos enim mea hæc extrema jam compellatoratio); retinete illud a majoribus vestris partum, vobisque veluti per manus traditum litterarum decus; neque committite, ut, quæ apud vos & natæ & altæ sunt litteræ, eæ diutius apud vos consistere, atque in Italia confirmari non possint. Non ego socordia ulla vestra aut cessatione commoveor. Alacritatem istam vestram, studia ista discendi, spiritus istos atque

que animos pertimesco; neque vestra cupiditati calcar, sed frænum esse adhibendum intelligo. Patriæ hujus vestra solum, quo excepti primum nascentes estis; cæli hujus, quem viventes ducitis, spiritus; majorum, in quos defixi intuemini, decus ac nomen; civium vestrorum, quos inter versamini, præstantia in litteris atque excellentia; indoles denique vestra egregia atque natura, stimulis vos gloriæ acerrimis dies noctesque compungit: atque, ut Themistoclem illum Miltiadis tropæa, objecta animo, somnum capere non sinebant (a), sic vos, assidue de domestica laude cogitantes, vix ullam potestis partem quietis capere. Quæ doctissimorum hominum in urbe vestra frequentia! Quanta in iis omnium disciplinarum cognitio! Quam celebris eorum & ubique pervagata fama! Alios Theologiæ penetralia magno cum doctrinæ apparatu feliciter ingressos, de divinis rebus quotidie tum commentantes, tum etiam scribentes videtis. Alios philosophicas institutiones nitidissimo orationis genere tum voce, tum editis voluminibus explicantes; hos egregiam græcis auctoribus navantes operam; illos de Græcorum Romanorumque numismatis, de veteribus inscriptionibus, de omni antiquitate eruditissime differentes scribentesque miramini. Quosdam etruscam linguam sedulo locupletantes, & vocabulorum tamquam pollinem a furfure secernentes; quosdam Berniani stili charites, sed multo vere-

cun-

(a) Apud Cic. l. 4. Tusc. quæst. c. 43.

cundiores facias, veluti postliminio, in Etruriam revocantes, & sibi honori, & patriæ ornamento, & universis mortalibus utilitati esse perspicitis. Mitto causidicos, medicos, chirurgos, architectonas, pictores, statuarios, musicos; quorum artes honestissimæ ac maxime liberales domicilium quodammodo in urbe vestra constituerunt. Quid nocturnos illos, octavo quoque die celebrari solitos, litteratorum hominum conventus commemorem? Quæ vestra tum mens, qui sensus, quæ animorum in omnem partem jactatio ac tamquam æstus esse solet, cum sive oratoribus, sive poetis, sive sibyllinorum ænigmatum interpretibus admurmurari a concione ac plaudî auditis? Pudet tum vestri nimirum vos; superiorum temporum in litteris cessationem damnatis tacitis sententiis ac devovetis; nullumque in reliquum tempus litteraturæ comparandæ genus, quo similem laudem assequamini, prætermittis: vos esse statuitis. Laudo egregiam indolem, laudo præclaros spiritus istos vestros: propositum laudare non possum. Quid enim? Omniane vos in litteris assequi vos posse confiditis? Quam sint litteraturæ partes singulæ vastæ, quam laboriosæ, quam non cujusquam adhuc cognitione comprehensæ, nondum intelligitis? Ipsos illos, quorum eximiam præstantemque doctrinam mecum jure suspicitis, quibus tantum non invidetis, quos æmulamini, quorum similes esse, quos æquare, quos, si fieri posset, superare velletis, an putatis ad tantam fuisse litterarum laudem perventuros, si multis se litteris temere dedidissent, si animos

O R A T I O I.

29

mos in plura ac dissimilia studia distraxissent, nisi unam facultatem, quam colerent, ad quam reliqua omnia referrent, in qua non mediocres quidam, sed excellentes, sed summi, sed singulares evaderent, delegissent?

Quin agite, o generosi! horum exempla sectamini, hos vestigiis persequiminor, eandem semitam, qua illi præiverunt, insistite, si eodem pervenire, & similem comparare vobis laudem expetitis. Reprimate itos neque vobis, mini credite, neque litteris utiles studiorum concitados ac cæcos impetus; ardorem discendi istum, quo flagratis acerrimo, paullulum, quæso, restinguite; & id, quod faciendum esse omnibus oratione hac mea ostendere conatus sum, vos, si quis alius, imprimis facite, ut multam quidem operam litteris, at non multis, detis. Dixi,



ORATIO II.

PRO GRAMMATICIS ITALIÆ SCHOLIS

HABITA FLORENTIÆ

IV. IDUS JANUARIAS MDCCXXXV.

CORAM

JOSEPHO MARIA MARTELLIO

FLORENTINÆ CIVITATIS

ARCHIEPISCOPO.



Uicumque in liberalium disciplinarum sive professione sive studio quodam atque exercitatione versantur, amplissime Pontifex Josephus Maria, eo esse animo, ea mente debent, ut, neque si quid vitii in illarum tractatione animadversum a quoquam est, negligendum sibi, neque, si quid commodi excogitatum est, repudiandum putent. Tum enim demum sua doctrinis absolutio atque artibus accedet, si in iis fuerint, quæ vitiosa deprehenduntur, sublata, & quæ utilia ac commoda reperiuntur, inducta. Neque vero ulla re alia magis possunt ingeniosi homines atque acuti facultatem industriamque suam litteratorum ordinibus approbare, quam si, inventis jam ac constitutis quibusque litteris, eas ipsi aut castigando aut ornando meliores fecerint. Hanc sibi provinciam ac laudem in plerisque disciplinis juvandis docti quidam homines exitu sane felici depoposcerunt. Unam video profecto a multis, sed haud scio an æque feliciter, esse tentatam. Nam, posteaquam in
Ita-

Italiæ gymnasia ea latinæ linguæ tradendæ ratio, qua nunc etiam plerique utimur, recepta est; dici vix potest, quam multi exstiterint; qui quodam sive contentionis, ut nonnulli putant, sive, ut ego interpretor, publicæ utilitatis studio commoti, novas subinde de re grammatica commentationes suas, tamquam meliores ac priscis propterea anteponendas, edere ac prædicare non destiterunt. Hos ego (ut item cæteros, qui utilitatis novæ alicujus spem in omni re litteraria studiosis ostendunt) neque inauditos dimittendos esse, neque negligenter ac suspensis animis audiendos semper existimavi: ne, boni si quid afferrent, id superbe repudiatum, si quid incommodi obtruderent, periculose admissum videretur. Videbam, equidem, italos præceptores, si paucos quosdam exceperis, a prisco illo suo instituto non recessisse; veteremque illam præceptorum rationem servandam sibi constanter ac retinendam censuisse. Movebat id quidem me non mediocriter: verumtamen eorum judiciis non tantum tribuendum putabam, ut mihi, rectene an secus id facerent, meo arbitratu quærere non liceret. Conquisivi doctores illos recentes undique: quid in vetusta grammaticæ rei ratione reprehenderent; novi quid ipsi afferrent; num brevitate artis, num facilitate, num elegantia commendarentur, nullo partium studio, summa judicii æquitate, acerrima mentis contentione, perpendi. Quid quæritis? Nova hæc omnia deprehendi, Florentini, alia falsa, alia vera illa quidem, sed aliena atque ine-

pta, alia prope monstrosa, alia plane ridicula; denique sic apud me statui, nihil esse tanti, ut a veterum magistrorum consuetudine atque institutis in re grammatica recederetur. Sed, quum animadverterem, patronos suos novis istis doctoribus non deesse, ab iisque excogitatas tradendæ linguæ latinæ rationes in cælum laudibus ferri, vetustam vero, qua plerique hic in Italia uterentur, vituperatione ac prope conviciis nonnullorum peti: non satis esse arbitratus sum iudicium meum de hac tota re, quam diu diligentissimeque expendissem, mihi esse probatum, nisi illud etiam efferrem, atque, ut hominum vulgo probaretur, falsis, si quas animo imbibissent, opinionibus sublati, efficerem. Et, quamquam orationem, de re sane exili atque tenui institutam, in quasdam me dicendi angustias ac tamquam incitas compulsuram intelligebam, vixque arbitrabar esse ejus, qui nobilissimam artem profiteretur, quique superiore anno ex hoc ipso loco præstantissimas quasque facultates oratione sua complexus esset, eundem nunc ad hæc vulgaria delabi, & in una arte, omnium, ut opinio est hominum, levissima despectissimaque consistere: tamen, non uno mihi dictionis meæ fructu proposito, statui exiguo hoc tamquam campo minus gloriose decurrere, quam patientiore minus utiliter exultare. Nam profecto & quæri a me hoc tempore de optima ratione tradendi eas litteras, quæ reliquarum sunt, ut ait Cicero (a),

solum

(a) *In Bruto* c. 258.

solum & fundamentum, vehementer utile futurum est: & recentium grammaticorum arrogantiam paullulum coerceri, eorumque qui illis cæco quodam studio patrocinantur, stultitiam leviter coargui, nihil, opinor, nocebit. Illud scio, initurum me gratiam, eamque magnam, a multis & honestis & doctis viris, qui ferre jam æquo animo non possunt, sibi tam sæpe tantisque clamoribus objici, Anglorum, Batavorum, Gallorum, Japonum, credo, etiam atque Sinenſium grammaticas institutiones italicis esse longo intervallo anteponendas; ratione ea, qua ipsi in tradendis latinæ linguæ præceptis utuntur, quaque in posterum etiam tempus uti fixum animo destinatumque habent, adolescentium ingenia non instrui, sed obrui, cursusque illorum ad reliquas disciplinas magnopere retardari. Hanc ego sive remissionis cujusdam, sive pertinaciæ notam non finam diutius italicis gymnasiis hære: ostendamque oratione hac mea, nullam satis justam afferri causam, quamobrem debeant a veteri atque recepta tradendæ artis grammaticæ ratione itali latinæ linguæ præceptores recedere. Ac, ne quis forte me putet privatam magis atque domesticam, quam publicam atque communem causam suscepisse, complectar oratione mea non eos modo, qui Emmanuelem Alvarum, verum etiam eos, qui eruditum virum Ambrosium a Visitatione, qui M. Antonium Bonciarium, qui denique aliquem horum similem in tradendis grammaticis disciplinis ducem atque auctorem sequuntur. Æque enim omnes

iisdem reprehensionibus sunt obnoxii, iisdemque obtrestationibus patent. Quo plures autem mortales defendo, eo majori studio ac benevolentia oportet vos humanissimos homines mea verba excipere, meque diligenter attendere.

Atque ut statim ingrediamur in causam, ajunt reprehensores nostri primo: (a) Italos vehementer magistros errare, in eoque plurimum adolescentulorum studiis officere, quod latinæ linguæ præcepta, non italico, sed latino sermone edita atque conscripta tra-

(a) Inter cæteros, quorum sententiam de Grammaticæ præceptis latine non tradendis, in hac orationis parte refellimus, est Vincentius Gravina; cujus illa sunt in Orat. 1. de Instaur. studiorum. *Atque ex his altisque ætatis aureæ scriptoribus, quæ Augusti ævo concluditur, carpenda sunt atque proficenda pueris facilia . . . porro in traditione præceptorum id meo judicio peccatur in scholis maxime, quod quæ ad latinæ linguæ intelligentiam requiruntur, latine præbentur; atque ita obscura per obscuriora panduntur. Etenim regulæ ad auctorum sensus referandos institutæ, ipsæmet indigent eadem clavi, cujus usum e regulis petimus. Quid autem absurdius, quam petere lucem a tenebris, & linguæ intelligentiam querere a præceptis, eadem lingua nondum intellecta perscriptis? nihil gravius enim, vixit ærumnosius, quam ediscere prorsus ignota &c. Eadem apud sexcentos, qui sibi sapere videntur, repetita invenies.*

tradant : similiterque eos facere , ac si quis latinum hominem , græce discere cupientem , juberet græce scriptis præceptionibus uti . Hæc est prima reprehensio ; in qua novi isti doctores , præsertim exteri , cum se magnifice jactant , tum nobis prope contumeliose atque impudenter insultant . Quod ii vel non facerent , vel moderatius certe facerent , nisi Italorum plurimos sibi suffragaturos arbitrarentur ; qui quidem mini videntur , italici nominis ac suæ dignitatis obliti , turpissime ac pæne flagitiose exteris nationibus adulari : ita , quicumque novæ opinionis ex Anglia , ex Batavia , ex Gallia rumor afferatur , continuo excipiunt , amplectuntur , exosculantur : ut jam non modo vestimentorum atque epularum , sed etiam opinionum arbitria penes illas gentes esse videantur . Verum ego & exteris scriptoribus , & italici subscriptoribus ita respondeo : primum , latinæ linguæ non minimam partem non nisi latine posse nostris adolescentibus tradi : deinde , reliqua utilius latine , quam italice tradi . Etenim primo , qui possunt aliter , quam latine , aut nominum declinationes , aut verborum conjugationes proponi discantibus ? Quum vero iidem in componendis , inter seque comparandis nominibus omnis generis atque verbis a præceptoribus exercentur (quam exercitationem minus quidem latino , verumtamen recepto jam vocabulo *concordantiarum* appellant) quæro , num sit ullus aut esse possit vernaculæ linguæ locus ? Ergo prima hæc , quæ certe non minimam grammaticæ artis partem continent , ita ne-

cesse est latine tironibus proponi, ut, si aliter fieret, omnis iis esset ad linguæ latinæ cognitionem aditus interclusus: sunt enim totius artis quasi vestibulum. Atque hætenus quidem nos isti non reprehendunt: vident enim ita fieri necesse esse, neque vero se aliter facere intelligunt. Sed cur non reprehendant, siquidem sibi constare velint? An prima illa tam multa & nomina, in tot casus declinata, & verba, in tot tempora ac modos inflexa, quæ discere puerulos jubemus, latina non sunt? annon discantibus propterea etiam ignota? Ignota autem si sunt, cur non reprehendimur, qui non nota vocabula iis, quibus notam latinam linguam esse volumus, ediscenda proponimus? Nempe ob eam rem nobis hoc datur atque conceditur, quod ita ignota proponimus, ut tamen, adhibita continuo ignotorum interpretatione, ea ipsa, quæ ignota erant, nota faciamus. Ergo, quod prima illa elementa, discantibus ignota, interpretemur, recte possumus sine cuiusquam reprehensione ignota proponere: si vero reliqua ejusdem artis, ignota illa quidem, similiter discantibus interpretabimur, etiamne tamen reprehendemur? Vel nobis hoc quoque concedendum est, ut facere recte possimus; vel in primo illo castigandi corrigendique sumus. Fateor, latinæ linguæ præcepta a nobis non italico, sed latino sermone edita atque perscripta tradi: latinum sermonem esse discantibus ignotum intelligo. Quid tum? Annon interpretando fit notus? Non adsumus adolescentulis? non præsto sumus? non
fa-

facem in illis tamquam tenebris præferimus? nonne innotescunt, nonne illustrantur omnia? Quid igitur vetat, esse latinæ linguæ præcepta latine scripta, si non latine, sed italice italici hominibus traduntur? Etenim, si verum quærimus, ignoto sermone scripta est hæc ars, sed noto tradita. Quod si idem in lingua aut græca aut alia quavis fiat, idem plane consequi necesse est: ut omnino nihil græcæ linguæ exemplo ac similitudine, qua isti utuntur, urgeamur.

Sed videte, quæso, Florentini, quemadmodum isti se in eosdem laqueos, quos nobis injicere vellent, per summam imprudentiam atque adeo stultitiam induant. Edicunt uno omnes ore, latinas litteras discere incipientibus latinum esse aliquem scriptorem prælegendum atque explanandum (a). At in eo tamen deligendo haudquaquam eadem est omnium sententia. Alii, quibus iudicium in hac quidem re meum libens adjungo, Terentium, Cæsarem, Ciceronem, aut e veteribus illis aliquem horum similem reliquis esse anteferendos existimant. Alii, quod in his intelligendis plausculum negotiū adolescentulis fore arbitrantur, Ludovici Vi-

B 5

vesti

(a) Audiatur idem in eadem oratione Gravina: *Statin, inquit, ut puer flexiones nominum ac verborum simul cum aliis Grammaticæ rudimentis memoriæ mandaverit, ad scriptores est adducendus: eique, ut nobis olim discantibus mos erat, præbendus in primis Ludovici Vives nitidissimus atque utilissimus exercitationum libellus.*

vesii colloquia, Jacobi Pontañi progymnasmatata, ac, si superis placet, Æsopi fabellas, latine a nescio quo redditas, malunt. Atque has quidem fabellas (quas ego tirunculis minime omnium prælegi expedire censeo, non modo quod solœcis barbarisque vocibus sunt refertæ, quas si semel illa ætas didicerit, nulla deinde ætas fortasse dedicat; verum etiam quod illa narrationum, illecebra, quam quidam eam vim habere putant, ut sermo, quo eæ scriptæ sunt, altius puerorum mentibus infigatur, valere mihi potius videtur ad eorum animos ab eloquutione, quam potissimum spectare deberent, ad res ipsas, quæ narrantur, quibusque unice capiuntur atque oblectantur, avocandos) has, inquam, fabellas multis verbis, idque pluribus in locis suæ puero-rum institutionis, Lockesius, scriptor anglus, dilaudat. Si non in hac urbe, aut si in hac urbe, sed non apud vos verba facerem, verrerer, ne aliquem offendissem, quod Lockesium sine honoris præfatione nominaverim. In ea enim tempora incidimus, Florentini, ut quidam ægrius ferant, hæretico homini (nihil enim gravius dicam) non bene dici, quam catholico maledicî. Sed non id agimus, ut quemquam, quamvis fortasse meritum, insectemur, aut de temporum calamitate conqueramur. Hoc tantum dicam: tunc me æquo animo de re latina præcipientes, Italorumque in ea tractanda rationem ac viam reprehendentes, britannos homines auditurum, quum aliquid vere latinum, (quod jamdiu desideramus) ab se elaboratum

tum ad nos ex illo oceano suo miserint. Sed unde digressa est, revertatur oratio. Videtisne, doctores istos in præcipiendo latino aliquo scriptore, qui puerulis ad latinam linguam adspirantibus explanetur, convenire; in deligendo dissentire? Atque hoc ego minime miror, dissentire eos (*quot enim homines, ut est in veteri proverbio, tot sententiæ*): illud miror potius, eos convenire. Nam sane mirandum est, qui grammaticos eisdemque latinos libros e puerorum manibus unanimi consensu excusserunt, idque fecerunt ob eam causam, quod latine scripta ars a discentibus latinam linguam intelligi non posset, eorum neminem animadvertisse, ob eandem causam nullos omnino latinos scriptores ab se iisdem permitti oportere. Verum ita fit, ut, qui non ratione in reprehendendo, sed pravo aliquo studio ducuntur, ii sæpe non aliena, sed sua, vestigia non minus, quam aliena peccata reprehendant.

Quamquam ego non tam severe cum istis agam, quam ipsi nobiscum. Licet per me latinos scriptores, modo veteres ac probos, adolescentulis prælegant. Id ego & faciendum puto, & a nostris fieri etiam video. Licet etiam, si ita volunt, grammaticis præceptionibus, vernaculo, non latino sermone scriptis, utantur. Quin ego homo cæteroquin vehementer occupatus, tamen ut & illis morem geram, & discipulorum suorum utilitati prospiciam, Emmanuelis Alvari (nisi forte alterius docti Grammatici malunt) latinas institutiones faciam italicas, &, si paullulum

mente contendero, fortasse etruscas, atque adeo germanissime florentinas. Sed minime, opinor, hanc a me operam flagitabunt; quod sciant, Alvari quidem praecepta italice jam a pluribus esse conversa, passimque vulgata; reliquorum autem ab iis potius, qui eos sequuntur, quam a me, converti oportere. Quid? quod proxime superiore anno hac ipsa in urbe aureolus sane libellus, etrusco sermone ab eruditissimo viro, familiari meo, conscriptus prodiit, quo grammatica praecepta continentur, valde profecto pueris elementariis profuturus? Hoc sive alio quolibet, sed, si me audient, hoc potissimum, me non modo non invito, sed auctore etiam atque hortatore, utantur. Molestus eis certe non ero: neque unquam negabo, esse hanc etiam ad latinam linguam cognoscendam rectam & satis munitam viam. Sed nobis iidem, nostra in eos benignitate atque æquitate perspecta, benigniores se atque æquiores præbeant. Cur nos objurgant? cur reprehendunt? cur propemodum insectantur? cur latinis nostris libellis nos uti non sinunt? qui, quod latini sint, non modo, adhibito interprete, non obfunt, ut ostensum est, verum etiam, ut jam ostendam, non nihil profunt.

Etenim, Florentini, omnis istorum libellorum doctrina duobus tantummodo constat ac continetur, praeceptis atque exemplis. Exempla autem sunt e probatissimis quibusque latinis auctoribus petita: quibus ea, quæ in ipsis praeceptis tradita sunt, luculentissime confirmantur. Num etiam electissima veterum latinorum loca, discentibus a magistris explicata,

cata, obesse quidquam, ac non multum prod-
esse potius latinitati comparandæ possumus
dicere? Jam præcepta sunt illa quidem non
veterum, sed recentiorum: verumtamen eo-
rum, qui non recentibus, sed vetustis opti-
morum latinorum vocabulis utuntur. Min-
quidem in Alvari nostri (de uno dicam; quod
unus ex omnibus mihi fuerit ab ipsa pueritia
familiarissimus: non quod existimem, non
posse eadem vel certe similia de plerisque aliis
Grammaticis commemorari) in Alvari, in-
quam, nostri præcepta intuenti, nihil fieri
conciunius posse, nihil latinius, nihil elegan-
tius videtur: ut, si quis ætatis illius aureæ
artem Grammaticam rudium captui atque in-
telligentiæ accommodatam scribere voluisset,
prope existimem, non multo id fuisse melius
aut felicius præstiturum. Sed quia plerisque
major de Horatio Tursellinio (cujus multa ele-
gantissime, & ad veterum latinorum similitu-
dinem accedentia, scripta videre potuerunt)
quam de Emmanuele Alvaro opinio est; cujus
hominis non nisi hoc opusculum, quod puero-
rum manibus ac magistrorum teritur, existare
putant: faciendum est mihi, ut de tota hac
re ipse vos doceam.

Quod opusculum, Emmanuelis Alvari
nomine inscriptum, de re grammatica cir-
cumfertur, & in gymnasiis adolescentibus ex-
plicatur, id scitote rebus, quas continet, esse
Alvari; ipso rerum ordine atque compositio-
ne esse Tursellini. Nam quum Alvarus gram-
maticam artem scribere uberius instituisset,
sic ut nihil cognitione dignum præteriret.
Grammaticos omnes, qui ante se fuerunt,
tum

tum veteres, tum recentiores excuteret, eorum controversias omnes, quæ sunt innumerabiles, acerrimo iudicio expenderet, de eisque sententiam suam interponeret, opus quoddam excellens, atque opinione omnium doctorum absolutissimum confecit, magistris quidem apprime utile atque probatum; sed & mole grandius, & rebus ipsis, de quibus agebat, multis in locis subtilius, quam ut a discipulis facile & parari & gestari & tractari & intelligi posse videretur. Accessit eo, quod ipse lusitanus, in Lusitania scribens, nomen & verborum interpretationes suæ gentis hominibus accommodarat: ut ob eam etiam rem minus commode in italicas scholas induci liber illius posset. Jussus est ab iis, qui tum ordini nostro præerant, Tursellinius Alvari opus univèrsum retractare; atque efficere, ut italicis etiam pueris usui esse posset. Ille, quo erat ingenio atque doctrina, omnia perpendit, recensuit, digessit, edidit. Atque inde opusculum illud, quod Alvari nomine Tursellinius ipse, qui ex majori illo ejusdem opere concinnaverat, inscriptum voluit, habemus. Quorsum hæc? Ut intelligatis, quo in pretio illorum præceptorum latinitas atque elegantia habenda sit, quæ sunt ab homine, omnium eruditorum consensu, latinissimo elegantissimoque conscripta. Verum minime necesse est, ea præcepta esse eleganter exposita: fatis est, ne obsint, immo ut prosint etiam discipulis, non esse barbara. At erunt fortasse, inquiunt, aliqua aliquo in loco barbaræ. *Erunt fortasse?* O rem stultitiæ plenam, atque oppido ridiculam! scriptum aliquod
tam-

tamquam barbarum rejicere, non quod sine aliqua, sed quod *esse fortasse possint*, barbara. Hæc vos deprehendere, hæc patefacere, hæc, veluti contestata lite, accusare oportet. Defendemus. Quod si non poterimus, nos, nos, inquam, ipsi condemnabimus, locoque sine cunctatione movebimus, atque alia, quæ vos ipsi probetis, latina atque elegantia substituemus. Ita adolescentes nostri non modo latinæ linguæ præcepta, verum etiam plurima latina vocabula, quibus præcepta ipsa continentur, una eademque opera docebuntur. quod profecto utilius est, quam si sola ipsis ac tamquam nuda præcepta traderemus.

At certe, ajunt, tametsi præcepta tradi latine est utile, tamen tam obscure ac perplexe tradi non est utile. Quid autem obscurius, quid implicatius Alvari cæterorumque Grammaticorum versiculis?

Jam hæc ad alteram reprehensionem pertinent. Prima illa de latinis præceptis evanuit. Dabo operam, ut hæc etiam de versiculis evanescat. Quid autem est, quod debeat in nostrorum Grammaticorum versibus tantum novis istis doctoribus displicere? In Alvaro quidem (ut de hoc potissimum loquar) ii, qui propter operis difficultatem paullo, non dicam obscuriores, sed minus perpicui videri possint, ab Alvari hoste infensissimo Scioppio multum & sæpe laudantur; qui quidem illos & *absolutissimos & pulcherrimos* vocat. Reliquos autem recentiores latinos Grammaticos video aut versus illos ab Alvaro totidem verbis descripsisse, aut paullulum immutatos edidisse. Mihi quidem neque tum obscuri videbantur,
cum

cum puer olim ex magistri ore, illos in ludio interpretantis, pendebam, measque aures apollineo illo cantu mirifice mulceri sentiebam. Sed utrumne vos non animadvertitis, an vero dissimulatis, iisdem versibus explanationem suam singulis soluta ac plana oratione subjici? Una est atque eadem versuum & solutæ illius orationis sententia. Cui versus displicebunt, is enarrationes illas, omisissis versibus, nobis non repugnantibus, amplectatur. Neque enim ad præcepta cognoscenda necessarii sunt versus, sed ad illa jam cognita memoriter ac diu retinenda valde quidem accommodati. Habet enim nescio quid poetarum ille numerus ac modus ad memoriam vehementer firmum ac diuturnum. Mini certe aliquando de re aliqua grammatica inter loquendum scribendumve dubitanti, Alvarianos olim didicisse versus fuit sæpe utile. Fuiſſet etiam illi Alvari inimico Scioppio non incommodum, si non modo Alvari versus laudare, id quod fuit iudicii, verum etiam ediscere, id quod erat voluntatis, animum induxisset. Numquam certe, ut alia multa omittam, illa scripsisset: *Cam tempus futurum significatur, apud Plautum & Ciceronem usurpatum abhinc adverbium reperitur*; si Alvari versiculos illos neque obscuros neque implicatos meminisset.

Gaudet abhinc verbis exacti temporis.

Ergo

Natus abhinc annos vel centum dicimus annis

Verum tu, qui inutiles latinos nostros versiculos esse arbitraris, putasne, tuos italicos adolescentulis multum prodesse? Vereor, ne
si quos

si quos ex Claudii Lancellotti *Nova methodo* (quam *Portus regalis Grammaticam* vulgus appellat) etrusce ab nomine neapolitano red-dita , italique hominibus plus , quam est satis , commendata , vereor , inquam , ne si quos ex ea versiculos exempli causa attulero , videar & severitatis vestræ , Florentini , & meæ gravitatis oblitus . Sunt enim plerique , vere ut dicam , perridiculi : ut neque recitari , neque audiri sine risu possint . Accedit etiam , quod sunt ita hianter , ita hiulce , ita confragose , ita aspere compositi , ut valde mihi timendum sit , ne non possim eos memoriter atque expedite , sine lapsu aut certe hæsitatio-ne aliqua , pronunciare . Experiar tamen , sed ita , si ante (quemadmodum Poetæ Musas , ubi in aliquem operis sui insignem atque ad explicandum difficilem locum devenerunt , invocare solent) sic ego vestram opem mihi , in loco ad dicendum profecto difficili , vestrum-que auxilium implorem , atque ut mihi , si quando offendero aut hæsitaro , vestra huma-nitate adsitis , obtestor .

Regola de' Nomi in NS ed RS .

Tis NS RS induce .

Dis glans , nefrens , e lens brama :

Che pur libripens , frons ama ,

E gl' in S. che cor produce .

Quæ verborum ambages ? quæ ænigmata ? quæ rerum portenta sunt isthæc ? Dædalo heic aliquo , Oedipo , etrusco Lucumone est opus . *Tis NS RS induce* &c. Sibi ista quid volunt ? Italica sunt hæc ? an latina ? an utraque ? an neutra ? Equidem videbar mihi italicam linguam satis commode intelligere , latinam non admo-

admodum incommode , nunc a me video utramque plane ignorari . Hos vos versiculos vestros , novi doctores , extollitis ? latinos nostros deprimitis ? hos ad discendum faciles , illos difficiles , hos ad intelligendum perspicuos , illos obscuros ducitis ? Magnam quidem habeo , Florentini , puerilis illius ætatis meæ moderatoribus gratiam , sive potius Deo immortalis , qui me discere primas illas litteras ante voluerit , quam in Italia *nova* hæc *methodus* vulgaretur . Nam , qui latinam linguam , non latinæ modo , verum etiam italicæ plane rudis , latinis Alvari præceptionibus non plus biennio didicerim , *is* , si in novam hanc *methodum* incidissem , adhuc in *Tis* *NS* *RS* hærerem ; neque fortasse umquam e scyllæo illo tamquam scopulo emerissem . Atqui scitote , reliquos item illius artis versiculos , quibus de nominum declinatione ac de cæteris rebus præcipitur , eadem plerisque , nonnullos etiam majore sententiæ obscuritate laborare : id quod , si vel memoriæ meæ tantum fiderem , vel satietatis vestræ rationem non haberem , planum eorum recitatione facere possem .

Sed omittamus de versiculis dicere : quorum fuit levis fane reprehensio . Illa videamus multo gravissima , qua non jam tradendæ artis ratio , verum ars ipsa petitur , ac , nisi succurrimus , universa labefaciatur . Quod eos conari , qui sunt ipsi otiosi , nec quidquam vel possunt , vel audent de suo in rem grammaticam afferre , non est fane mirandum . Illud vero quis non jure miretur , eorum nonnullos , qui hanc ipsam *artem* scriptis voluminibus complexi sunt ,

sunt, sibi ipsos quodammodo obstrepere, de eaque libere fidenterque detrahere, atque ipsam, quantum in illis est, omnino convellere? Cujus equidem rei cum causam quaererem, hanc satis probabilem inveniebam, quod, cum suis illis artibus nullum fore inter celebriores satis honestum locum sperarent, invidia quadam commoti, bellum promiscue omnibus indixerunt, nec se jacere, modo adversarii sui non possent stare, recusarunt. De Gaspare quidem Scioppio illud memoriae proditum est, primo eum omni officiorum pollicitationumque genere a nostrae Societatis hominibus contendisse, ut suus, quem de arte grammatica conscripserat, commentarius in nostra gymnasia reciperetur: deinde, ubi petitionem suam repudiari intellexit, omnemque ambitioni suae obstructum aditum sensit, tum eum non in Alvari modo, sed in omnes omnium, atque adeo suas, grammaticas præceptiones invehi atque bacchari, tamquam furiosum, coepisse; *Mercuriumque* illum *bilinguem* (a), quem ex Hispania in Italiam nuper

(a) Prodiit hic liber primum Salmanticæ an. 1611. hoc titulo, *Janua linguarum, seu modus maxime accommodatus, quo patet aditus ad omnes linguas intelligendas . . . industria Patrum Hibernorum Soc. JESU, qui in collegio, ejusdem nationis, Salmanticæ degunt, in lucem edita*. Auctor ejus præcipuus fuit. Guillelmus Bateus: de quo vide Philippum Alegambem in Bibliotheca Script. Soc. JESU. Hunc librum Scioppius in Italiam attulit, & eden-

nuper attulerat, omnibus obtrusisse, atque ubique vulgasse: quo uno commentariolo adhibito, universam latinam linguam, duobus, opinor, mensibus, sine ulla præceptorum ope perfecte comprehendendi posse jactabat. Irrisa est semper ab omnibus, qui quidem communi sensu non carerent, hominis arrogantia: eorumque complures, qui post eum de re grammatica disputarunt, tametsi essent, æque atque ille, præceptis, tamquam minus necessariis, infensi; tamen non tam pernicio Mercurio illi talaria esse judicarunt, ut posset quemquam tam brevi tempore ad linguæ latinæ perfectam cognitionem ducere. Sed tamen iidem quiddam in eandem rem, non minus fortasse irridendum, attulerunt. Legistis enim profecto apud istos, (a) idque a multis, qui

edendum an. 1628. Mediolani curavit, inscriptum *Mercurius bilinguis*: cujus hispanicam interpretationem Alexander Tassonus, Virginius Cæsarinus, Guillelmus Moons italicam fecerant. De qua tota re vide libellum Hostilii Contalgeni, editum Florentiæ apud Franciscum Honuphrium an. 1672. De Scioppii autem ambitione videantur Alberti de Albertis Vindiciæ c. 14. §. 7. n. 119.

(a) De Præceptis grammaticis, præter cæteros, ita etiam sentit in eadem illa oratione Gravina. *Quibus addiscendis absimitur tempus, longe utilius, atque jucundius in vocabulorum explicatione, ac bonorum auctorum interpretatione traducendum. Etenim præceptis magis ad scribendum, quam ad intelligendum uti-*

qui non ineruditi putantur, dici atque jactari in vulgus auditis : *Latinam linguam non in Grammaticorum libellis, sed in veterum Latinorum scriptis esse discendam: in quorum lectione longe utilius, quam in præceptorum cognitione tempus collocari* (id quod gallicæ hispanicæque linguæ exemplo ajunt luculenter ostendi). *Satis esse præcipua quædam rei grammaticæ tamquam capita discentes doceri, reliqua per se ipsos in latinis libris cognituros: nunc, quod præceptis tantum tribuitur, in grammaticis scholis pueros consensescere, neque tamen satis umquam latinos evadere. Utinam vero, Florentini, non dicam consensescerent, sed saltem adolescerent; neque tam immaturi, ut vulgo fit, ad Rhetores, ad Philosophos, ad Jurisperitos mitterentur. Tum illi, mihi credite, & latiniores evaderent, & cumulatus reliquis deinceps facultatibus satisfacerent. Nunc, præpropere ista sive parentum sive liberorum festinatione, crudi quodammodo nobis atque acerbi traduntur: qui, ut alia possimus, maturitatem certe illam, quam ipsi afferre ad nostra gymnasia debuissent, conferre non possumus; neque eum propterea ex iis, ut ita dicam, succum, quem maxime oporteret, exprimere. Subacti ingenii, maturique judicii juvene, barbato denique, non cincinnato, nobis, qui superiores artes ac graviores disciplinas profitemur*

utimur. Stultum est autem irretire præceptis ignorantem adhuc vocabulorum sensum & usum, qui legendis tantum arripitur explicandisque scriptoribus,

mur, est opus. Sinite ergo, finite, hæc tamquam poma, quantum est necesse, in cel-
lis grammaticis maturefcere: matura deinde
ad nos, ingenti litterarum utilitate bonoque,
mittite. Quod si tamen properatis, neque
ullam, licet necessariam, ferre moram pote-
stis, quodvis vobis compendium potius, quam
hoc ab istis doctoribus indicatum, vestræ isti
festinationi accommodatum fore putate. Ni-
hil enim scitote esse longius, quam ista lati-
norum legendorum via, præceptis omissis, in-
cedere. Nam, si nihil præcepta ad discendi
celeritatem adjuvarent, profecto latini ipsi illi
veteres, qui eloquentiæ laudem expetebant,
in scriptoribus suis dumtaxat legendis consti-
tissent: quos tamen ad publicas scholas itasse
scimus, ut *rationem latine loquendi*, quam,
auctore Fabio Quintiliano, (a) *Methodicæ*
appellabant, a Grammaticis docerentur. Er-
go illi, qui latinæ linguæ scientiam ac co-
gnitionem cum nutricularum lacte quodam-
modo fugebant, negligenda sibi tamen præ-
cepta non putabant: nos alienam linguam,
ac jamdiu intermortuam, una lectione libro-
rum celerius, quam præceptorum conjunctio-
ne, percipi posse arbitramur? Certe docto-
res italos videmus ita grammatica præcepta
in scholis tradere, ut non minorem curam
in explanandis latinis scriptoribus impen-
dant; quorum etiam scripta ad verbum edi-
fcere memoriterque pronunciare discipulos
jubent, quin ipsa præcepta, plerumque bre-
vissima, plurimis latinorum veterum locis
alla-

(a) *Quintil. lib. I. Instit. c. 15*

allatis confirmant : ut , ne tum quidem , cum aliquid præcipiunt , puerorum oculi ab illis exemplaribus avertantur . Hæc tamen tam assidua , tam diligens latinorum lectio , cum latinæ linguæ præceptionibus conjuncta , latinitatis cognoscendæ spatia haud ita multum contrahit . Quid si præcepta fierentur ? quid tum tandem futurum putatis ? Nam gallicæ quidem linguæ atque hispanicæ (quo isti nituntur exemplo) dispar est ratio . Vocibus illæ ab italica multum differunt , non multum sane syntaxi , itaque cognosci voces est ferme satis : cognoscuntur autem non præcipiendo , sed legendo . At vero latina plurimum ab italica & vocibus distat & syntaxi . syntaxis autem non in unius aut alterius , sed in omnium latinorum scriptis est longe lateque diffusa : ut propterea necesse sit , vel omnia illorum scripta ab unoquoque legi , ex iisque syntaxin ipsam erui atque depromi (quod & magni ingenii , & acerrimi judicii , & immensi laboris , & longissimi temporis est) vel præcepta (quibus universa syntaxeos ratio brevissime traditur atque explicatur) latinæ linguæ studioso cognoscenda . Utrum igitur malumus , incredibili temporis operæque compendio ad latinæ linguæ cognitionem pueros pervenire , an improbo sane labore per omnes latinitatis auctores diu , & aut nullo aut certe exiguo cum fructu , vagari ? Inest profecto , Florentini , quiddam in hac arte grammatica Geographiæ simillimum : cujus quidem discendæ duplex est *g*ia ; altera longior ac difficilior , loca ipsa
ter-

terrarum per se obire, eaque diligenter notare: altera brevior atque expeditior, eadem ab aliis obita ac notata loca in tabulis librisque descripta cognoscere. Atque illud quidem impigri multi sollertesque viri fecerunt; qui, orbis regionibus peragratis, locorum descriptionem litteris prodiderunt: quorum sic nos itineribus laboribusque adjuvamus, ut jam Geographiam discere sedentes possimus. Immensa (quod non ignoratis) sunt artis grammaticæ spatia; *cujus* quidem quemadmodum M. Tullius ait (a), *pæne infinita vis est atque materia*. Hunc tamquam orbem grammaticum, ejusque dispersas regiones atque oras plurimi industrii atque ingeniosi homines perlustrarunt; veteresque historicos, oratores, poetas, omnes denique latinos scriptores (ne græcis quidem prætermisiss, ex quibus latini sunt) adeundos sibi ac penitus cognoscendos existimarunt. Ex hac diuturna ac laboris molestiæque plenissima peregrinatione tandem ad nos veluti postliminio redeunt, tum universam rei rationem, tum singulas partes, omnia denique scitu dignissima, ab se in longis illis itineribus animadversa, otiosis hominibus ac domis sedis descripserunt, quasdamque, si ita loqui fas est, grammatico-graphicas tabulas, a se diligenter confectas, ediderunt. Has cognoscere quantuli laboris, quam non diuturni temporis est, si cum illa omnium scriptorum peruestigatione comparetur? Has igitur nos adolescentulis

(a) Cic. l. l. de Orat. c. 10.

tulis cognoscendas ediscendasque proponimus. Isti peregrinationum auctores respuunt, adspernantur, rejiciunt: jubentque, vix pedibus ingredientiens puerulos, vix vestigiis suis insistentes, impatientes laboris, cunctantes, timidos, rerum, locorum atque hominum ignaros, ingenii viribus infirmos, tamquam e patrio littore novos quosdam Jasones, Columbos, Vespuccios solvere, perque omnes grammatici orbis oras ac littora circumferri, & diu multumque jactari: unde cum se olim domum receperint, non aut vellus quoddam aureum reportent, aut novas a se detectas regiones nuncient, sed eam grammaticam doctrinam, notam jamdiu ac pervulgatam, quam domi parare facile ac brevi potuissent, ad nos senes jam facti referant. Sed utri magis discantibus ac litteris consulamus; istine, qui unam latinorum lectionem probant, an nos, qui præcepta cum lectione conjungenda esse existimamus, non est, opinor, obscurum. Hæc habui, Florentini, quæ pro italicis scholis, & pro italis grammaticæ artis doctoribus contra novos obtrectatores disputarem. Utinam, qui omnium Italorum gratiam hoc mihi patrocinio comparaturum sperarem, non alicujus in me odium atque offensionem concitem. Erunt enim, fortasse, qui, ubi hanc a me pro veteribus atque domesticis institutis contentionem susceptam fuisse rescierint, totum hoc consilium meum improbent atque reprehendant: homines nimirum ex eorum numero, quibus vetera omnia præ recentibus, domestica ac

nostra præ alienis ac peregrinis sordent. Quod si acciderit, equidem, quod non omnibus satisfacere potuerim, moleste feram; sed illa me tamen re consolabor ac recreabo, quod sim usus vobis, cum attentis orationi meæ, tum, quod conjicere atque intelligere ex significatione vestra potui, sententiæ æquissimis. Tibi certe, Pontifex amplissime ac sapientissime, rem a me gratam profecto atque jactandam factam esse confido, qui ea linguæ latinæ præcepta, tibi olim puero in hoc ipso lyceo tradita, ejusmodi fuisse ostenderim, ut meliora non sint postea a recentioribus magistris inventa; ac propterea tibi, ad illa summa, quæ in omni doctrinarum genere consequutus es, properanti, nullam fuisse moram grammaticis illis nostrorum hominum institutionibus allatam. Dixi.



ORATIO III.

51

PRO LINGUA LATINA

HABITA FLORENTIÆ

IDIBUS JANUARIi MDCCXXXVI.

CORAM

FRANCISCO MARIA MARTELLIO
ARCHIEPISCOPO.



DIU multumque, quod non ignoratis, Florentini, ab eruditissimis viris quæsitum est, italicæ latinæ, an italicæ latina lingua præstaret. Etsi autem in utramque partem multa sint sane graviter & copiose ab illis doctioribus disputata, nulla me tamen re impediri arbitratus sum, quo minus ego, quamquam cum illis neque ingenio neque doctrina comparandus, in eadem quæstione, versarer. De qua quid sentiam, ex hac ipsa oratione mea, quam sum habiturus, cuique vos, si quando, alias, maxime & attentos & benevolos esse oportebit, intelligetis. Plura præfari me hoc tempore neque necesse est, &, propter dicendarum rerum vim atque copiam, vehementer esset & mihi & vobis incommodum, sed mihi præsertim, qui febricula etiam confidior, ob eamque causam hæc non memoriter neque stans, ut hujus loci consuetudo fert, sed de scripto sedensque recitare sum jussus.

Sed, antequam ad italicæ linguæ cum latina contentionem venio, quædam mihi

necessario de linguis generatim dicenda sunt ;
 quibus hujus ipsius rei , quam quærimus ,
 cognitio , & universæ controversiæ tamquam
 æstimatio continetur . Quod si ii quoque fe-
 cissent , qui tantis partium studiis in eadem
 quæstione tractanda ante me versati sunt
 plurimi , id fortasse attulissent , quo uno
 allato ac stabilito , reliqua est deinceps omnis
 facilis atque expedita conclusio : neque ho-
 minum eruditorum mentes , qui tamquam
 disceptatores atque arbitri ad rem cogno-
 scendam ac dijudicandam ab illis actoribus
 advocati sunt , nihil certi adhuc , quod se-
 qui possent in re tam ancipiti obscuraque ,
 habuissent ; neque toties , ut in judiciis so-
 let , ampliandum pronunciaissent . Illud igi-
 tur ante omnia ponendum est in oratione
 ejus , qui linguam aliquam commendandam
 præ reliquis atque efferendam suscipit , id-
 que omni vera ratione confirmandum : unam
 esse omnium linguarum atque eandem vim
 ac naturam ; neque ullam ulli sua ipsius
 dignitate , sed hominum opinione præstare .
 Hoc viri eruditissimi sententia mea , ac cæ-
 teroquin acuti , non viderunt . Putarunt , suam
 inesse quibusque linguis insitam ac nativam
 pulchritudinem , gravitatem , suavitatem ,
 splendorem , venustatem , magnificentiam :
 quæ dotes in quibus aut omnes aut plures
 essent , eas linguas præferri cæteris oportere .
 Atque hætenus quidem res mira animorum
 consensione , nulla sententiarum varietate
 bellissime procedebant . At vero , ubi eo de-
 ventum est , ut quæreretur , in qua potissi-
 mum lingua talia ornamenta reperirentur

rupta

rupta continuo fides, abalienati animi, commissa pugna: vociferatio, rixa, diffidium sempiternum. Nam, cum omnes inter se de summa re dissentirent, in eo tamen mirifice consentiebant, ut, quam quisque linguam defenderet, sive græcam, sive latinam, sive etruscam, sive gallicam, sive hispanicam, sive aliam ex iis, quibus humanæ gentes utuntur, eam reliquis & graviolem, & suaviorem, & splendidiorcm, denique omnibus partibus meliorem dicerent: disputandique finis is esset, qui ferme solet, ubi studii cujusque, non veritatis, patrocinium suscipitur, resque non subtiliter, nec ad vivum refecantur, sed leviter, ac pingui Minerva, ut ajunt, aguntur, ut in sua quisque opinione obfirmatioi pertinaçiorque discederet, seque unum sapere, cæteros errare ac desipere arbitraretur. Possumusne verum aliquando, atque hujus disputationis exitum invenire? Possumus placare animos hominum iratorum, eoque infestius inter se depugnantium, quo sese justius plerique putant pro patriæ linguæ gloria ac dignitate arma sumxisse? Possumus Etruscos Gallis, Gallos Hispanis, præsertim vero Latinos & iis, & reliquis, qui de linguæ principatu contendunt, conciliare; & efficere, ut, depositis simultatibus, unam omnes principem deligant, atque ita suam non esse principem fateantur, ut nulli tamen de dignitate concedat? Possumus, ut opinor; & profecto præclara res est, & digna, in quam, quidquid possumus, conferamus.

Ac mihi quidem in humanas res in-

ti, & hominum diversa studia atque instituta contemplanti, verissimum esse illud videtur, quod etiam proverbii loco jactatur: orbis alteram partem, orbis alteram item partem contemnere atque irridere. Nam, ut omittam de ædium, vestimentorum, epularum, officiorum, rituum rationibus ac generibus admodum dissimilibus dicere, quorum tamen cuique sua maxime probantur, ac reliquis sive honestiora, sive commodiora ferme videntur: id ipsum in linguis quam late pateat, possumus intelligere. Licet unicuique in re minime obscura, quam fit hoc verum, secum ipsum reputare. Ego, quid mihi haud ita ante multos hos menses acciderit, dicam. Nam, cum animi causa ligusticam oram lustrarem, & Lavaniam, quod oppidum ad mare jacet, forte venissem, nec longe lapicidinas, toto orbe celebratas, in proximis montibus esse scirem, eo me visendi studio contuli. Omnia sane mihi jucunda ac grata acciderunt; præsertim cum & iis, qui me deducebant, & iis, qui in operis erant, humanissimis, ac singula sciscitanti comiter atque affatim respondentibus uterer. Unum modo me pupugit, fecitque, ut, eo me venisse, propemodum pœniteret. Cum enim jam fatis oculos animumque & videndo & cognoscendo expleissem meum, cœpi, more hoc nostro atque urbano, paullo pluribus verbis gratias tam bonis hominibus agere. Vidissetis, Florentini, montanos illos incolas furtim inter se adspicere, mirari, ad etrusca illa verba & vestræ similem syllabarum appellationem
hor-

horrescere, tenere vix risum aut etiam sibi-
lum. Tum mecum egomet: Nempe, in-
quam, non idem est ubique linguis honos.
qui etrusce loquimur, ligustice loquentes
irridemus; illi nos: fortasse injuria; sed
tamen rident. Rideri autem cur malim,
quam probari? Itaque, ut me illis darem,
mutato repente sermone, & pronunciandi ra-
tione conversa, cœpi ligustice ligustica ver-
ba conjungere, atque ita reliquum gratia-
rum actionis absolvere. Quid quæritis? Us-
que eo id illis gratum accidere animadver-
ti, ut & mihi gratularentur, quod tam su-
bito resipuissem, ac barbarum illum sermo-
nem, quo initio uti cœperam, abjecissem;
& me inquinatissime corruptissimeque loquen-
tem, & vaste ac rustice, quantum pote-
ram, pronunciantem faustis omnibus ad ma-
re prosequerentur.

Quid? hoc mihi accidit primum, ut eo
sermone utens, qui bonus ac commodus ha-
beretur, irriderer?

*Barbarus hic ego sum, quia non intel-
ligor ulli:*

Et rident stolidi verba latina Getæ
ajebat ille (a) apud barbaros exfulans la-
tinus poeta. Verum & ille aliquando resi-
puit; &, ne latine apud non latinos loquens
irrideretur, didicit getice, immo & scripsit;
atque ita demum probatus est:

(b) *Ab! pudet; & getico scripsi sermone
libellum,*

(a) Ovid, l. 5. Trist. El. 10.

(b) Idem l. 4. ex Ponto El. 13.

Struſtaque ſunt noſtris barbara verba modis.

Et placui (gratæ mihi) cæpique poetæ

Inter inhumanos nomen habere Getas.

At vero barbarorum modo atque agreſtium eſt bonos ſermones irridere, quibus eſt ſuus malus: humanæ gentes ac cultæ bonis parcunt, malos dumtaxat infeſtantur. Quid igitur? Cum aliquando, ut fieri apud vos etiam arbitror, in ſcenam veneti hominis, aut bergomatis, aut bononiensis, aut neapolitani, aut vero etiam galli, hiſpani, germani perſona inducitur; putatis eorum ſermonibus plaudī, ubi tota theatra riſu, cachinnis, ſibilis perſonant? An ſunt harum gentium ſermones mali? An florentini inhumani, qui non malos ſermones irrident? Quid? Cum alii item populi par pari, ut ajunt, referentes, ad pulpita florentini perſonam hominis evehunt, & ſimili plauſu ac clamoribus excipiunt: num aut eos barbaros atque inhumanos, aut ſermonem veſtrum agreſtem atque ridiculum eſſe dicemus? Ergo & humaniſſimæ gentes, non modo barbaræ atque agreſtes, bonos ſermones adſpernantur; &, ſi quis propterea fermo ab alia gente non probatur, aut etiam irridetur, non continuo efficitur, eſſe eum malum. Verum hoc totum quale ſit, poſt viderimus. Nunc illud teneamus, plurimam unamquamque gentem ſermoni ſuo tribuere, alienum ferme irridere. Jurene omnes? dicet aliquis. Ex quo tandem iſtuc quæritur? Ex mene, an ex iis ipſis, de quibus quæritur? Si ex illis; nulla ſe id non jure facere affirmabit: ſi ex me; omnes injuria
id

id facere confirmo. Quid ergo? Omnesne in errore versari dico, nec omnium offensionem vereor? Ego vero tum omnium potius offensionem vererem, si vel unam aliquam, vel omnes non errare dicerem. Nunc autem cum errare omnes dico, sperare potius videor, omnium me gratiam initurum, quam vereri, ne alicujus in me offensionem concitem. Nam, si illud dicerem, nemini, nisi forte uni, satisfacere possem; cum quidem singulæ recte ac jure id se solas facere contenderent. Cum autem hoc dico, *errare omnes*, nulla mihi irasci, nulla non favere debet; qui non competitricibus suis honorem eum, quem sibi uni deberi unaquæque testaretur, sententia mea detulerim. Ajo igitur, bona cum omnium non modo venia, verum etiam, ut spero, gratia: injuria sermonem quemvis a quoquam despici; nec suum cujusque (id quod institueram dicere) alieno ulla vi sua præstare, sed esse omnes (modo sermones sint, hoc est, vocibus, quibus tandem vis, ad significandas res, atque animi sensa depromenda, non careant) esse, inquam, omnes inter se pares; neque ullam sive gravitatem, sive suavitatem, sive splendorem, sive ejusmodi aliam dotem ex iis, quibus vulgo linguæ commendari censentur, in ipsis linguis inesse. Peto a vobis, Florentini, ut ne me putetis, levitate aliqua aut ambitione progressum, jactare ac profiteri id, quod vel falsum judicem, vel certe ejusmodi sit, ut nimis acutis atque exquisitis rationibus, longeque a communi sensu abhorrentibus, probari posse videatur. Non

is ego sum, qui sophistarum rationem atque institutum ferre in aliis, nedum in me ipso probare possim. Sic semper intellexi (id quod a sapientissimis viris accepimus) neminem in oratorum numero esse habendum, qui non sit, non quidem nomine, verum re ipsa philosophus: homini autem philosopho turpius nihil esse, nihilque tantæ sapientiæ professione indignius, quam, non dicam errare (id est enim humanum) sed, quem esse errorem senseris, amplecti, &, quod ferendum est minus, in aliorum animis ac mentibus insinuare. Si vero est aliquid, quod verum iudices, sed ejus probandi rationem non satis firmam habeas atque explicatam, id usque eo continendum puto, quoad certiora atque apertiora pervideas; vel, si efferre velis, id in gymnasiis, atque in privatis doctorum cœtibus possis, in concionem certe afferri non oportere. Itaque utrumque profiteor vobis, Florentini, & iudicium animi mei atque sententiam in hac quæstione allaturum, & omnia aperte, dilucide, bonaque cum fide acturum. Atque utinam, quemadmodum ego, animo maxime aperto & simplici & bono, sum ea dicturus, quæ dicam, sic sperare possem, parem mihi omnes, qui me audituri sunt, voluntatem benevolentiamque præstituros. Nunc vereor, ne quis jam mihi succensere, ac propemodum irasci cœperit, & ne jam nunc apud se destinet, eundem animum reliquæ deinceps omni rationi adhibere. Putabit enim, me hoc fuisse, ut contra etruscam linguam disputem, eamque ex eo dignitatis gradu, in quo
sua

sua & multorum sane sapientissimorum hominum opinione, sita est, hac mea contentione detrahā. Quod non ita est, mihi credite, Florentini, &, si quis aliter putat, is & me minime novit, & rem ipsam parum attendit. Nam neque ego tam sum furiosus atque amens, ut, si maxime sentirem, etruscam linguam omnibus de dignitate concedere, tamen velim, in hac urbe, quod semper omnium bonarum artium, præsertim vero elegantissimi sermonis, domicilium est habitum, apud florentinos homines, qui suæ linguæ semper primas detulerunt, homo peregrinus atque advena hanc invidiæ plenam, atque offensionis controversiam, commovere, &, non modo nulla utilitate proposita, sed magno etiam meæ famæ atque existimationis periculo, esse tam impudens: neque rursus id, quod de linguis me esse dicturum proposui, est ejusmodi, ut, si vel omnibus apertissimeque probaro, quidquam propterea de etruscæ linguæ gloria ac laude detrahatur. Nam, ut omnes sermones vi sua sint atque ipsa natura pares, illud tamen relinquitur, ut alter alteri extrinsecus adjectis atque attributis dotibus præstare possit (quemadmodum, si queam, quod fortasse queam, metallorum omne genus par esse sua ipsorum dignitate demonstrare, nequaquam illud effecero, ut non aurum tamen præ reliquis opinione atque approbatione hominum maxime commendetur): nec, si non inest in ipsis linguis gravitas, si non suavitas, si non splendor, idcirco, qui iis uti velit, non

potest non graviter, non suaviter, non splendide dicere. Hoc totum cuiusmodi sit, planius est jam atque enucleatius explicandum.

Ego enim sic existimo: quemadmodum homo, si, ut homo est, consideretur, hominì nequaquam præstat; quod omnes eadem sentiendi atque intelligendi vi, qua sola homines sunt, æque polleant: ita linguas, si per se ipsæ spectentur, modo verbis, ut supra dictum est, ad quasque res significandas, animique fensa depromenda (cujus unius rei causa primo sunt institutæ) (a) idoneis non careant, in eodem omnes dignitatis gradu esse ponendas. Atque idem confiteor, esse tamen alias aliis, opinione atque existimatione hominum, præstantiores: non secus omnino atque ipsi homines sua ipsorum opinione aliis sunt alii nobiliores. Sed neque linguarum præstantiam illam, neque hominum hanc nobilitatem rerum ipsarum natura facit, sed, quemadmodum dictum est, opinio. Tolle opinionem; fient continuo omnia paria: neque erit omnino quidquam, cur aut hominem hominì, aut linguam linguæ præstare dicas. Jam, quod ad hominum nobilitatem pertinet, sic ipsi inter se homines convenerunt, ut, qui illustribus parentibus, avis, majoribus ortus esset, hunc nobilem ducerent, hunc obscuro loco natis anteferrent, huic plurimum observantiæ atque honoris haberent. Cur ita convenerint, si ex

(a) Cic. pro Cæcina c. 53. si (voluntas) tacitis nobis intelligi posset, verbis omnino non uteremur: quia non potest, verba reperta sunt.

si ex me quæris, vel nescire me dicam, vel dici a me hoc tempore non oportere. Non enim nunc id agitur, ratione id fecerint, quæve fecerint; sed omnino fecerint necne: fecisse autem certe dubium esse non potest. Linguas item similis hominum opinio ac voluntas, non natura moderata est: ut eæ principes habeantur, quibus hominum quidam cœtus, quas Gentes & Nationes appellamus, principatum deferre maxime voluerunt. Quæ in re tamen id esse eos potissimum sequutos possumus animadvertere, ut, quæ linguæ scriptoribus optimis abundarent, præferrent eas ferme reliquis. Ita Græci atheniensem, Latini romanam, &, ut temporibus propiora videamus, Galli parisinam, Hispani castellanam, Itali florentinam, aut certe etruscam prætulerunt. Nempe, cum viderent, ex iis sive civitatibus, sive gentibus existisse quamplurimos summis ingeniis præditos, & doctrinis maximis instructos, qui suam quisque linguam studiose ac diligenter excolerent, eaque sive in optimarum artium tractatione, sive in earumdem ratione hominibus tradenda, uterentur; eam esse omnium præstantissimam judicarunt, in eaque sibi esse maxime elaborandum censuerunt, quam summi illi viri potissimum delegissent, quaque eorum præclara cogitata atque omnis doctrina contineretur. Videtis igitur, quod familiarum nobilitati majores, hoc linguarum dignitati conferre scriptores (a). Quo quid con-

(a) In hoc Varchius pag. 160. Edit. Flor.

conficitur? Nempe illud, quod supra posui: si consensu hominum eæ linguæ reliquis prælatæ sunt, quibus excellentes scriptores esse usos viderunt, non vi sua atque natura linguas linguis, sed ipsorum hominum opinione ac voluntate præstare, ac propterea, si per se ipsæ spectentur, esse omnes inter se pares.

Video, Florentini, nec vero dissimulabo, quid dici contra hanc conclusionem possit: consensu quidem hominum ac voluntate factum esse, ut præferrentur eæ linguæ, quæ meliores, quam aliæ, scriptores haberent; sed potuisse scriptores ipsos eam linguam potissimum deligere, quæ sibi sive melior alia, sive omnium optima videretur, & effet.

Si potuit hoc fieri, si etiam factum est, non possum recusare, quin causa continuo cadam. Verum ego neque factum esse, neque fieri potuisse contendo. Nam quid putatis? Ciceronem, exempli causa, latinam linguam, Petrarcham etruscam, bonos item scri-

1730. fui Herculani a uobis non dissentit: *Le lingue nobili non è dubbio, che hanno non mica l'essere, ma l'esser nobili, o altramente che chiamare le vi vogliate, dagli scrittori: In reliquis ab eo ego dissentio: Considerando, che se una lingua non fosse tale, che gli scrittori si potessero servire, e onorare di lei, eglino, se non fossero stolti, non vi scriverebbono dentro, si può dire in un certo modo, che le lingue facciano gli scrittori.*

scriptores alios alias earum, quas ab iis illustratas, & tamquam nobiles factas, eruditisque hominibus commendatas fatemur, delegisse potissimum atque usurpasse, quod eæ reliquis meliores essent; an ideo reliquis eas factas esse meliores, quod ab iis delectæ potissimum atque usurpatæ sint? Equidem hoc alterum verissimum judico: primum illud omnino falsum. Etenim, cum se linguarum nobilitatis principes illi atque auctores, ad scribendum contulerunt, linguas eas, quibus usuri scribentes erant, jam tum existisse atque adeo in ore vulgi, rudes illas quidem atque impolitas, verumtamen satis instructas, omnique vocabulorum genere abundantes, versatas esse celebratasque quis nescit? Neque enim earum conditores illi, sed usurpatores fuerunt: neque eo sermone scripserunt, homines nimirum acuti & callidi, qui, siquidem eum sibi ipsi suo Marte peperissent, a nemine posset intelligi. Id modo unum sibi permitti quosdam voluisse video, ut, si quando eas res tractare cœpissent, quas nemo ante in eodem sermone attigisset, certa quædam vocabula ab iis sermonibus, quorum erant usu protrita, necessario mutuarentur, aut etiam alia sui ipsorum sermonis propria, leviter immutata innovarent. Hactenus, quia facere aliter non poterant, licere sibi ab usitato sermone recedere existimarunt. At vero, ubi hæc summa necessitas aberat, usque eo usitatarum vocum tenaces, latini præsertim, erant, ut, si quando usitatam quidem, sed minus vulgo frequentatam usurparent, veniam quodam-

dammodo præfarentur, illis aut illarum similibus utentes formulis : (a) *sic enim jam loquuntur : si hoc verbo uti possumus, &c.* atque etiam, si novum aliquod (quod fortasse erat non novum, sed tamen ipsis, ut sæpe accidit, inauditum) ab aliquo induci verbum audissent, vitiosum ducerent, graviterque reprehenderent. Quod, ut alia omit- tam exempla, quæ multa sunt, in M. Antonio, qui *piissimum* nove dixerat, Cicero- nem (b) fecisse scimus. Quod si aliqui non ita religiosi aut in novis inducendis, aut in vetustis vocibus iunovandis fuerunt (quales poetarum nonnulli, in primisque Dantes Aligherius inter italos fuisse existimatur) id neque tam sæpe fecerunt, ut vocum, sive novarum sive innovatarum, ratio magnopere sit habenda ; neque non necessitate ipsi etiam aliqua, sive rhythmici, sive metri, sive convenientiæ inter se syllabarum extremarum consonantiæque coacti fecerunt : & certe non tam illis laus tribuitur, quod id fecerint, quam venia, quod necessario fecerint, datur. Eo igitur sermone, qui esset in ore vulgi, scriptores optimos esse usos intelli- gimus. At multum tamen inter scriptorum & vulgi sermonem interesse constat. Mul- tum? Immo vero plurimum. Atque adeo hoc

(a) Cic. pro Sextio c. 115. *Et, ut ipsi loquun- tur, favore.* Acad. quæst. libro 4. c. 6. *Corpus, & quasi qualitatem quamdam nominabant. Dabitis enim profecto, ut in rebus inusitatis utamur verbis inusitatis.*

(b) Philippi. 13. c. 43.

hoc ipsum satis signi est, quidquid, præter significandi vim, habent bonitatis linguæ, adscitum id esse, non insitum, ab scriptoribus habere, non a natura: ut proinde, si vulgi sermo, a bonis scriptoribus usurpatus, sit melior, confitendum sit, non ideo bonos scriptores alios alias linguas delegisse atque usurpasse, quod eæ reliquis meliores essent, sed ideo factas eas esse reliquis meliores, quod sint a bonis scriptoribus delectæ atque usurpatæ.

Quid mihi tu igitur gravitatem, quid splendorem, quid suavitatem, quid admirandam tuæ linguæ pulchritudinem prædicas? cur illam tantopere amplexaris, & tamquam filiolarum deoscularis tuam? quid te mihi molestum offers? quid meas obtundis aures? quid te jactas magnificeque circumspicis? quid peregrinos insectaris? quid irrides? quid barbaros vocas? Nemo est barbarus lingua, sed moribus. Nulla non lingua gravis, nulla non splendida, nulla non suavis, nulla non pulchra est, si quis eam modo probe calluerit, eaque uti vel loquendo vel scribendo scienter possit (a). Itaque, si quemvis despectissimum fer-

(a) Cic. lib. 2. de Orat. c. 146. „Eæ (res & sententiæ) vi sua verba parient; quæ semper satis ornata mihi quidem videri solent, si ejusmodi sunt, ut ea res peperisse videatur. Et lib. 3. c. 177. Non enim sunt alia sermonis, alia contentionis verba, neque ex alio genere ad usum quotidianum, alia

fermonem homo poliundæ orationis non ignarus assumferit, eumque artificio quodam extrinsecus adhibito, quo & minus plebejas voces deligat, & quas delegerit, apta inter se compositione collocet; præsertim vero rebus amplis, magnificis, gravibus, non minutis, non humilibus, non ineptis adjungat; modo propriis, modo translatis utatur; denique omnia, quibus excultæ jam linguæ maxime commendantur, in sua illa excolenda conquirat: si quis, inquam, talis artifex despectissimum quemvis sermonem, ita, uti dictum est, excoluerit ac perpolierit; hunc necesse est, & gravem, & splendidum, & suavem, & pulchrum haberi. Quod quidem ipsum licet etiam e contrario intelligamus. Nam, si excultum jam atque ab aliis perpolitum sermonem quemvis rudis homo atque hujuscemodi artificii ignarus

alio ad scenam pompamque sumuntur: sed ea nos cum jacentia sustulimus e medio, sicut mollissimam ceram ad nostrum arbitrium formamus & fingimus. Itaque tum graves sumus, tum subtiles, tum medium quiddam tenemus. Sic institutam nostram sententiam sequitur orationis genus, idque ad omnem rationem & surium voluptatem & animorum motum mutatur & vertitur. Et lib. 3. de Fin. c. 19. Cum de rebus grandioribus dicas, ipsæ res verba rapiunt. Ita fit cum gravior, tum etiam splendidior oratio. Et de Orat. l. 3. c. 125. Si est honestas in rebus ipsis, de quibus dicitur, existit ex rei natura quidam splendor in verbis.

rus usurpet, levem, abjectam, invenustam, ingrathamque hujus orationem ferre quis potest? ut omnino bonos, qui putantur, sermones malorum scriptorum non minus adspernemur, quam malos bonorum expetamus. Atque hoc quidem in genere scio, mediolanensi sermone, quo multa Carolus Maria Magius elegantissime scripsit, & me & alios vehementer esse solitos delectari. Neque tamen admodum eleganter loqui Mediolanenses existimantur. Quis sermo magis, quam Ligurum, nostris quidem auribus inconditus atque absonus habetur? Eum tamen Paullus Folietta vario scriptorum genere mirifice exornavit. Cavallus vero ex eadem gente, homo ingenii felicissimi, atque ad omnia, quod de Catone dictum accepimus, versatilis, ad eam pulchritudinem ac venustatem patriam linguam suis scriptis evexit, ut illa (fidenter dicam) possit tali scriptore freta, cum quavis ex elegantissimis de dignitate certare. Quid? si pari ingenio ac facultate homines eamdem novorum & multiplicium scriptorum genere tractandam excolendamque susciperent? Nonne necesse esset, eam brevi tempore in pretio atque in existimatione, addo etiam in usu esse? Nam qua ulla ratione alia, aut græca, aut latina, aut etrusca in hanc gloriam, in qua nunc sunt, celebritatemque venerunt? Sed & illa, & pleræque italicæ, miseræ atque infelices, nimirum jacent; carent luce; neglectu hominum atque fastidiis obsolescunt. Non eas alieni expetunt, quod suis contenti sunt: non sui adjuvant; vel quia desperant,

rant, se quidquam profecturos, vel quia utilius putant, magisque e re litterarum publica, & privata sua fore, si, quas frequentari celebrarique a plerisque sapientibus viris vident, eas quoque ipsi colant.

Atque hoc quidem non singulorum hominum, sed universarum nationum judicium, quæ suas linguas negligunt, ut probatas jam atque receptas amplectantur, quid valeat, Florentini, mecum, quæso, considerate. Intelligetis profecto, non eam linguam, quæ patria cujusque sit, sed quam potissimum sapientes viri probaverunt, quæque est & publicis litterarum, & privatis litteratorum hominum rationibus maxime profutura, esse & præstantissimam & reliquis omnibus anteponendam. Nam, si patria, vi sua aut dignitate aliqua, valere posset; si cæteris aut gravitate, aut splendore, aut suavitate, aut alia præcipua ipsius dote præstaret: posset hoc nobis fortasse concedi, ut patriæ linguæ caritatem & cujusvis auctoritatem & quavis utilitate potiorē duceremus. Cum vero nulla in linguis præcipua insit ac sua dignitas, sed sit omnium par vis atque una conditio; cumque aliæ tamen aliis communi sapientum virorum consensu, & certa quadam atque insigni utilitate præter cæteras commendentur: quid causæ sitis justæ afferre quisquam potest, quamobrem non, nisi patriam, suspiciat ac colat, cæteras vero despiciat ac negligat? Sed suum licet quisque judicium de se ac de suis rebus sequatur: erret sane sibi: periculo suo, quoniam ita vult, peccet. Cur
tu

tu etiam mihi sapientissimorum hominum iudicia reprehendas? cur te interponas? cur eorum auctoritatem apud me valere tua interpellatione non sinas? cur me quoque, hominem simplicem, rerumque ignarum, in errorem inducas? cur mihi eum fructum, qui ex cognitione talium linguarum percipi potest, inideas? Habeto tu tibi tuam, quam optimam iudicas: me patere, magnas quasdam utilitates sequentem, sapientum iudiciis stare.

Intelligitis, ut opinor, Florentini, quid in hac re mihi displiceat, quid reprehendam, quid probare non possim, & quos hæc mea significet, & quamquam tacita, satis appellet oratio. Nam quosdam profecto fuisse in Italia, atque esse etiamnum scitis, quos tantum ac tam perversum suæ linguæ studium tenuerit, hodieque teneat, ut ei non satis se facere posse arbitrarentur, nisi latinæ, non unius (ut sunt ferme cæteræ) sed omnium gentium iudiciis & ipsa utilitate probatissimæ, horribile ac nefarium bellum indixissent. Quid heic ego vobis in eam olim dicta, quid scripta, quid facta commemorem? cum quidem alii inopem atque egentem; alii rudem atque impolitam; alii & dictu asperam, & auditu infuavem esse criminarentur. Stilus etiam in miseram atque immerentem a crudelissimis latronibus acuebatur; illique, tamquam hominum generi perniciosæ, & puerilis præsertim ætatis in scholis grammaticis corruptrici, vis indignissima afferebatur. Excutebantur e manibus ingenuorum latini libri;
ita-

italici subjiciebantur, atque illi maxime, quibus ejus salus, nomen ac dignitas liberissime petebatur. Armabatur in matrem filia: cui quidem impia tela ab impurissimis prociis ministrabantur. Jactabatur in Italia, in Italia inquam, regno olim suo, illa gentium atque imperiorum princeps, quæ leges orbi universo dixerat, quæ humanitatem feris gentibus invexerat, cujus sapientia atque institutis sunt hominum semper mores exculi: neque tantam illi Gothorum immanissimæ gentes, e Ponto erumpentes, atque in Italiæ pestem ac vastitatem effervescentes, obscuro ore, ac barbaris moribus perniciem importarunt, quantam isti, in Italia nati atque alti, dictis, scriptis ac factis suis per summum scelus atque immanitatem afferre voluerunt. Nec nihil vero tanto sunt furore ac tantis contentionibus consequuti. Si non vitam, quam petebant, ademerunt, at cruenta quædam certe spolia reportarunt. Viluit post ea reginæ ac principis linguæ apud nonnullos auctoritas: restincta sunt illa animorum, quæ prius fuerant, incensa studia: plurimum operæ italicis litteris, minimum latinis dabatur: minoris perfectum latinum gravis hominis atque eruditi poema, quam italici quattuordecim hendecasyllabi inepti amatoris æstimabantur: nobilium ædes atque aures italicis cantiunculis patebant, latinis aut versibus aut orationibus erant obstructæ. Quid agerent boni viri, ac bene de litteris sentientes, non habebant. Vocem latinam publice mittere, ratio non erat; acclamatione

ne enim multitudinis imperitæ , atque conviciis compressa esset : latina porro abjicere , & sua & majorum judicia damnare (qui tantum in iis operæ studiique posuissent , quibusque auctoribus ac principibus in Italiam post longum exilium veluti postliminio rediissent , sive potius diu extincta atque sepulta iterum in hanc lucem , & in hujus cæli spiritum adspectumque venissent) sane nolebant . Quid facerent ? Sibi & musis , id quod restabat unum , canebant : libellos suos posteritati reservabant ; quam mox , & sibi & latinis æquiores , spe quadam inani falsaque inducti , exorituram augurabantur .

O hominum prudentissimorum minime vera rerum futurarum auguria ! o spem fallacem ! o vanas atque inanes cogitationes ! Nondum desæviit , Florentini , temporum illorum tamquam procella : adhuc in miseram latinam linguam tota passim Italia acerbissime debacchatur . Nova successit veteri ætas : sed ingenium , quod olim fuit , Italorum manet . Faveant , adulantur , blandiuntur , & , si hoc etiam verbum expectatis , linguæ lenocinantur suæ . Unam esse tamquam virgunculam , omnium elegantissimæ formæ , unam decoram , unam expetendam , unam , ut ita dicam , procandam putant . At vero latinam , tamquam ætate jam grandi effoetam anum , turpem , rugosam , edentulam , deliram , averfantur , respuunt , derident , exhibitant , insectantur . Quid litteratorum hominum conventus , quas Academias vocant , nullo non in Italiæ angulo instituti , num , nisi ad italica recitanda ,
at-

atque audienda celebrantur? Ecquem jam Italorum non propemodum pudet latinum aliquid in ejusmodi conventus afferre? Libri vero si qui eduntur, nonne plarimi sunt italico, vix aliqui latino sermone conscripti? Quia etiam permulti Italorum sunt, qui italice latina ipsa perscribunt; quique ob eam rem modo videntur latinam linguam didicisse, ut latina scripta perditum eant, & ne omnino nos latinis ullis litteris indigeamus, immo ne discere, aut unde aut quæ didicerunt ipsi, possimus. Nam, quo illa tanta nonnullorum latinos veteres, eos præfertim, quorum est frequentior in gymnasiis usus, italice interpretandi cura studiumque pertinet, quidve est tandem effectura, nisi ut paullatim latina scripta, tamquam minus jam necessaria, negligantur; iisque neglectis, ex quibus omnis latinæ linguæ cognitio petitur, olim homines latine nescire cogantur? Et vero, quantam perniciem putatis juventuti latinitatis studiosæ, quantam industriæ moram esse allatam; quantam desidiæ animis, quantamque securitatem, istis istorum interpretationibus, ingenera tam? Qui si id agunt, ne sint otiosi, ne omnino nihil agant: pergant, per melicet, latinorum scripta italice interpretari: edant etiam interpretationes istas suas, si volent. Ineptos libros modo emere non cogaris, edi ab suis auctoribus ferre animo æquo possis. Verumtamen eo negotii sui fructu contenti sint: hanc exstare otii sui rationem satis habeant: nihil præterea petant, nihil sibi arrogant: neque putent, se quid-

quidquam vel latinis litteris non nocere, vel italicis interpretandi ista ratione professe.

Namque hanc scitote, Florentini, assertum ab istis interpretibus, tum a reliquis italicis, non latino, sermone scribentibus causam, cur id faciant, quod nempe plurimum & homines itali italicis scriptis adjuvantur, & italicum nomen italicis quamplurimis scriptoribus illustretur. Nam latina quidem, inquit, ignota sunt italibus, neque vero, nisi & longo tempore, & multo labore nota esse possunt. Cur non igitur potius latina ista italice hominibus italibus proponamus, atque ita eos labore discendi latinam linguam levemus, & celerius ad doctrinarum cognitionem ducamus? an latini græce latinis hominibus scribebant? an non græca in latinum transferebant? an non plane id agebant, ut græcis litteris non indigerent? an non græcorum omnem doctrinam ad se transtulerunt? an non ita immortalem sibi gloriam compararunt, præclare de litteris ac de litteratis meriti, qui quidem non modo suos, verum nos etiam præstantissimas quasque facultates suo, hoc est, noto sermone docuerunt? cur non idem italibus permittatur? cur non ita scriptorum & multitudine & præstantia italicum nomen italibus liceat latinorum exemplo illustrare?

Jam est apertius, quam ut testificatione mea indigeat, Florentini, istos, qui hæc loquuntur, latinæ linguæ non decus, sed caput, ut ajunt, petere. Auditis enim, & industriam in ea addiscenda vituperari, &



latinorum, qui latinis contenti essent, exempla commemorari: quasi vero (ut hoc primum causæ firmamentum labefactare incipiam) aut ita latini sua adamarint, ut græca contemserint, aut ita latina perfecerint, ut eadem græcis non indigerent. Quod si umquam latini contenti suis esse potuerunt, fuit id certe per ea tempora, quibus Tullius, Virgilius, Horatius, alique præstantissimi scriptores floruerunt: quorum tum doctrina tum sermonis elegantia factum est, ut illorum illam ætatem Auream nominaremus. Atqui Tullium ad Demosthenem, Virgilium ad Homerum, Horatium ad Pindarum, alios item ad alios ex græcis scriptoribus totos se contulisse scimus; eosdemque romanis ac latinis hominibus fuisse auctores, non exemplo modo, verum etiam voce, ut græcorum volumina diu noctuque sibi putarent manû esse versanda. Erat jam Æneis illa, divinum hominis opus, toto Latio vulgata, & latinorum omnium testimoniis (quorum nonnulla consignata litteris ad nos usque pervenerunt) iudiciisque comprobata. ex Homeri tamen tamquam fluentis haurire ad usus suos necessaria latini poetæ non desistebant. *Adspice Meoniden* (eorum ingeniosissimus atque elegantissimus quidam dicebat) (a) *Adspice Meoniden: a quo, ceu fonte perenni, Vatum Pieriis orarigantur aquis.* Exacta autem aurea illa felicitque ætate, cum nihil Latio deesse videretur, quod quidem ad liberales quasque disci-

(a) Ovid. Am. 3. El. 2. v. 11.

disciplinas pertineret, quod non ab suis ipsorum scriptoribus & tractatum & perfectum esset: græca tamen studia a latinis non modo non negligebantur, verum a prima usque pueritia diligentissime colebantur. Ex quo illud est Quintiliani, (a) rhetoris sane doctissimi: *A sermone græco puerum incipere malo . . . quia disciplinis quoque græcis prius instituendus est, unde & nostræ fluxerunt*. Mirari igitur satis non queo, potuisse italicæ linguæ amatoribus idoneos videri latinos, quorum exemplo itali ad latinam linguam negligendam, & suam modo frequentandam uterentur: cum illos tum quoque, cum satis multa eaque perfectissima haberent, græcis tamen esse usos videamus. Nam illud, opinor, non dicent, meliora facta esse ab italibus latina, quam ab latinis græca sint facta, quod si dicerent, quis non eos risu potius, quam oratione esse refutandos putaret?

At certe, inquiunt, multa græcorum in latinum sermonem romani homines convertebant. Primum nescio, an tam multa ea fuerint, quam putatis, & quam multa sunt ea, quæ vos ex latino in sermonem italicum convertistis. Sed fuerint sane. Quid tandem id ad rem pertinet? Num, si quando hoc fecerunt, non utilitatem aut suam aut suorum sequuti sunt, sed græcarum litterarum interitum (quod vos de latinis, in latinis convertendis, cogitatis) & desuetudinem inducere voluerunt? Quædam ex

D 2

græ-

(a) L. I. c. 2.

græco fermone Cicero in latinum transtulit; Arati Phænomena, Xenophontis Oeconomica, Platonis Timæum; eaque admodum adolescens, annos vix tres & viginti natus. Qui quidem exercitatione id consequi modo voluit, quod se quoque adolescentem alia quadam non dissimili esse assequutum L. Crassus apud eundem Ciceronem libro primo de Oratore testatur: *Postea, inquit, mihi placuit, eoque sum usus adolescens, ut summorum oratorum græcas orationes explicarem; quibus lectis hoc assequebar, ut, cum ea, quæ legeram græce, latine redderem, non solum optimis verbis uterer, & tamen usitatis, sed etiam exprimerem quadam verba imitando, quæ nova nostris essent, dummodo essent idonea.* Id ipsum ego christianum illum Ciceronem, Paullum Segnerum (cujus hominis, non mea tantum, sed omnium doctorum sententia, quò similiores, eo meliores itali oratores evadunt, tantumque ab summi perfectione, quantum ab Segneri imitatione, recedunt) id ipsum, inquam, spectasse arbitror: quem Ciceronis in Verrem orationes septem, quas habemus, non modo multum & sæpe legisse, atque adeo descripsisse, sed etiam etruscas fecisse memoriæ proditum est. eodemque consilio usum præstantissimum poetam Torquatum Tassum Virgilii Æneidem italice reddidisse (id quod scriptum apud nonnullos video) existimare debemus. Hoc ego non reprehendo. italice scripturis utile est, quemadmodum olim latinis latine græca convertere, sic iis horum latine scripta, italica interpretando facere.

ne-

neque vero ipsi modo, verum iis etiam, qui latine nesciunt, est id vehementer utile: cuius similem utilitatem, si qui latine olim græca interpretati sunt, sibi etiam proponere potuisse non nego. Verum hæc tota atque huiusmodi interpretandi ratio quam vim tandem habet? num eam, ut parvi eum sermonem faciamus, qui est in alium interpretatione conversus? immo eam, ut magni eos ipsos sermones æstimemus, in quibus convertendis, sive ad suas, sive ad suorum utilitates, doctissimorum interpretum industria elaboravit. Quantum igitur ad neglegendam latinam linguam valere debet, quod isti dicunt? latinos homines fuisse latine græcorum scripta interpretatos. Quasi ea re illi italici licentiam dederint, italicis suis solum interpretationibus, omissis latinorum scriptis, utendi.

Quid? illa multumne valent? nimium & laborem in latinis addiscendis, & tempus impendi: cui incommodo italicis litteris occurri. Videte, quantum inter meum atque istorum iudicium intersit, Florentini. Ego enim sic statuo: multo esse ad diuturnitatem longius, multo ad laborem molestiamque gravius, si vernacula lingua, quam si latina, doctrinæ artesque tradantur. Etenim, si hoc fiat, satis est latinam linguam ab litterarum studiosis perdisci: id quod labore certe aliquo, at non admodum improbo, at non sane diuturno consequi non hebes neque indiligens quivis potest. Fac autem, in earumdem litterarum tractatione a singulis quibusque gentibus linguam usur-

pari vernaculam . Pro Deus immortalis ! quis tanta mentis acie præditus reperietur , qui non animum plane despondeat , a studioque doctrinæ deterreatur , ubi sibi (siquidem velit eruditionem etiam peregrinam , atque exterorum hominum doctrinam non ignorare) præter vernaculum , græcum etiam , latinum , hebraicum , illyricum , persicum , polonicum , arabicum , anglicum , scoticum , hybernicum , batavum , germanicum , hispanicum , gallicum , italicum , omnes denique omnium scriptorum sermones esse cognoscendos intelligat ? Certe , qui vel ipsos latinos græce , non latine , scripsisse mallent , ut homines studiosi unam modo linguam , non duas , ut nunc fieri necesse est , discere cogerentur , id optant , quo multum profectum humani ingenii imbecillitati , in hac vitæ brevitate , consuleretur . Isti autem misericordes homines atque humani , ut nos labore latinam linguam discendi levent , tum latinam ipsam nos discere , tum reliquas omnes præterea cogunt .

Quid ? quod majorem etiam , quam nobis , laborem posteritati atque onus imponunt ? Vere enim ait Horatius :

*Ut Silvæ foliis pronos mutantur in annos ;
Prima cadunt : ita verborum vetus interit-
etas ,*

*Et juvenum ritu florent modo nata , vi-
gentque .*

Quod sane ita esse & latinæ linguæ , & italicæ ipsius , denique omnium , quæ sunt aut fuerunt , tam multis vicissitudinibus , quas non longis annorum intervallis contingisse

gisse constat, plane omnes intelligunt. Ergo, si italica quoque hæc, quæ nunc viget, quamque isti nos unam discere, ne alias cogamur, volunt, confectis aliquot sæculorum cursibus, obsoleverit, atque adeo interierit; novaque in Italia atque alia plane successerit (qualis italica hæc ipsa latinam olim excepit) quid illam futurorum hominum prolem, in alia tum lingua natorum, facturam, o vos vernacularum patroni, putatis? probaturosne eos italicam hanc, quæ hoc quidem tempore popularis est, nobisque vernacula? Qui poterunt? Si vere dicitur id, quod certe dicitis, solas esse vernaculas quibusque gentibus probandas, non poterit illa posteritas hanc, quæ sibi vernacula non erit, certe probare; nec volet, vestra auctoritate argumentisque commota, laborem & tempus in aliena lingua consumere: suo ipsius sermone doctrinas omnes artesque perscribet. Quid tum huic vestræ fiet, quam tantopere deperitis, pro qua tam vehementer laboratis? vestris sententiis, vestroque, ut ita dicam, gladio misera jugulabitur. Quod si hanc quoque vestram, quæ venturæ illi posteritati vernacula non est futura, probari tamen ab ea, usurparique malletis: cur vos latinam, quod nobis non sit vernacula, esse nobis improbandam statuitis? cur non hanc potius vestræ illi posteritati, egregiis doctrinis instructam, transmittitis; ne ea, præter vernaculam suam, ipsamque latinam, atque alias omnes, etiam hanc vestram discere majore certe cum labore ac temporis impendio cogatur?

Non moventur homines pertinaces, ac propemodum inhumani. perstant italicam hanc & iis, qui nunc vivunt, & iis, qui victuri olim sunt, præter cæteras omnes, ac præcipue latinam, commendare. ad latinos ipsos provocant; & latinorum judicio latinam ipsam linguam posse condemnari putant. ajunt enim: Latinos non græce, sed latine scripsisse: Italos propterea non latine, sed italice scribere potissimum oportere. In quo illud primum reprehendendum est, quod negant, latinos græce scripsisse. constat enim, qui id præclare se facere posse arbitrarentur, facere non omisisse. fecit Lucius Lucullus (a); fecit T. Pomponius; fecit M. Tullius; fecit Acilius; fecit Ælianus (b); alique nonnulli fecerunt. Sed certe non multum græce romani homines latineque scripserunt. Cum enim eruditissima græcorum natio egregias omnes maximeque liberales disciplinas non tractasset modo, verum etiam mirifice scriptis illustrasset suis, non putarunt, quidquam se nomine romano dignum in eodem scribendi genere posse præstare; neque noctuas, ut græco proverbio dice-

(a) De Luculli historiis græce scriptis Cic. ad Attic. lib.1. Ep.19. De T. Pomponii græco commentario Cic. ad eundem l.2. Ep.1. De Acilio Cic. l.3. de officiis c.115.

(b) Claudius Ælianus Prænестinus (ex Suida) græce scripsit variam historiam, & historiam de Animalibus: quem Philostratus l. 2. de vitis Sophistarum affirmat, extra Italiæ fines numquam fuisse egressum.

dicere consueverant, mittendas esse Athenas censuerunt. Accedit, (a) quod romano spiritu superbiaque elati, non quid alieni, sed quid sui de se existimaturi essent, laborabant. itaque eo fere sermone scribebant, qui a suis, non qui aut a græcis aut ab aliis gentibus, quarum erat illis vulgo despectum nomen, intelligeretur. Denique id maxime spectabant, ut Græcis, quorum opes fregerant, imperiumque terra marique sustulerant, litterarum quoque gloriam adimerent. Quid simile in Italis? Num, si latine scripserint, timent, ne ob eam rem aut non sive a suis, sive ab exteris intelligantur, aut eorum scripta, tamquam vulgaria ac minus necessaria, repudientur? Scribant, modo ita, uti oportet, hoc est, polite atque sapienter: nec dubitent, quin plurimis doctissimisque hominibus ea, quæ scripserint, expetantur. Etenim, si ratio omnium erudi-

D 5

to-

(a) Atque hinc illud M. Antonii apud Cic. l. 2. de Orat. c. 153. *Semper ego existimaui, jucundiorẽ & probabiliorem huic populo oratorem fore, qui primum quamminimam artificii alicujus, deinde nullam græcarum rerum significationem daret. Atque ego idem existimaui, pecudis esse, non hominis, cum tantas res græci suscipere, profiterentur, non admoveere aurem, & si palam audire eos non auderes, ne minueres apud tuos cives auctoritatem, tuam, subauscultando tamen excipere voces eorum, & procul, quid narrarent, attendere.*

torum, qui ubique terrarum sunt, ineatur, multo esse plures hoc tempore, qui latina intelligunt, latinisque litteris delectantur, quam romanorum florente republica, reperientur. Græca tum maxime apud omnes fere gentes celebrabantur, latina, ut ait Cicero pro Archia, suis sane exiguis finibus continebantur. Quid ergo est? cur isti italice, non latine, & scribunt ipsi, & ab italibus omnibus scribendum censent? Illud est profecto, id spectant, id moliantur, id agunt, ut Latinis eam scriptis suis præripiant litterarum gloriam, quam Latinos Græcis adimere voluisse paullo ante commemoravi. O homines cum stultissimos, tum vero etiam maxime ingratos! hancine vos Latinis, vestris majoribus, referre gratiam, ut, a quibus tantam rerum omnium gloriam accepistis, quantam exteræ gentes prope jure vobis invideant, de eorum vos gloria minuenda, atque adeo extinguenda, cogitetis? sicine vos mortuorum voluntatem negligere, & eorum conceptæ spei atque expectationi non satisfacere, ut, siquidem imperium, quod vobis reliquerunt, retinere non potuistis, ne sermonem quidem, exiguum illam quidem, sed tamen unam reliquam tanti patrimonii partem, conservare velitis? quæ (malum!) hæc est tanta perversitas! quæ hæc tanta importunitas! quod hoc tantum rerum avitarum, domesticæque memoriæ fastidium! quid faciant alieni, si tam sunt sui in suos ingrati, tam remissi, tam dissoluti?

Sed stultitiam etiam hominum, Florentini,

tini, confiderate. Scilicet tam bene est re-
 bus italicis, ea sunt tempora, ea spes osten-
 ditur, ut galli, hispani, germani, angli,
 reliquæque nationes exteræ latinarum lit-
 terarum curam ac cogitationem abjiciant,
 quo sese impensius italicis dedant. Ab his
 nimirum majores quasdam, quam ab illis,
 utilitates se esse consequuturos sperant; &
 ita italicum hoc nomen suspiciunt, ut præ
 illo latinum, atque adeo suum, contemnant.
 Numquam sane externi homines, qui in ita-
 licis litterarum monumentis operam aliquam
 studiumque ponerent, defuerunt, nec vero
 deerunt: quod itali quoque in illorum co-
 gnoscendis multi fecerunt, suntque facturi.
 Verum hoc tantum popularium linguarum
 studium, & hæc nonnullorum patrio sermo-
 ne scribendi sive voluntas, quod ita ma-
 lunt, sive necessitas, quod latine non pos-
 sunt, facit, ut & illi nostris, & nos illo-
 rum litteris indigeamus. at certe utrique
 malle debemus, ut, quæ cognita sunt omni-
 bus profutura, ea ab omnibus non ignoto,
 ut cuique sunt fere peregrini, sed noto,
 qualis latinus est, sermone scribantur. Quod
 si jam non plurimum latina valuerint, si
 patrius alicujus gentis sermo est in latini
 locum aliquando regnumque venturus, ci-
 tius profecto, in hac tanta exterarum gen-
 tium colluvione, in tam crebra dominorum
 mutatione, tamque repentinis rerum itali-
 carum ac tantis conversionibus, quantas &
 legimus & audivimus & meminimus &
 videmus, dediscant Itali italice, & peregri-
 no nescio cujus exteræ nationis loqui ser-

mone condiscant, quam ut italicum sermonem exteris nationibus invehant. Sed superi meliora. Vigebit, vigebit inquam, italicus in Italia sermo, nec ullo umquam tempore, aut ulla peregrinitate delebitur. Et vigeat sane: nam & copiosus est, & commodus, & summis ingeniis excultus atque perfectus, & certe nobis, sive italis, sive inter italos agentibus, necessarius. Verumtamen latino plurimum tribuat, nec cum illo de dignitate contendat: qui, quemadmodum ostensum est, sua vi atque natura nihilo inferior est, omnium vero gentium opinione, atque ipsa utilitate, multo superior. Dixi.



BIBLIOTECA NAZIONALE
ROMA
DEI MANUSCRITTI
ORATIO IV. 85

PRO SCHOLIS PUBLICIS PRIMA

HABITA FLORENTIÆ

XVII. KAL. FEBRUARIAS MDCCXXXVII.

CORAM

FRANCISCO MARIA MARTELLIO

FLORENTINÆ CIVITATIS ARCHIEPISCOPO.



Uum animadverterem, Florentini, publicas per Italiam scholas gravi ac diuturna apud nonnullos infamia flagrare; eoque rem pæne adductam viderem, ut non nisi privata intra domesticos parietes adolescentulorum institutio probaretur; idque non modo publicis doctoribus injuriosum, verum etiam doctrinis ipsis esse maxime infestum intelligerem; rem ipsam ad vos, tamquam ad legitimos quosdam, disceptatores æquissimosque judices, deferendam, causamque tot hominum honestissimorum, tot illustrium gymnasiorum, litterarum denique ipsarum esse mihi ex hoc loco suscipiendam putavi. Quod si hanc tam malam de scholis publicis opinionem ipsi sua sponte itali homines suscepissent, suaque in hac re, non aliorum judicia atque auctoritatem sequerentur; fortasse alio orationem, meam convertissem, atque huic omni causæ ac contentioni supersedissem. etenim Italorum ingeniis, & in re litteraria constituenda atque ordinanda prudentiæ tantum tribuo, & ab omnibus tribuendum puto, ut, quo-

quoties de litteris agatur, quas ipsi e Græcia arcessitas apud se omnium principes collocarunt, & gentium barbararum colluvione deinde extinctas ad vitam longo intervallo revocarunt, revocatasque usque ad hoc tempus summa cum earum suæque dignitate retinuerunt, nemo mihi aut cuiquam gravior esse auctor debeat. Italos, Italos inquam, bonarum litterarum parentes, de litterarum ratione præcipientes, & sive vetustas consuetudines tollentes, sive novas inducentes, æquo animo, immo & libenti feram. Illud vero ferre quis possit? submitti quotidie e transalpinis transmarinisque regionibus non modo archetypas illas comendi capitis, totiusque corporis vestiendi ornandique arbitras, & modestiæ gravitatisque italicæ corruptrices pupas, verum etiam levissimos quosdam, & non nisi stultitiæ atque impudentiæ plenissimos libellos; quibus non dicam (id, quod vere dicere graviterque possim, si theologi doctoris personam agere, non rhetoris velim) credendarum a christiano pioque homine, faciendarumque rerum summa convellitur; sed certe (id quod theologo minus dolendum est, verum italo rhetori deplorandum est magis) Italorum sapientissima ac vetera doctrinarum instituta, atque universa humanitatis tradendæ ratio libere aperteque reprehenditur atque emendatur. Atque ut intelligatis, quæ isti in publicis Italiæ, atque adeo omnium gentium gymnasiis, & quam sine ulla satis probabili ratione, reprehendant: colligam prius ac breviter recensere criminationes eorum omnes;

omnes; tum singulis, quam accuratissime planissimeque potero, respondebo. Si qui autem in hac frequentissima lectissimaque concione adsunt, qui, sive eorum, quos contra dicturus sum, auctoritate permoti, sive suo ipsorum iudicio persuasi, cum illis sentiant: peto ab iis, ut ne me putent (postremum quidem omnium, qui non modo in hac urbe, sed in universa Italia sunt, verumtamen publicum præceptorem) hoc publicarum scholarum patrocinium ob eam rem deferere debuisse, quod ipsi obrectatorum nostrorum numero accreverint, ac, tamquam auxiliaria ex Italia manus, in castra externorum hostium advenerint. Quod si licere sibi arbitrantur, institutum hoc totius Italiæ publice docendi criminari, nosque ipsos, qui in eo versamur, reprehendere: interdictum nobis existimare non debent, quo minus reprehensi rationem facti nostri reddamus, & gravissimas nostrarum scholarum criminationes depellamus. Quos quidem ego confido, si me diligenter æquisque animis attenderint, non modo mihi hujus defensionis meæ veniam daturos, sed etiam sensuros nobiscum, & ex adversariorum præsidiis perfugas in nostra castra venturos.

Publicarum scholarum gravissima hæc isti esse ajunt incommoda: primum, quod delectus fieri magistrorum non possit, sed, quoscunque fors obtulerit, atque adeo minus etiam aliquando idoneis volenti discere sit utendum: ii autem ipsi ne tamdiu quidem possint, quamdiu discentium utilitas requirit, retineri; sed sæpe sint in medio cursu
amit-

amittendi, cumque aliis, nonnumquam deterioribus, commutandi. Deinde, quod tam multis auditoribus, quot ad scholas publicas confluere vulgo solent, unus sufficere doctor nequaquam possit: qua etiam ex re fieri, ut diutius, quam necesse sit, iisdem in scholis discipuli detineantur. Tertio denique, quod in tanta omnis generis juvenulorum multitudine ac contubernio non nisi pessime bonis moribus consulatur. Videtis, tria esse omnino crimina ab istis in publicas conjecta scholas: primum de genere doctorum: alterum de diuturnitate docendi: tertium de moribus.

Heic ego, si paucis agere, totamque criminationem una interrogatiuncula, tamquam machinam aliquam uno impulsu, labefactare velim atque pervertere, facile possum, Florentini. Quæram enim: si vere ista dicuntur; quinam fieri potuerit, ut publicis e scholis tam multi in omni temporum memoria doctissimi sanctissimique viri prodirent? Namque, ut ne ex hac urbe discedam, & ne non modo viuentes nullos (qui multi sunt, civitatis lumina, & litterarum græcarum latinarumque decus ac columen) sed ne mortuos quidem ullos, quos nosse plerique vestrum non potuerint, nominem: duo certe paria, quæ instar multorum esse possint, utrumque singulare atque excellens, sed alterum in altero genere præstantius; Benedictum Averanium, atque Antonium Mariam Salvinium, Thomam Bonaventuram Gherardescam, atque Aloysium Mariam Strozzam ex hoc ipso gymnasio, quod mihi
nunc

nunc est concreditum ac commendatum, memoria hac nostra vidimus existisse. Possem etiam illa commemorare, quæ valere certe multum deberent: apud omnes paullo humaniores gentes nullo non tempore publica gymnasia discere volentibus patuisse: tantamque hujusce rei, præsertim apud Romanos illos veteres, auctoritatem ac veluti religionem fuisse, ut plurimæ ex condiscipulatu, arctissimæque necessitudines in omnem deinceps reliquam vitam constituerentur. Tum quærerem: num aut in hujusmodi gymnasiis instituendis errasse, aut, semel institutis, non incommoda, si quæ erant, postea vidisse, aut, si vidit, non ea, sublatis ipsis gymnasiis, corrigere voluisse tota antiquitas judicanda sit? Hæc ego omnia prætermit- tam; satis illa quidem firma per sese atque illustria, verumtamen, propterea quod nimis universe dici viderentur, non perinde, ut ego velim, ac res ipsa postulat, pondus apud nonnullos atque auctoritatem habitura.

Placet igitur pedem, quod ajunt, propius conferri, & singulas criminationes suis ac propriis responsionibus refutari. Ac primo quidem, quod queruntur, magistrorum delectus tolli, eligendique optimos quosque potestatem adimi, iisque necessario esse utendum, non quos maxime probaverimus, sed quos fors ipsa in publicis scholis obtulerit: quid, si optimos quosque fors ipsa in publicis scholis offerret? num magistrorum delectus illos, eligendique liberam potestatem magnopere desiderari oporteret? Atqui
sic

fic se res habet : ut optimi quique magistri fere non nisi in scholis publicis reperiantur . In quo nonnullorum eripiendus est error , qui ita putant : docendi rationem optimam sic esse cum summa doctrina conjunctam , ut ab ea separari divellique non possit ; nihilque inter doctum hominem , atque doctorem interesse ; ut , qui maxime doctrina excellat , idem maxime sit ad docendum accommodatus . Id est longe secus . Doctos ego homines possum quam vis multos proferre , qui se ipsi tamen minime idoneos ad docendum & agnoscent & fatebuntur . Laborem hæc res præcipuum quemdam , ærumnas maximas , incredibiles molestias affert : innumerabiles discipulorum ineptiæ , stultitiæ , nequitiae devorandæ sunt : levitas , garrulitas , ferocitas , tarditas , cessatio ferenda est . Qui se non ante animi invicta quadam patientia tolerantiaque munierit , is , quamvis doctus sit , non poterit hoc munus diutius sustinere : quin immo , quo erit ipse doctior atque ingeniosior , hoc se minus esse aptum adolescentulorum ingeniis excitandis atque instituendis intelliget . Magis enim discipulorum tarditate aut negligentia commovebitur . Nam , ut præclare Tullius (a) . *Quo quisque est sollertior atque ingeniosior , hoc docet iracundius . Quod enim ipse celeriter arripuit , id cum tarde percipi videt , discruciat .* Maxime vero eodem accedat communicandæ doctrinæ quædam facultas oportet ; ut neque plura tradantur , neque subtilius ,

(a) *Pro Qu. Rosc. Com. c. 31.*

btilius, neque jejunius, quam discentium est captus. Quam certe facultatem sæpe ab doctissimis abesse viris videmus. Si quando igitur doctores omnium optimos quæremus, non continuo doctissimos quosque homines putemus nobis esse quærendos: statuamusque, magistrorum præstantiam non tam in doctrinæ commendatione, quam in egregia ejus tradendæ cum facultate tum voluntate consistere: neque satis esse, eos ea scire, quæ docent, nisi & sciant & velint ea ipsa docere, quæ sciunt.

Num igitur tales non fere sunt ii, quibus docendi munus est in scholis publicis demandatum? Fateor, in plerisque civitatibus reperiri aliquos aliquando posse doctiores; sed, quæ melius tueri partes doctoris possint, non fere reperiri confirmo. Nam primum, non temere ad eam provinciam negligenterque adisciscuntur; sed ab iis, qui publicis gymnasiis præsunt, summa cura, ac prope fastidiose probati deliguntur. Scientia in illis earum rerum, quas professuri sunt, eaque non vulgaris, sed etiam in comparatione præstans atque excellens; morum gravitas, severitas, probitas; præcipue vero illa in docendo, quam modo dicebamus, patientia, ac communicandæ doctrinæ facultas facilitasque requiritur. Non atrocior animadversio, non dissoluta indulgentia, non operis vacatio, immo ne aliarum quidem rerum occupatio permittitur. Hæc gymnasiorum moderatores scilicet curant; his invigilant, atque instant; hæc repetunt; suntque cum maxime in deligendo sollertes, tum minime etiam in pro-

probando remissi. Quod si spes illos forte
fefellerit, neque satis expectationi suoque
muneri doctores publici facere videantur :
paratum remedium est ; magisterio cessantes
removentur ; diligentiores magisque idonei
sufficiuntur. Verum huc quam non devenien-
dum est sæpe ? Facit enim ipsa publici mu-
neris amplitudo ac dignitas, hominum fa-
ma atque existimatio, studium probandi sui
cum omnibus civibus, tum maxime magi-
stratibus, contentio quædam inter ipsos at-
que æmulatio, vehementer sedulos in docen-
do atque impigros præceptores. Qui, si
mercede docent, spe etiam præmiorum ma-
gnopere commoventur : si vero nullis utili-
tatibus suis propositis, sed civitatum atque
hominum commoda, Deique in hac ipsa re
voluntatem gloriamque spectantes ad docen-
dum accedunt ; dici vix potest, quanto acrio-
ribus stimulis ad bene docendum incitentur.
Nulla enim res est, quæ honestum ac pro-
bum virum ad sui muneris partes implen-
das vehementius impellat, quam hominum
ipsorum Deique caritas. Denique, quod in
reliquis artibus contingit, ut usu atque
exercitatione perfecte cumulateque discan-
tur, id in hac quoque docendi fieri necesse
est. Quamobrem, etiamsi primo in gymna-
sia adventu non ita ab omnibus copiis pa-
rati atque instructi magistri publici reperian-
tur : at altero magisterii anno reperientur :
si non altero, certe tertio ; quarto quidem,
sine controversia ; quinto vero, sexto, se-
ptimo, reliquis deinceps, quis tam hebes
esse, per Deum immortalem ! quis tam tar-
dus

dus plumbeusque censebitur, qui non hanc
 artem, in qua una tamdiu elaborarit, pos-
 sit præclare perdiscere? Certe, si quis est
 ejusmodi, ut post aliquot annorum exerci-
 tationem non fatis in docendo excellens eva-
 furus videatur, hunc necesse est tam nullo
 ingenio, tamque non dicam stupidum, sed
 stipitem esse, ut neque voluisse is sua spon-
 te, neque aliorum judicio ac voluntate per-
 missus esse umquam ad docendum accedere
 sit existimandus. Itaque, quos unos e mul-
 tis acerrima æstimatione delectos, quos suæ
 dignitatis, quam vident oculis & judiciis
 multorum esse propositam, studiosos, quos
 aut spe præmiorum incensos, aut Dei ho-
 minumque eximia caritate inflammatos per-
 diu in hoc tamquam pulvere desudare, quos
 id unum agere, quos docentes in scholis
 publicis consenescere videmus, eos profecto
 peritissimos quosdam in arte docendi, atque
 excellentissimos magistros existimare debe-
 mus: qui quidem si tales non sunt, qui
 potius esse debeant, plane non video. Ita-
 que aut nulli sunt excellentes doctores, aut,
 si qui sunt, ii certe sunt publici. Quod si
 ita est: quid est, cur isti correctores atque
 emendatores nostri de optimis magistris eli-
 gendis laborent? Parcant operæ, si me au-
 dire volunt: alio suas curas reservent: ne
 actum agant. Nihil opus est electione. Ha-
 bent jam Italiæ civitates a sapientissimis vi-
 ris delectos; quibus meliores deligere certe
 ipsi non possent. Quod si deligere tamen
 volent, non repugnabo: modo inter istos
 ipsos delectos deligant. Non poterit in tan-
 ta

ta delectorum copia, quem ipsi delegerint, non esse electissimus. At certe, inquiunt, quid prohibet, privatum doctorem pari, ac publicum, esse excellentia? Immo, inquam, nihil prohibet, esse etiam, si vultis, superiore. quid tum? An nunc id agitur, possint necne boni privati aliqui doctores esse; an vero, utrum publicos deferri, mali quod sint, oporteat? Bonos ego hos, immo, si diligenter attendistis, optimos vulgo esse demonstravi; &, quæ prima in scholas publicas criminatio jaclabatur, in quibus optimorum doctorum negabatur fieri posse delectus, fatis, ut arbitror, aperte dilui. Cæterum cum privatis doctoribus mihi neque ratio neque res est: quibus usque adeo non irascor, ut, si boni sint, fieri etiam publicos velim, eorumque industriam atque excellentem facultatem ex domestica exercitatione atque umbratili in adspæctum lucemque proferri, & publicis civitatum commodis inservire: Sed, quoniam, quemadmodum quidem interpreter, eo vocor, ut de his ipsis, quod sentio, dicam, quoniamque universa de hac re disputatio eo pertinet, ut publicorum doctorum præstantia ex privatorum contentione magis intelligatur, non committam, ut publicis scholis patrôcinium, me agente, aliqua ex parte defuisse videatur.

Age vero: quicumque privatis doctoribus tantum tribuis, ut præ his despicias publicos atque contempnas, est, quod a te mihi responderi velim: ut, si recte responderis, vincas; sin in hac responsione nullus fueris, desinas maledicere. Artemne esse hanc

hanc docendi dicis? Artem profecto esse, sive artis quamdam similitudinem (a) non negabis. Nam & certa utitur ratione ac via, & tractatione, ut reliquæ artes, augefcit. Nunc, quoniam esse artem dicis, quæro etiam ex te illud: facilemne artem, an difficilem esse dicas? Facilem non potes dicere; in qua nimirum negas publicos magistros, qui se multum in ea diuque exercuerunt, fatis excellere. Relinquitur ergo, ut difficilem dicas. Recte est. Sed cur eam solis publicis magistris difficilem dicis? cur non statuis privatis, quam publicis, difficiliorem? necesse est enim, privatos multis partibus plures esse, quam publicos. In difficili autem arte, pauciores usitatus est excellere, quam plures. Philosophi, Mathematici, Causidici, Medici, Architecti, Pictores, Statuarii, quia eorum artes difficiles putantur, excellentes multi admodum esse non possunt. Vide igitur quid sequatur, si difficilem docendi hanc artem statuis: paucos (id quod res est) paucos inquam, posse in ea esse excellentes. Quod ego cum ita esse intelligerem, paucos nosce eosdem, non alios profecto esse arbitrabar, quam quos summa cura ad publica magisteria deligi, & in hac una arte diu multumque exerceri videbam: quorum si numerum summamque inirem, eos, pro cuiusque civitatis modo, atque urbis celebritate, aut duos, aut quinque,

(a) Cic. de Legibus l. 2. c. 47. *Nam non solum scire aliquid artis est, sed quadam arti etiam docendi.*

que, aut decem, aut viginti, aut, ut multum, triginta fortasse reperiēbam: neque vero civitatibus vel frequentissimis male consultum existimabam, si in artificio tam difficili triginta ejusmodi artifices excellerent. Quid tu? Difficilem esse scire hanc artem fateris; paucos propterea in ea excellentes esse posse concedis: idemque privatorum doctorum excellentiam publicorum dignitati anteponis; hoc est, triginta excellentes in frequentissima civitate reperiri posse doctores negas; centum, ducentos, trecentos, eoque amplius, totidem nempe, quot privatorum familiæ sunt, reperiri posse non negas. Quæ umquam tam florentes Athenæ tanta excellentium doctorum multitudine redundarunt? O fortunatam civitatem, in qua plures præstantes doctores, quam mediocres tutores reperiantur! siquidem multis familiis calceandis singuli tutores sufficiunt: at vero non niā singuli singulis familiis satis esse doctores possunt. O levem! o illiberalem! o pæne sordidam artem hanc docendi nostram! in qua infimæ fortis opifices plus etiam, quam in artificiis suis, excellere se posse confidunt. Publi Nigidi, Marce Varro, Cai Cæsar, Marce Cicero, Fabi Quintiliane, pudet me vestri. Quid fuit, quod tantum operæ, in scribendis tam multis de arte sive grammatica sive rhetorica voluminibus, poneretis, si hæc discere ludus est, docere cujusvis? Vos vero, sapientissimi italicarum civitatum publici doctores, monitos etiam atque etiam volo, & vehementer horro, ut, siquidem in publica litterarum pro-

fessio-

fectione expectationi hominum satisfacere non potestis, minusque idonei, quam privati doctores, ad vestras artes tradendas exitimini, ludos vestros occludatis, publicum magisterium deponatis, & privati esse doctores condiscatis. probari enim aliter non potestis. Difficiles quidem primos in beatorum quasdam domos aditus offendetis; quod, cum e publica professione recentes sitis, putabunt homines, vos nondum, quantum satis est, esse privatos. Sed durate, *durate* inquam, & *vosmet rebus servate secundis*. Patebunt enim opinione celerius regificæ ædes, in easque ultro honorificentissimeque admittemini: si præsertim non tam litteras, quam nescio quas potiores vobiscum artes vendibilioreſque attuleritis. Nam scitote, non tam heic doctorem liberis, quam domui curatorem, codici ac rationibus scribam, ruri etiam, si diis placet, villicum quæri. O tempora (nisi boni superi respexerint) litteris calamitosa! O mores hominum præposteris atque perversos! Huccine tandem omnia reciderunt, ut propterea publici tam male doctores audiant, tam vacua in singulos dies publica gymnasia fiant, tantopere domestica institutio commendetur atque invaleſcat, quod rei familiaris rationibus magis conducat privatos habere doctores, quam publicos? Retexo jam orationem meam. Fateor, si optimi sunt, qui sint conservando augendoque patrimonio maxime utiles, fateor, inquam, iſiaſmodi privatos doctores meliores eſſe, quam publicos: fateor, non injuria publicas ſcuolas reprehendi:

E

di:

di: nec optimorum doctorum fieri in iis posse delectus, vehementer civitatibus incommodum esse confirmo. Verum mini danda venia est, quod errore quodam populari inductus, in doctore non nisi docendi facultatem quærendam esse arbitrabar: quam cum excellentem esse in publicis doctoribus intelligerem, negabam, quidquam illis reperiri posse præstantius. Nunc, quoniam, eos esse optimos, verbi falsa interpretatione decepti, ostendere non potuimus, conemur saltem, si forte dicendo id consequi poterimus, ostendere; nihil certe in eo esse incommodi, quod interdum vel potius, ut isti ajunt, nimium sæpe mutantur.

Quid autem? Hoc publicorum doctorum magis est, quam privatorum? An non hi sæpe dimittuntur? non ipsi sæpe missionem petunt? non denique interdum atque etiam sæpe mutantur? Neque hæc mea magis sententia est, quam eorum ipsorum, qui hæc in scholis publicis mutationes ferre se negant posse. Quod ita esse, quivis vel ex hac re, quæ mihi ante paucos hos dies ipsi accidit, sane faceta ac perridicula, existimare potest. Cum enim in optimum cæteroqui, mihiq̃ue amissimum virum, sed peregrinis opinionibus nimio opere addictum, paulloque scholis publicis infensorem incidissem, ac multa de crebra hac magistrorum mutatione, tamquam ex veteri declamatione aliqua, deplorantem ac conquerentem audissem; dixi contra nonnulla, quæ res & tempus poscere videbantur. Tum eo
omni

omni sermone confecto, cum de quibusdam rebus aliis, tum ad extremum de filiolo ejus, festivissimo puero, agere inter nos sane benevolo animo cœpimus. Quem cum ego & ab ingenio & ab indole & a castissimis moribus mire laudarem: Est vero, inquit, ut dicis (nam quid dissimulem?) summa exspectatione puer, atque is, quem certe numquam me pœniteat suscepisse. Sed magistro bono est illi vehementer opus: qualem si quem inter auditores rhetoricos tuos esse compereris, scito, te mihi gratissimum esse facturum, si huic puero destinaris. Tum ego: Quid? inquam: illine, certe grandiusculo, magistrum nondum parasti? Sexcentos, inquit ille plane stomachans, sexcentos ad hanc diem paravi: sed totidem, alius alia de causa, dilapsi sunt, quamquam, si verum quæris, una fuit omnium atque eadem causa, avaritia, ut est enim genus hoc hominum maxime sordidum & illibera- le, simul atque spem lucelli majoris alicujus ostentari vident, diffuunt. Hec ego porro interpellans: Honorificentius, inquam, si videtur, de honestissimo probatissimoque civitatis ordine loquitor: de discipulo autem illo meo, quid fieri possit, considera- bo. Et simul, risidens, cum a me jam ille discederet: Interim valde, inquam, gaudeo, magistros vestris domibus (id quod publicis scholis non contingere initio sermonis tam dolenter querebare) contingere sempiternos.

Nempe ita, ita inquam, est plane, Florentini. Una est hæc omnium scholarum,

sive publicas sive privatas contemplere, par-
 que conditio, ut in iis perpetui doctores
 esse non possint. Quod ita tamen est ve-
 rum, ut in publicis quidem per diu multos
 versari, ac nonnullos etiam consenescere vi-
 deamus. Qui autem minimum durant, sunt-
 que perrari, iis saltem magisterii unus est
 annus explendus. Quid putatis? primis illis
 latinæ Grammaticæ rudimentis probe edi-
 scendis plus annuo spatio requiri? Atqui non-
 nulli privati doctores existerunt (priva-
 tos dico: nam e publicis, hoc est, e re-
 rum peritis, & ingeniorum, quæ vulgo ho-
 minum natura fert, expertis, nemo, quod
 sciam, usque adeo deliravit), qui non ele-
 menta modo illa, sed universam rei gram-
 maticæ rationem traditaros se puerulis, non
 anno, sed sex, opinor, mensibus professi
 sunt. Nimium hoc quidem, ac perabsur-
 dum: at vero æque illud falsum; primæ
 illi institutioni non octo mensium operam,
 aut summum decem, sufficere: sit modo,
 qui docendus est, non omnino hebes ac tar-
 dus, afferat studium, adhibeat diligentiam,
 præstet doctori suo assiduitatem. Hunc, in
 illa puerili doctrina satis instructum, si ma-
 gister suus repente deferat, alterique com-
 mittat; recens autem hic in fidem ac disci-
 plinam suam accipiat, & reliquam, ut ita
 dicam, exædificationem, recte ac probe ab
 veteri jactis fundamentis, superstruat, ab-
 solutoque (id quod fieri certe potest, sit-
 que plerumque) annuo opere atque perfe-
 cto, alteri alumnum suum tradat, politio-
 ribus quibusdam litteris, quam Humanita-
 tem

O R A T I O IV.

101

tem vocant, imbuendum; atque hic demum rhetori formandum perficiendumque commendet: quid hi doctrinæ comparandæ gradus, quid hæc doctorum in alio quodam genere ac munere successio discipulis possit officere, sane non video.

Unum quoddam est opus, adolescentem in hisce litteris, quæ Grammatica atque Rhetorica (de harum enim magistris tota hac oratione quærimus) continentur, erudiri. Hujus autem operis multæ sunt partes; quas minime necesse est omnes unum atque eundem doctorem obire. Namque, ut ab illo simili, quod supra attigi, ne recedamus: ne in ædificiis quidem constituendis quidquam operis aut firmitati aut elegantiae obest, ipsos inter se fabros atque artifices totius operis faciendi vices officiaque partiri. Quinimmo illud usu venire vulgo intelligimus, ut, qui fodiendis jaciendisque fundamentis maxime apti sunt, iidem parietibus tollendis, ferruminandis, ad perpendiculumque exigendis, non æque idonei reperiantur; nec, qui in hoc valuerint, videmus continuo eosdem tectorio albarioque inducendo esse maxime accommodatos: nec horum ipsorum hac una in re scientiam atque artificium ad tectum apte imponendum ac commodè fastigandum multum admodum conferre. Similiter in oratorio hoc opere, quod facultate unum, institutione multiplex est, nihil impedit, quominus ei perficiendo plures tamquam artifices, alii in alio partium operis genere præstantes, accedant, & suam veluti provinciam quisque sortiatur: atque alii quidem

latinitatis in adolescente tamquam funda-
 menta ponant; alii reliqua, eodem perti-
 nentia, tradentes, tamquam parietes tol-
 lant; alii humanitatis atque elegantiae quem-
 dam colorem, tamquam albarium, alliniant;
 alii demum, in artis intima, ac veluti ad
 oratorium culmen & fastigium eundem il-
 lum adolescentem perducentes, tamquam
 coronam ac tectum imponant. Utriusque au-
 tem rei causam exquirere si velimus, illam
 verissimam reperiemus; quod in utraque fa-
 cultate, ædificandi & instituendi, unum est
 quiddam, quo omnis singulorum artificum
 intentio mens spectet, quoque singulare cu-
 jusque ac proprium opus dirigatur: ut,
 quamquam diversa inter se ipsa sint opera,
 si tamen eodem singula referantur, perinde
 sit, ac si non a multis, sed ab uno omnia
 administrentur. Hoc, dictum fortasse obscu-
 rius, dicam, si potero, planius. Videtis-
 ne, in extruendo ædificio sic illa ab aliis
 fundamenta agi atque constitui, ut, & al-
 titudine & laxitate, parietibus superimpo-
 nendis proportionem respondeant? parietes
 autem ipsos ab aliis ita tolli atque educi,
 ut & cameris & tabulatis & tecto fastigio-
 que conveniant? reliquaque omnia sic esse
 inter se apta ac veluti concinentia, ut ima
 cum mediis, media ipsa cum inis summis-
 que concordent? Quid ita? quia, quamquam
 non unius fabri opera industriaque advoca-
 tur, at unius architecti concepta animo,
 suisque momentis, certisque modulis exacta,
 descriptio ac forma una perficitur. Quid in
 docendo? Hoc item multiplici in opere plu-
 res

res tamquam manus versantur, alia atque alia obeuntur munia, rerum est plurimarum functio atque agitatio: verum omnia una demum mente administrantur; una est forma totius operis atque descriptio; unus omnium moderator atque architectus; una docendi est ratio; unum atque idem magisterium: ut proinde non fere magis latino oratori ab ipsis initiis formando plurium magistrorum institutio, quam ædificandæ ab ipsis fundamentis domui varia ac diversa plurium fabrorum opera impedimento esse possit.

Quo quidem loco illud mihi venit in mentem dicere, quo haud scio an dici verius quidquam possit: Magistros in publicis scholis non (id quod, causæ bonitate confusus, paullo ante dederam atque concesseram) non inquam, annuos, sed esse perpetuos. Non enim magistros eos esse vere existimare possumus, qui neque a se conditas artes profitentur, neque sua præcepta tradunt, neque ab se artificii sui, sed ab aliis peti imitationem volunt. Duces hos ego ad eas artes, interpretes quosdam, comites, adjuutores voco: magistros vero non alios, nisi quorum ipsæ sunt artes atque præcepta, a quibusque imitatio petitur, duco. Itaque, cum ante annos ferme septemdecim rhetoricam hanc artem docere institui, primumque sum auditores meos, florentissimos juvenes, alloquutus, cum alia quædam in hanc sententiam, tum illud dicere me ac commemorare memini; in quo animadverti, universos maxime commoveri:

Errare, si qui me *Rhetoricæ* magistrum illo anno fore arbitrantur: habere eos jam inde ab institutis publicis scholis excellentissimum rhetorem, quo nemo unquam melior existerit, nec vero esset existiturus, Marcum Tullium Ciceronem. Hunc audirent, huic parerent, ad hujus se unius similitudinem conformarent: me, quamdiu tantus magister foret, non commissurum, ut vocem ullam meam de *rhetoricæ* arte mitterem, aut opus ullum meum ad imitandum proponerem: arrogantissimi hominis esse & non ferendi quidquam sperare se melius esse allaturum: itaque ab eo uno omnia cum præcepta tum exempla peterentur; cujus & præcepta ea essent, ut ex optimarum vel Græcorum vel Latinorum orationum animadversione præstantiora condici non possent; & orationes ejusmodi, ut nullis cujusquam vel optimis præceptis possent absolutiores evadere: unum modo me illud de me polliceri atque adeo præstiturum, ut ducem me ad illum adire volentibus præberem; &, quoniam aliena quadam lingua loqueretur, interpretis vice desungerer, & quæ præciperet, & quæ ex præceptis atque arte diceret, explicarem: diligentiam, assiduitatem, fidem meam in hac una re pollicebam: magistrum me neque fore, neque, si maxime vellem, esse posse, testabar. Hæc ego jam tum, Florentini, non oratorio quodam more ad tempus causamque, sed plane ex animi mei sententia vereque dixi. Magistri appellamur: at non nisi operarii quidam & ministri magistrorum atque interpretes sumus. Ipsi illi Donati, Alvari, Ambrosii a
 Visu-

Visitatione, Bonciarii, Butii, Lancellotti, Soarii, Decolonii, quique eorum similes in scholis grammaticis aut rhetoricis præleguntur, magistri non sunt. Observatores modo quidam atque enarratores artificii ejus, quo in re sive grammatica sive rhetorica veteres illi ac germani magistri utuntur, appellandi sunt atque habendi. Nihil de suo, nisi animadversiones quasdam, asferunt; omnem præceptorum rationem ex illorum diligenti observatione constituunt. si quid edicunt, id sua quidem voce declaratum, sed ex veterum illorum sensu prolatum intelligi volunt; eosque solos magistros esse atque haberi æquo animo ac summa cum voluntate patiuntur. Jam veros hosce ac solos magistros quis non, a scholis publicis numquam removeri, numquam mutari, ac esse plane perpetuos, intelligit? Magistris autem manentibus, quantum tandem referre ad institutionem arbitramini, si nos; qui non nisi ministri quidam, ut sæpius dicam, atque interpretes sumus, ad eam pæne unam rem adhibiti, ut vocem vivam discipulis præbeamus, & nostro ore magistri ipsi illi sua, non nostra, animi sensa depromant, quantum, inquam, referre arbitramini, nos si recesserimus; & biennio, vel etiam non plus anno, interpretandi hoc munere defuncti, aliis deinceps atque aliis eandem provinciam planam atque expeditam tradiderimus? Interpres recessit; novus successit. Quid? at manent præcepta; manet docendi ratio; manet magisterium: magistri denique illi, quos dixi, legitimi atque

ordinarii, & tamquam totius operis architecti, non recesserunt: ut, si discipuli in scholis iidem maneant, qui proximo anno fuerunt, nec se sive ad superiores facultates, sive, ut fieri plerumque video, ad alias quasdam potiores, hoc est, magis quæstuosas artes contulerint, ii, novi interpretis ac doctoris adventu, vocis alium quemdam auribus suis accidere sonum sentiant; rem quidem ipsam atque doctrinam minime immutatam, sed plane esse eandem intelligant.

Si quis est autem, qui, quamquam, esse hæc vera fateatur, interpretes modo in scholis publicis aliquando, non magistros magisteriumque mutari, horum tamen ipsorum interpretum mutationem esse incommodam discantibus arbitretur: huic ego homini, nimium fortasse difficili ac moroso, brevissime respondebo: Primum; si quid in eo esse incommodi concessero, tamen non esse ejusmodi, ut cum plurimis publicarum scholarum commodis conferatur; nec, cum res humanæ omnes aliqua in re laborent atque deficiant, neque esse possint ex omni parte perfectæ, esse æquum, ob eam unam rem scholas publicas damnari ac respui, quod ab aliquo minimo incommodo sejunctæ esse non possint: deinde, id ita esse incommodum, ut in eo ipso tantumdem commodi reperiatur. Nam, si quid nocet mutatio, propterea nocet, quod aliquando, qui successit, non eadem sit, qua, qui recessit, sive doctrina, sive doctrinæ tradendæ facultate. Quid vero, si hæc ipsa in superiore forte minora fuerint? nonne huic succedi, melio-

melioſioremque ſuffici ac ſubrogari eſt utile? An eſt aut aliqua lege cautum, aut rerum conditione fatale, ut deteriores eſſe ſemper debeant, ſuperiori quicumque ſucceſſerint? Concludam brevius. In huiusmodi mutationibus, aut parem aut ſuperiorem aut inferiorem facultate ſuccedere neceſſe eſt. Si par ſuccedat, nihil incommodi eſt; ſi ſuperior, aliquid commodi; ſi inferior, certe nonnihil incommodi, ſed facile & quamprimum mutatione, immo non niſi mutatione atque aliqua ſucceſſione, tollendum. Ita, quæ mutatio non nihil obſutura videbatur, eadem in contrario genere aliquid prodeſſe intelligitur.

Reliquæ mihi nunc orationis partes duæ eſſe deberent; altera de diuturnitate docendi in ſcholis publicis; altera de quadam morum, ut dicunt, corruptela: de quarum utraque, deque iniquiſſimis omnium, quæ fingi poſſunt, criminationibus, neque dicendi præſtitutum mihi tempus, neque ſatietas audiendi veſtra, neque vero deſatigatio mea, ſinunt, me dicere ea, quæ copioſiſſime dici graviffimeque poſſent. Erit mihi alius eas coarguendi locus. Nolo nunc aut pauciora dicere, quam rei gravitas poſtulat, aut plura, quam & ratio veſtri commodi, & temporis anguſtiæ permittunt. Tum cauſæ utiliſſe fore intelligo, ſi ad ejus graviffimas partes tractandas, viribus quam integerrimis, ac tamquam recens, acceſſero. Nunc videte, quid vobis de una illa criminatione, quam depellere a ſcholis publicis conatus ſum, ſtatuendum putetis; ex ea-

que reliquarum conjecturam facite . Offendi, magistros publicos, a sapientissimis viris delectos atque probatos, & in artificio suo diu multumque exercitados, plurimisque rebus, quibus hominum industria maxime acui solet atque ali, vehementer excitatos, esse optimos, & ad docendum, fere præter cæteros doctos homines, accommodatos; nec, quod aliquando, aut etiam sæpe mutantur, quidquam id obesse discen- tibus: nam neque ante mutantur, quam eam quisque doctrinæ partem tradendo ab- solverit, ex qua sic est ad reliquas aditus atque adscensus, ut in ea tamen separata quædam ab aliis, per seseque consistens, scientia ac disciplina constituatur, & ita de- mum mutantur, ut, magistris, sive potius magistrorum quibusdam ministris atque in- terpretibus mutatis, maneat tamen, atque adeo perennet, docendi eadem ratio atque idem plane magisterium.

Habeant hoc a me interim iudicii mei, deque eorum præstantia mirificæ opinionis testimonium publici & hujusce civitatis & universæ Italiæ doctores: reliqua autem ad scholas publicas pertinentia, pari fide diligentiaque tractata, alio tempore a me eodem exspectent. Pro quo labore meo ac voluntate, hanc mihi unam referri ab iis gratiam pervelim, ut, si quos, natione quidem itales, at studio, sententiis, mo- ribus denique peregrinos, hac oratione mea offensos forte rescierint, quod non in hoc Italiæ publice docendi instituto ali- cujus externi hominis opinioni subscripse- rim,

rim, ne meam causam deferant, sed consilium ac factum meum defendant, mihi que eos placare & conciliare studeant: testenturque meo nomine atque confirment; mihi nullas esse cum exteris eruditis hominibus susceptas inimicitias, quorum ingeniis atque industriæ vehementer faveo, doctrinis ac libris plurimum delector ac juvor; unum modo illud mihi non minimum displicere, nec ita id moderate ac leviter, ut italorum nonnulli solent, ferendum videri, quod ita sua illi venditent, ut nostra contemnant, tantumque tribuant sibi, ut nobis derogent omnia, nec modo ab se sua discere, sed nostra etiam dediscere ac repudiare nos velint; eoque arrogantia atque impudentia processerint, ut, si quando aliquod ad eos a nobis egregium opus, quod contemnere non possint, affertur, ita hominem italicum laudent, ut contumeliose Italiam flagitiosaque vituperent. Solent enim jam sic vulgo exclamare: *O factum male! quod non Londini, quod non Parisiis, quod non denique extra Italiam, tale sit ingenium exortum.* quasi vero portenti ac prodigii simile sit, præclara ingenia in Italia nasci; aut digni non simus, quos inter ingeniosus aut doctus ullus existat (a). Hoscene spiritus? hanc-

cine

(a) At non ita abjecte de italorum ingeniis atque doctrina Galli præsertim homines sæculo decimo sexto ineunte sentiebant. Budæus l. i. de Assè: *At italorum*, inquit, *extant opera, quæ præscam litterarum elegantiam*
in-

cine superbiam atque arrogantiam? hauc-
 cine maledicendi tam impunitam licentiam,
 cujusquam itali, non dicam animus ferre,
 sed aures possint? Hisce nos, de nobis tam
 abjecte sentientibus, tam libere impunden-
 terque obloquentibus, blandiri, adulari,
 obsequi sic convenit, ut, quidquid sive no-
 vi attulerint, sive antiqui ac recepti impro-
 barint, continuo nos, sine judicio ac ratio-
 ne certa aliqua, aut amplectamur aut ad-
 spernemur? Atqui, mini credite, nisi huic
 effrænatae carpendi nostra libidini itali ho-
 mines atque audaciæ, conjunctis animis ac
 viribus, restiterimus; si, ut quodque illi
 improbarint, ita nos id etiam improbandum
 censuerimus; si nostra ad illorum arbitrium,
 non

instaurasse nobis ac retulisse jure creduntur ...
Neque invitus fecerim, ut Italiae alumnis, ve-
lut majorum gentium scriptoribus, sedendi in
orchestra hujus theatri jus tribuam. Sed quis
jam omni gradu, atque in quintam classem de-
jectos aut submotos Gallos esse patiatur? ... Ve-
ram esto (quod tamen pace dictum aliarum pro-
vinciarum velim) itali hominum soli hactenus
hoc nomine in cælo esse dicuntur, aliarum gen-
tium opinione: hoc est, italos hodie omnium
ore celebrari. Sed si Herculem, & Liberum,
& Castores in cælum ingentia merita subve-
xisse traduntur, cur non possint olim & alii
scribendi industria parem, & similem italís
laudem mereri, atque adeo jus ipsum sperare
Quiritium?

non ad decreta majorum ac veritatem ipsam exegerimus ; nisi nos per nos stare , nostrisque inventis valere posse ostenderimus , actum , actum inquam , est de italici splendore nominis ac dignitate , deque italorum veteri in litteris principatu ac regno . Decus , existimationem , libertatem denique , ipsam amitemus : discemus ab aliis , qui alios docere consuevimus ; certisque quibusdam nationibus turpiter serviemus , qui cunctis gentibus imperare solebamus . Cumque nos illæ , sibi tam dicto audientes , tamque addictos , obæratos , mancipatosque intellexerint , non eæ quidem nos magis diligent , sed magis contemnunt , nec docilitatem illam nostram , sed stoliditatem ducent : utque jucundiores sibi ludum de nostra fatuitate dent , sua ipsa illa , quæ paullo ante , ipsis auctoribus , acceperamus , damnare rursus (quod non in una re jam fecerant) incipient , nosque ad vetera instituta nostra , quasi sua atque nova , revocabunt . Nos vero assidua novandi cura , tamquam aliqua tempestate , jactati , neque ullum certum , cursum ac præscriptum tenentes , modo vetera repudiantes , modo nova amplectentes , modo hæc ipsa fastidientes , atque illa rursus adamantes , aliorum nutum in omnibus intuentes , & ab eorum levitate pendentes , nostrique semper dissimiles ; insulsi quidam , fatui , vecordes , atque omnium gentium despectissimi judicabimur . Consistamus igitur in majorum nostrorum , sapientissimorum hominum , vestigiis atque institutis : nostrorum plus apud nos , quam alienorum judicia valeant ;

leant : a nostris moribus , quibus semper viximus , ac præter cæteras gentes maxime florui-
mus , ne recedamus : peregrinorum le-
vitatem atque arrogantiam adspernemur ;
neque iis , in studiorum præsertim ratione ,
si sumus itali , pareamus , sed imperemus .
Dixi .



ORATIO V.

PRO SCHOLIS PUBLICIS SECUNDA

HABITA FLORENTIÆ

IV. KAL. FEBRUARIAS MDCCXXXVIII.

C O R A M

FRANCISCO MARIA GINORIO

PÆSULANORUM PONTIFICE.



Publicarum scholarum defensionem, a me superiore anno susceptam, atque ex hoc ipso loco institutam, meministis, ut opinor, Florentini, ita, propter summam rerum dicendarum copiam ac varietatem, non potuisse unica oratione universam comprehendere, ut, cum tria proposuissem, de quibus dicerem, vix unum illud, quod primum in partitione fuerat, de magistrorum genere ac mutationibus, explicarim: reliqua autem duo, de diuturnitate docendi, deque morum corruptela, omnino intacta reliquerim. Quod cum ita tum accidisset, sic tamen putabam fore, facile ut reliquas criminationes illas altera dumtaxat actione complecterer, & utrique satis commode uno atque eodem tempore responderem. Verum, cum ad eas ipsas defensionem meam compararem, omniaque, quæ in re essent, satis attento animo nuper inquirerem, digererem, expenderem, adornarem, ita se mihi multa in illa commentatione obtulerunt, ut, nisi suscepto patrocinio deesse velim, tribus omnino actionibus

bus, quod reliquum causæ est, mihi esse absolvendum intelligam. Nam diuturnitatis quidem refutatio non nisi bipartita esse potest. Cum enim plurimos, &, vere ut dicam, plerosque, hac quidem tempestate, diutius, quam oporteat, in publicis scholis versari, nec satis umquam eruditos evadere adolescentes constat, duo certe illa præstare atque efficere debeo, ut & id non esse publicis scholis adscribendum ostendam, & veras hujus ipsius rei causas investigem ac proferam: quo, iis repertis atque enunciatis, neque ullus in animis hominum scrupulus aut dubitatio relinquatur, & ab hujus criminis suspicione publicas abesse scholas magis ac magis intelligatur. Itaque duplex mihi actio ex una illa criminatione nascetur; quarum altera in purgatione criminis, altera in diuturnitatis hujus causarum investigatione versabitur. Tertia denique illa omnium gravissima accedet actio de moribus. Verum duo hæc quidem alias: nunc primum illud, si placet, de docendi diuturnitate videamus.

Nimis diu in scholis publicis detineri juventutem queruntur. Si scholarum ipsarum id vitio contingit, gravis sane querela, justa reprehensio, res ipsa denique omni animi adversione providenda atque emendanda. Neque enim aut tam longum est homini ad vivendum spatium a natura concessum, aut tam modica hujus ipsius vitæ occupatio est, ut non vel in unius anni jactura damni plurimum fiat. Si non publica, sed privata juventutis institutione hoc assequimur,

mur, ut aliquot annos, aut etiam menses, otio ac cessationi, hoc est, morti cuidam demtos, agendo cognoscendoque, id est veræ hominis vitæ, addere possimus: valeant doctores publici, gymnasia autem publica non claudantur modo, verum etiam disturbentur. Non juvenus propter gymnasia, sed propter juventutem gymnasia sunt: huic illa oportet, non hanc illis accommodari. Potior sit omnium ratio, quam paucorum; nec consuetudini, sed utilitati publicæ serviatur. Equidem, quod ad me attinet, provinciam hanc docendi meam, quam jamdiu maximas inter ærumnas gero, non modo non invitus, sed lætus atque alacer deponam. Videbor mihi aliquando liber, si meis me litterulis sine interpellatoribus dederò: & aliquid fortasse discere incipiam, cum alios docere destitero. Magnam habebò privatis doctoribus gratiam, qui me hoc onere, quod vix ferre jam possum, levabunt, nec minorem meorum auditorum parentibus, qui, quo celeriores liberis suis cursus doctrinarum præstent, moram mihi omnem, ad eandem inflammato studio ab ipsa pueritia contendenti, removebunt. Probo consilium; propositum laudo; & egregiam istam nullas in vita negligendi litteras voluntatem, ac tamquam avaritiam temporis, vehementer esse commendandam puto. Placet vox illa mihi parentum; & cum plenam caritatis erga liberos, tum etiam sapientissimam judico: Volumus, inquiunt, grammaticos esse liberos nostros, volumus esse rhetoricos; sed mathematicos, sed philosophos, sed theolo-

logos;

logos, sed reliquis doctrinis omnibus instructos esse non nolumus. neque ulla pars vitæ studiis vacet, neque omnis uni studio ætas addicatur. prima celeriter percurrantur, ne nimis sero ad extrema veniatur. ut non multum ad carceres hæseris, haud multum tibi admodum, ad metas ut pervenias, supererit. non igitur in scholis publicis juvenus misera confenescat: non in grammaticis, non in rhetoricis pars vitæ maxima, ac vero optima, consumatur: suum etiam reliquis disciplinis tēpus, suum studium, suaque opera tribuatur.

Hæc qui commemorari audierit, & tam serio graviterque agi a plerisque parentibus animadverterit, profecto cum illos præclare sentire magnificeque loqui intelliget, tum illis obtemperandum, eorumque egregiam, hanc voluntatem omni ope adjuvandum existimabit. At vero cum idem deinde videat, dimissos e scholis publicis adolescentes non ad alias facultates ferme contendere, sed; omni omnium litterarum abjecta cura, vel male agere, vel agere id unum, nihil ut agant, sane miretur, quid tantopere prope-rato opus esset; cur nihil longius parentibus videretur, quam ut illi, sæpe nondum satis eruditi, e gymnasiis excederent; cur denique non eam partem ætatis, quæ maxime proclivis ad vitia est ac lubrica, mauerint a suis sub magistrorum liberali disciplina, quam in licentia, otio, desidia-que consumi.

Quotus enim quisque est ex iis, qui tam celeriter gymnasia reliquerunt, aut, ut
ipsi

ipsi loquuntur, studiorum curriculum confecerunt, quibus non hæc ipsa studia, non cupiditatem ac sitim, ut fieri oportebat, incendiisse, sed fastidium ac satietatem attulisse videantur? Num eruditorum cœtus celebrare, num commentari, num scribere eos aliquid, num denique lætitare scriptores ullos, nisi si forte aut Marinum, aut Guarinum, aut aliquem eorum similem, suspicamur? non eos tota passim urbe, composito ac delibuto capillo, mollissimo incessu, muliebri prope cultu concursare? non matronarum cathedris aut curribus hæere? non ludis, non spectaculis omnibus interesse? non etiam popinas ac tabernas frequentare? non amoribus irretitos? non voluptatibus captos? non ære alieno obligatos, atque adeo pressos videmus? Unum modo habent, in quo reprehendi non possint. nam vigilantes esse audio; qui quidem totas noctes in alea choreisque consumant. Si qui autem aut equis, aut canibus, aut gladiis, aut fidibus delectantur, ii demum esse aliquid, ac multum quidem agere existimantur. Et vero non plane nihil agunt, suntque in eo ipso, quod agunt, quantulum id cumque est, si non laudandi, at certe ferendi. Sed videtis, quomodo desciverint, & in pejus lapsa sint omnia: siquidem, quæ vitia non sunt, eas virtutes ducimus, & in laude ponimus, quæ vix vituperationem effugiunt. nam certe & equitare, & venari, & digladiari, & canere non multum veræ laudis habent, iisque esse impensius deditum haud multo est plus, quam esse in ipsis occupationi-

tionibus otiosum, sive in ipso otio occupatum. Vere igitur mini videor esse dicturus, quidquid longioris temporis in hac quidem vivendi ratione (quæ tantum a consuetudine institutoque majorum deflexit, ut non iis, sed aut Ægyptiis, aut Sybaritis, aut si quæ delicatiores mollioresque fuisse gentes memorantur, prognati esse videamur) quidquid, inquam, longioris temporis in adolescentium institutione consumeretur, non id bonis ullis artibus aut doctrinæ, sed deliciis, sed voluptatibus, sed, ut levissime dicam, otio atque inertiae subductum iri. Quæ cum ita sint, utinam hanc mini facultatem causa daret, ut possem hoc confiteri; diutius, quam addiscendis litteris esset satis, adolescentes in scholis publicis detineri. Hoc ego crimen non reformidarem, sed libenter agnoscerem, nec modo non refutandum, sed mihi præ me ferendum putarem. Cum enim morum potior ac probitatis, quam eruditionis cura esse debeat, præstetque improbis ac noxiis civibus carere, quam litteratis hominibus abundare rempublicam: quid ad publicarum scholarum decus ac laudem commemorari a me illustrius posset, quam eas hoc in hac vita moribusque præstare, ut, quantum moræ in docendo juventutis eruditioni afferunt, tantum temporis adultioris ætatis licentiæ, aut certe inertiae detrahanatur? Sed non licet tantum bonitatis atque splendoris causæ arrogare: non possum scholis publicis diuturnitatem in docendo istam salutarem, non singulare in rempublicam beneficium meritumque tribuere.

Id

Id igitur fumamus, eoque contenti simus, quod simplex veritatis ratio & causa ipsa concedit, neque enim ejusmodi illa est, ut, nisi mendacio nixa, non possit firmitate sua ipsaque veritate consistere. Nego, longiora, quam addiscendis litteris necesse est, in scholis publicis disciplinarum esse curricula: nego domestica privati cujusquam doctoris institutione fieri contractiora.

Atque hoc quidem posterius cum illa exceptione dictum intelligi volo, ut, si publicæ institutioni privata adjungatur, atque altera ab altera mutuo vicissimque adjuvetur, non negem, multum sane id ad discendi celeritatem conferre: illa modo præscriptio in hoc genere cautioque adhibeatur, in eoque sita esse omnia existimentur, ut, non solum non contraria, sed ne diversa quidem alia ab alio doctore tradantur; & ut privatus ille non princeps ac dux in instituendo sit, sed veluti quidam administer ac comes, & tamquam partium secundarum se esse actorem patiat. Hæc si fiant; si domesticus hic suam ad illius publici institutionem accommodet, si eadem discantibus ab utroque inculcentur, si domestici operis, si scholastici ratio repetatur, si denique id agatur, ut, quæ in publicis puer scholis didicerit, ne ea per negligentiam socordiamque domi dediscat: absolutissimum fore opus censeo, nec quidquam ad doctrinam celeriter arripiendam fieri posse accommodatius puto.

Licet hinc etiam omnes intelligant, id quod superiore actione testatus sum, privatis

vatis me non esse doctoribus infensum; quorum in discipulis instituendis operam & vehementer probem, & mihi etiam deponam ac flagitem. Utinam multos tales nanciscar, qui in excolendis, tamquam agris, adolescentulorum ingeniis, jugum pariter mecum ferre non detrectent. utinam ea facultas omnibus discipulorum meorum parentibus detur, ut liberis suis privatos etiam adhibere doctores possint. Magna profecto me laboris ac molestiæ parte liberarent (quamquam id est levius, nec, mini ut tribuatur, postulo): sed certe valde ita liberorum bono studiisque consulerent; valde id ad eam, quam potissimum ipsi spectant, discendi festinationem conducere.

In quo sane mirandum est, vehementius nos de suis suorumque commodis laborare, quam ipsos; nec nobis tamen parem gratiam, pro tam liberali voluntate singularique studio, referri. Nam nos quidem, quo citius instituere eorum liberos atque erudire possimus, privatorum doctorum operam ac ministerium ultro advocamus: ipsi nostram operam adspernantur atque rejiciunt; maluntque a solis privatis, quam conjunctim a publicis, in suis liberis erudiendis elaborari: quasi non modo non erudire eos, sed ne conferre quidem aliquid sive ad eorum eraditionem, sive ad erudiendi celeritatem possemus, si ad privati doctoris præcepta atque institutionem nostra vox etiam, nostræque facultatis & industriæ non nihil accederet.

Sed nimirum non odio id nostri, neque
quo

quo de facultate nostra secus, ac nos vellemus, existiment, sed plane amore ac miseratione quadam commoti impulsique faciunt. Vident, confluere undique ad nos plures, quam ut uni tanto tot erudiendorum oneri ferendo pares esse possimus. vocem profecto ipsam, ne si stentorea quidem sit, tantæ auditorum frequentię sufficere non putant posse. nobis parant; nostris viribus ac valetudini consulunt; minus occupatis atque distentis laborem atque onus imponunt.

Quis non hac tanta tamque inusitata humanissimorum virorum benignitate capiatur? cujus non publici doctoris animus ac voluntas ad mutuo respondendum tantæ erga se benevolentię, sollicitudini curęque exciteatur? Nemo, ut opinor, eorum est, qui non eo etiam ægrius ferat, nequaquam ad se talium parentum liberos mitti, quo magis ad se suęque commoda intelligit non mittendę causam pertinere. Nobiscum igitur præclare agitur: major nostri ratio, quam vulgo existimatur, habetur. Redeamus sane cum iis hominibus in gratiam, a quibus, vanis quibusdam suspicionibus, fictisque malevolorum ac disseminatis rumusculis, abalienati eramus. nihil est de nostra dignitate aut estimatione detractum: aliquid etiam commodis nostris est, degendęque vitę tranquillitati concessum. Privatis doctoribus timeo. vereor, ne majus iis onus, quam quod ferre possint, imponatur. Levare nos labore molestiaque, gratum est: gravari eos opprimique, non est æquum. Atqui, nisi

F

pro-

provisum sit, quantum assequi conjectura possum, debilitentur nimio labore, atque inter opus deficiant, necesse est.

Video enim, eo illos fere arcessiri, ubi robusta firmaque ætate florens paterfamilias, amans reipublicæ civis, non infæcundam, uxorem superum benignitate nactus, catervas liberorum patriæ ac gentis incremento procreavit. Nec vero eos genitrix, ut Terra parens Titanas, uno omnes conceptu fatuque fudit. Quamquam omnes multum de parentibus referant, fratresque eos esse germanos vel primo adspectu possis agnoscere: at ætate, at ingeniis, at doctrina differunt. Maximus quidem natus, nec jam impubes ac puer, sed plane juvenis, cæteris, ut ætate, sic etiam eruditione antecellat necesse est. eum ego rhetoricis institutionibus atque poeticis maturum autumo. Proximus quidem is videtur, qui earumdem facultatum initiis, & mitioribus quibusdam litteris sit atque humanioribus imbuendus. Reliquos deinceps minores illos in grammaticis detinendos omnes exercendosque censeo, sed ita, ut non omnia omnibus æque conveniant; verum ut minimis prima illa nominum verborumque elementa tradantur; grandiusculi participiorum, gerundiorum, reliquarumque rerum grammaticis illis tamquam mysteriis initientur; tertiis intimior latinæ syntaxis ratio explicetur. Quid vero festivissimo illo puellularum choro faciemus? nonne ipso ore gestuque declarant, cupere se etiam ac velle una cum fratribus erudiri? easne lanam modo ac colum ancillari ministerio semper tractare

etare patiemur? non indoli naturæque indulgebimus? non honestissimæ voluntati obsequemur? Nolo, Pieridas esse mulieres, sed nec plane amusas ac rusticanas evadere. His igitur sua quoque cura impendatur: sciatque privatus noster recensque doctor, postremum hoc ab se expeti munus atque exigi, ut rationem legendi scribendique puellas etiam duas, tresve, quattuorve doceat.

O miserum atque infelicem, quisquis is est, cui tam multiplex, tam varia, tam impedita procuratio demandatur! o gravem! o ærurnosam! o horribilem vitæ conditionem! Hoc nimirum illud erat, quod verabar, idque animus quasi divinans præfagebat, fore, ut adeo misericordes isti parentes, qui aliquid ex labore nostro, nostrisque occupationibus, domi suos liberos continendo, deonerare vellent, nimium iidem ac non ferendum onus in privatos doctores trajicerent atque transferrent. Miseret me certe hominis istius, qui tantis litteris instructus atque abundans, quantas oportet esse ei, qui non unus e multis, sed inter multos prope singularis, a copioso & locuplete patrefamilias conducitur, ut grammaticum, ut poetam, ut rhetorem, ut mathematicum, si necesse est, ac philosophum, apud se agat, primum totos dies cum pueris puellisque vir gravissimus, & doctissimorum hominum cœtibus sermonibusque assuetus, versari cogatur; deinde aciem ingenii sui, vimque doctrinæ prope immensam, in exiguum arctumque concludat, & facultatem suam, in orationibus, poematis, the-

rematisque subtilissimis exercitatum, ad levissimas fane putidulasque præceptiunculas demittat ac contrahat.

Sed quid facias? Ita homines sunt, ut, quæ vitæ conditio acerba tibi ac non ferenda videatur, eadem aliis valde probetur atque expetatur. Dimittamus igitur istos, qui privati magisterii provinciam, tamquam formosam aliquam multisque procis petitam sponsam nacti, non modo, ut sui misereamur, non postulant, verum etiam, sibi invideri a nobis, putant. Sed habeant fane sibi totum istuc, quidquid est, formæ mirificæ atque elegantiae: me quidem certe rivalem non habebunt.

At vero, si non eorum, quod ita ipsi malunt, miserebor, non poterit certe mihi, non vobis, Florentini, non prudentissimo cuique viro tot ingenuorum una in domo conditio non miseranda vehementer videri. Unusne tam multis, in docendi generibus dissimillimis, sufficiet? an possunt omnia promiscue omnibus tradi? nihil inter lectionem scriptionemque differt? rhetoricæ præceptiones possunt grammaticis discipulis accommodari? non alia oratorum, alia poetarum est institutio? quid orationi cum carmine? quid figuris dicendi cum emendata loquutione? quid scriptori cum anagnoste? Alius alii sit impedimento necesse est. quantum uni tribueris, tantum furripueris alteri. non potes non aliquem negligere, qui omnes complecti velis: nisi autem omnes complexus fueris, certe aliquem negliges. Non intelligo, quid ista domestica institutione disci-

discipuli tam dispares adjuventur . temporis compendium , in ista tam multiplicis doctrinæ ratione , non video . ut multum operæ singulis culturæque impendatur , vix poterit quoque die sesquihoræ spatium unicuique contingere . quantulum autem est hoc , non dico ad discendi celeritatem , sed ad mediocritatem sciendi ? Tu mihi etiam scholas publicas criminaberis , ac nimis longam in iis esse institutionem quereris ? Quinque solidas diurnas horas eandem , ut dicitur , incudem tundimus . idem opus sive grammaticum , sive rhetoricum , sive poeticum sine intermissione urgemus . Ferrea sint licet , quæ tractamus , ingenia , cedant tamen repetitis ictibus necesse est , atque mollescant . aut nullum docendi discendique compendium est , aut hoc est profecto , eadem iisdem diuturna opera perpetuaque inculcare .

Placet , inquiunt , consilium : sic igitur faciemus : singulos singulis liberis nostris privatos doctores adjungemus , qui eadem assidue iisdem inculcent . id si fecerimus , profecto vicimus . neque enim tam celeriter publico doctori , qui tam multos vulgo suscipit instituendos , erudire suos licebit , quam privatis nostris , qui uni sese totos impendent .

Heic ego , tam subita tamque acuta istorum interpellatione oppressus atque percussus , quid tandem , Florentini , reponam ? quid me vos responsurum putatis ? Fortasse id dicam , quod dicturum me nemo vestrum suspicatur . Videte , quam non ego meam

sam agam, sed pro litteris, & pro publicis utilitatibus ac commodis laborem. Quod quidem mihi publicos doctores concessuros certo scio, nec me pravaricationis alicujus acturos reum, si, quod est plerisque mortalibus maxime gratum, reipublicæ autem ipsi prope æque salutare futurum, quamquam minus scholis ipsorum utile, hoc tempore dixerò. Ego vero, si qua in civitate tanta sit excellentium doctorum copia, ut singulis adolescentibus singuli excellentes doctores possint attribui, non dubitabo privatam istiusmodi institutionem si non publicæ anteferre, at certe cum ea propemodum, comparare. Ne sic quidem publicæ institutionis illa, quam quarimus, brevis celebritasque æquabitur: verumtamen neque tanta erit hujus privatæ diuturnitas, ut non, in hoc hominum tam insolenti publicarum scholarum fastidio, ferri quodammodo atque adeo negligi possit. Sed tam multos istos excellentes ubinam reperire doctores possumus? Fac reperiri. Ex iis ipsis quam multi a privato magisterio isto, humili, obscuro, ærumnosissimoque abhorrebunt? Quo magis excellent, eo minus volent: facultati obstabit ambitio: præstantia dignitate obruetur. At amplissimis præmiis propositis, promissisque ingentibus invitabuntur. Quid dicam hoc loco, plane nescio, Florentini. non enim divitias cujusquam civis, neque munificentiam satis novi. Unum tamen illud dicere non omitam, hoc vulgo in magistris sive privatis sive publicis conducendis accidere, ut, qui liberales in eos mu-

munificque esse vellent, ferme non possint; qui possent, nolint oppido. Nec vero nonnullorum etiam querelis non aliquando interfui, qui secum valde illiberaliter, & certe non ut pro sua opera atque in erudiendis pueris labore æquum erat, agi a parentibus dicerent. Quos quidem ita consolari consuevi, ut præteritorum memoriam temporum repetens, haud aliter in omni ætate cum magistris actum esse a parentibus doceam: soleoque illos ad luculentum sane auctorem Juvenalem (a) rejicere; qui, commemoratis insanis hominum, sua tempestate locupletissimorum, sumtibus, ita de eorumdem in filiorum magistros parsimonia avaritiæque testatur:

*Hos inter sumtus, sextertia Quintiliano,
Ut multum, duo sufficient:*

tum ad extremum, non sine quodam fatidico mentis instinctu, quo non suam modo, sed consequentes etiam ætates, nostramque hanc adeo complexus est, egregius vates ac plane vates exclamat:

*Res nulla minoris
Constabit patri, quam filius.*

Verum hæc ego, consolandi causa necessarios meos, aliquando soleo, non exprobrandi cujusquam divitis consuetudinem, commemorare. Sed profecto videtis, rationi illi atque instituto, singulos excellentes doctores singulis adolescentulis adhibendi, sive excellentium paucitatem, sive eorum ipsorum in summa etiam copia voluntatem,

F 4 five

(a) *Satyra VII. v.186.*

sive demum parentum parsimoniam adversari : ut omnino de talibus consultare , optantis magis sit , quam rem explicatam , quæque fieri in hominum vita possit , in medium afferentis .

Sed certe aliquis aliquando reperietur parens , cui & conducendi liberis suis egregii doctoris facultas suppetat , nec voluntas non suppeditet . Quid ? plus tum domestica , quam publica institutio valebit ? unus uni addictus plus proficiet , quam in scholis publicus doctor multis deditus ? Continget id fortasse aliquando : contigisse etiam nonnumquam possum concedere . Sed neque ex iis , quæ solent perraro contingere , agenda- rum in vita rerum constituenda ratio est ac moderanda ; neque certe id ipsum , quod aliquando sive contigisse , sive contingere posse confiteor , docentium facultati est , sed discipulorum præstantiæ singularibusque ingeniis tribuendum . Valet , si quando id evenit , vis animi excellens quædam , non disciplina : non ratio , sed natura dominatur . Da celeres in adolescente ingenii atque acutos motus ; da acre discendi studium ; da sciendi incensam atque inflammata cupiditatem : adde eo animi generosam quamdam indolem atque excelsam , quem vinci pudeat , qui he parem quidem ferre possit , sed primas in litteris petat ac concupiscat , gloriæque stimulis acerrimis concitetur : næ iste , tantis bonis ac dotibus cumulatus , haud multum sane magistri ullius institutionem requireret . Simul ac prima tradideris , ac , tamquam forti equo ac generoso ,

sta-

stadium curriculumque commonstraris, impiger ad metas sine duce aut rectore provocabit. Factum hoc etiam in scholis publicis & me discente commemini, & me docente expertus sum, ut incredibiles quidam ad omnem litteraturam talium ingeniorum, atque admirabiles cursus exstiterint. Quid, quod de Torquato Tasso, principe illo epici apud Italos carminis *Alite*, proditum memoriae est (a)? eum a Bernardo patre, vix-

F 5 dum

(a) In vita Torquati Tassi, ab Joanne Baptista Manso conscripta, & Florentiae anno 1724. edita, cap. 12. *Era di que' tempi venuta novellamente in Napoli la Compagnia de' Padri del Gesù: la quale comechè poscia abbia con maraviglioso processo scorso tutto 'l Cristianesimo, ed illustratolo con chiarissimi lumi di sapienza e di santità, allora tuttavia essendo picciola famigliuola, e di poco tempo prima ragunata, e non avendo molta fama, fu ricevuta da quella città, madre d'opere sante e magnifiche, nella vietta, che chiamano del Gigante: dove eglino aprirono in prima una picciola chiesetta, e le loro usate scuole; nelle quali cominciarono con maraviglioso frutto a seminare e nelle prediche e nelle lezioni santa e profonda dottrina. Nelle costoro scuole adunque Torquato, menando ancora il quart' anno degli anni suoi, fu dal padre mandato a compire gl' incominciati studj. . . Il che fece il fanciullo con tanto ardor d'animo, che non si lasciò mai cogliere dal nascente giorno nel letto: anzi assai sovente s'alzava di notte*
tem

dum quadrimum, meæ Sodalitatis hominibus, qui recens ludum Neapoli aperuerant, in publicam disciplinam traditum ac commendatum, usque adeo in litteris tamque celeriter profecisse, ut septennis & latinam perbene linguam nosset, & græcam non ignoraret, & versus & orationes scriberet, & ad coronam, quæ scripserat, recitaret.

Sed ego non exemplis singularibus abutar: non, quod aliquando, quod præter consuetudinem, quod alia fortasse de causa accidit, continuo id publicis scholis adscribendum putem. Quod more, quod plerumque, quod rei ipsius efficientia quadam naturaque fit, id in omni disputatione valeat, id omni causæ ac controversiæ suffragetur.

Sic igitur statuo: unius doctoris in uno erudiendo impensam atque occupatam operam minus vulgo esse utilem, quam multis in eodem genere institutionis addictam.

Qui

tempo; ed aveva così gran fretta di esser menato al maestro, che fu mestiero talora alla madre di mandarlo innanzi di co' doppieri accesi, per vedere la strada. Quivi fece egli così felici avvanzi, che in altri quattro anni apparso presso che perfettamente la lingua latina, ed in gran parte la greca, e per sì fatto modo le regole intorno all'arte del favellare e dello scrivere acconciamente ed in prosa ed in verso, che compiuto il settimo anno dell'età sua, compose e recitò pubblicamente orazioni e versi con nuova maraviglia di chi l'udiva. &c.

Qui tandem hoc demonstrari potest? Quia plus a multis unus, quam ab uno adjuvatur. Quid ais, o bone? (dicet aliquis) quæ rerum portenta narras? illudisne tu nobis, an te stultissima opinione ludi atque agi transversum finis? hoc quidem ridiculum est, magistros putare a discipulis adjuvari; nec docendi munus onus esse quoddam videre, quod, quo plures docendi sunt, eo magis, non minuitur, sed augetur.

Hoc mihi certe ignotum esse non potest, esse onus & sane grave ac permagnum, atque Ætæna (ut dicitur) gravius, docere. sed ne illud quidem ignorari a me existimandum est, discentiumne multitudine allevetur id onus, an graveſcat. Levius certe fieri, quicumque mercede docent, eoque levius, quo plures docent, confitebuntur. Verum iis quoque, qui non mercenariam operam suam locant, sed gratuitam impendunt, scitote idem videri, idemque usuvenire, ut multitudine potius discipulorum, quam paucitate subleventur. Quod oratoribus concio, quod recitatoribus cœtus, quod actoribus corona, hoc est auditorum frequentia doctoribus. Contrahuntur animi solitudine, afficiuntur, concidunt: languescit industria; frangitur actio; vox denique ipsa debilitatur. Nec modo ita fit natura: sed iudicio id etiam ac voluntate faciunt. Infani enim esse hominis arbitrantur, aut vocem validius intendere, aut actionem acrius commovere, aut vehementius animis concitari, denique non modice, non leniter, non remisse omnia aut eloqui aut agere, ubi vix

fit, qui te exaudiat, & cujus causa tantum contendere conarique debeas. Contra vero erigimur, recreamur, commovemur frequentia; causamque esse justam putamus, cur & voce & actione & animis excitemur, ubi plurimos in nos intentos, & tamquam ab ore pendentes nostro intuemur. Jam vero, quantum de ardore animi, deque actionis vocisque motu ac contentione remittitur, tantum de vi ac facultate sive docendi, sive persuadendi, sive efficiendi denique quidpiam in eorum mentibus, ad quos adhibetur oratio, fere deperditur: eoque minus ad comprehendendam, tamquam aliquam, Hammam, vim orationis atque doctrinæ est aptus auditor, quo frigidior ad eum atque languidior sive orator sive doctor accedit. Hæc scilicet nemo non ita contingere, ac necessario quidem contingere, intelligit.

Quod igitur possumus studium ab eo doctore, quam alacritatem, quam vim in docendo contentionemque expectare, cui, tamquam fabulam acturo, ædium angustissima maximeque abdita zothecca totum, theatrum sit, confessus spectatoresque puerulus? Exanimetur mente, actione torpescat, lingua etiam hæsitet necesse est. Non sim hunc ego valde esse doctum. æquius tolerantiusque tantas rerum angustias diritatesque feret indoctior. quo est enim quisque eruditior, hoc luce magis frequentiaque delectatur; hoc se majore theatro dignum putat.

Verum me quidem non magis iste dolor, certe miserandus, quam docendus ille, qui timidus ac verecundus, mærens, terramque intuens adstat, ingenuus puer movet, videor enim illi adesse, ac tamquam præfens præsentem intueri. O miserum atque infelicem, & certe non ista fortuna dignum! quid mæres, miser? quid me identidem adspectas? quid suspiras? quid ingemiscis? misericordiam tibi ego doloremque meum possum impertiri; solatium ac salutem non nisi parens potest. Qui tibi animus, miser, quæ mens, quæ vita soli cum solo, tristi, severo, horrido, fortasse etiam moroso, clamoso, plagoso, inhumano? nonne necesse est, ut aviculas videmus, a gregalibus cavea disclusas, despondere, macescere, interire; ita te misellum, æqualium cœtibus interclusum, tamquam cælo libero prohibitum, tanta in solitudine ac tenebris brevi contabescere atque emori? sed fac vivas: atque utinam felix diuque vivas. at non speret pater, te tanta confectum cura, tantoque mærore perditum, afflictum, exanimatum, lucis vitæque pertæsum, excitaturum esse umquam animum atque erecturum, & illos, quos somniat, in litteris processus celeriter esse effecturum.

Sed nos jam ex hoc privati laris, tamquam carceris, horrore ac solitudine ad publicarum scholarum lucem ac frequentiam conferamus. Nitent heic mihi omnia, rident, gestiunt. nihil squalidum, nihil triste, nihil obsoletum. placent mihi subselliorum illi ipsi gradus atque ordines; ut me ingre-

di

di quoddam theatrum existimem. placent
 pendentes parietibus coronæ, tubæ, vexilla.
 placent tam multa illa litterariæ, tamquam
 bellicæ, virtutis insignia; Pœnorum leones
 illi, Romanorumque illæ aquilæ placent; tanta
 magnarum rerum, ut in scena, ipsa imita-
 tio placet. Confessus vero ille tam frequens,
 tam honestus, tam splendidus tot ingenuo-
 rum; mundities, cultus, vultus illi ferocu-
 li, magnum quiddam ac præclarum miuitan-
 tes, cui tandem poterunt displicere? Quan-
 ta alacritas? quanta sedulitas? quanta æmu-
 latio? quæ spes? qui timor? quæ cura? in-
 genii enim mox est, memoriæ, doctrinæ,
 diligentia faciendum tanta in celebritate pe-
 riculum. Procedit ecce publicus doctor: gy-
 mnasii limen ingreditur. Omne murmur ac
 strepitus, si quis erat, illico conquiescit.
 Confurgitur: fit honestissima per salutatio: con-
 fiditur: nihil cessatur. Jubentur prodire ex
 adversis partibus aliquot, tamquam pugi-
 lum, paria, & in mediam arenam ad certa-
 men luctamque descendere, & memoriter in-
 signiorem aliquem veterum, sive oratorum,
 sive poetarum locum alternis vicibus recita-
 re. Consistunt in medio gymnasio duæ utrim-
 que adolescentulorum acies, magnorum exer-
 cituum instar atque animos gerentes. datur
 pugnae signum: conflagitur: recitatur. Qui
 cursus verborum, Deus immortalis! quæ
 linguæ celeritas! quam nulla hæsitatio! ut
 imminent adversarii! ut instant! ut urgent!
 ut moram afferre aliquam student! ut offen-
 dicula injiciunt! ut dejicere ac deturbare
 stantes omni ope vique conantur! neq, si
 non

non potuerunt, tamen animos demittunt: æque se vicissim restituros, neque loco movendos ac pervertendos confidunt; &, si non vicerint, non esse tamen vincendos sperant. Instauratur de integro certamen: atrocior pugna committitur. hos successus ferociores, illos anceps prælii eventus ex omni parte cautiores facit. Fit clamor, impetus, incursus. petitiones propemodum gladiatoriae conjiciuntur. aliquæ declinantur, non omnes. qui enim id in tanto animorum ardore ac pertinacia possit? Heic lapsus aliquis concidit. Clamorem victores tollunt; gestiunt, exsiliunt, gratulantur: supplicationem prope sibi decerni ac triumphum postulant. Silent contra victi, dolent, indignantur, illacrymant. Excedunt, tamquam faucii, ex acie. Integri recentisque succedunt, qui hostium effrænatos impetus atque insolentiam frangant ac comprimant. Pugnatur rursus infestissimis animis: stat aut gloriose vincere, aut honeste cadere: hæret vir viro, pes pedi: manus manu conseritur: vi geritur res. pulvereæ adeo nubes, pedum supplensione & corporum agitatione, tolluntur. Quod ubi doctor animadvertit, rem plus nimio calere, & prope ad interuersionem atque exitium adduci, furentes auctoritate sua nutuque cohibet, atque, ut Virgilianus ille Æolus,

Mollitque animos & temperat iras: (a)
collaudatisque victoribus, præmioque ornatis, &, tamquam bonus imperator, suorum

(a) *Æneid.* l. v. 61.

rum virtute rebusque gestis vehementer lætatus, receptui cani jubet; sed ita, ut faciat tamen victis certaminis in alio quodam genere potestatem. Non pugna desistitur, sed locus atque arma mutantur. Scribendo, interpretandoque decertant. Pugnatur eminus nihilo segnius, quam modo pugnatum est cominus. idem animus, eadem vis, eadem rerum fortunæque vicissitudines. Ita, post multas in acerrima contentione consumptas horas, cum se, propter ardorem animi, tamdiu contendisse vix sentiant, in castra præclaræ cohortes dimittuntur; domum disceditur; curantur corpora. Ad aciem, ad solem, ad pulverem haud ita multo post reditur: eaque toto anno perpetua sibi que succedens exercitatio in scholis publicis contentioque servatur.

Heic mihi quisquam audeat segnem illam privati doctoris atque intermortuam disciplinam objicere, aut vero etiam commemorare? quisquamne privatas scholas publicis anteponat, facilioresque in illis, quam in his, doctrinarum esse cursus contendat? Quid illis magis impeditum? quid autem his commodius atque explicatius? Heic frequentia, illic solitudo; heic alacritas, illic torpor; heic contentio, illic quies; heic æmulatio, illic securitas: denique in illis statuere hoc nemo possit, plurane incommoda docentium facultatem, an discientium industriam remorentur; contra in his omnia sunt cum ad discientium utilitates, tum ad docentium rationes maxime accommodata. Agitur heic semper aliquid, in litteris assidue.

due vivitur; non torpent animi, non languescunt: laude, ignominia, spe, timore, præmiis, suppliciis excitantur. Quam potest quisquam hinc exsistere docendi moram, quam discendi diuturnitatem comminisci? nonne omnia eo potius referri ac collineare intelligimus, ut quam fieri potest celerrime brevissimeque discatur?

At doctrinæ tradendæ turba obstat; nec, perinde ut uni privatus, ita multis potest se totum publicus doctor impendere.

Quid, si non unus privato, sed plures, ut vulgo fit (nam quid in re quotidiana atque perspicua diutius illudi patiamur?) quid, si, inquam, non unus privato, sed plures sint adolescentuli adolescentulæque simul instituendæ? nonne domestica hæc etiam turba doctrinæ tradendæ obstare existimabitur? singulisne se totum poterit, idque in dissimillimis doctrinæ generibus, privatus doctor impendere? Cur ea publicis scholis a privatarum patronis objiciuntur incommoda, quibus privatæ ipsæ vacare non possunt? quid unus iste uni addictus tam sæpe jactatur, si non uni plerumque, sed multis, iste nescio quis unus addicatur?

Sed esto; uni addicatur: quid tum? an minus unus non uni in scholis publicis sufficit? Non sufficere, possum fortasse in iis publicis scholis concedere, ubi multa multis ab eodem doctore traduntur: quas ego scholas sive a defensione mea rejicio ac separo, sive, quoniam id non est necesse, ab aliis commodis, quæ sunt illis cum nostris communia, emolumentisque defendo. At vero in

in reliquis publicis plerisque scholis ; in quibus singulae separatim disciplinae ejusdem ordinis adolescentibus explicantur , ubi eadem discipulorum est institutio , unaque docentis opera praecipioque consumitur , non magis doctrinae tradendae turba , quam exaudiendae doctoris voci , impedimento esse potest . Non , quod multis dicas , minus singuli exaudient : neque minus singuli discant , quod multos doceas . tota singulis auditoribus unius vox una contingit : tota discantes singulos institutio una unius informat . quae grammaticus doctor grammaticae auditoribus , quae Rhetoricae , Poeticae studiosis aut rhetor aut poeta praecipere multis solet , profecto non plus valeret , si uni , non multis , praeciperentur . non igitur obstat in scholis publicis turba praecipis . Num emendationi scriptorum ? id enim est alterum , quo praecipua earum doctrina continetur . nam tertium illud , *Interpretari* , vel commode ad praecipia revocari potest , vel certe non habet praceptorum dissimilem rationem . ut enim multis simul eadem praecipimus , sic eadem multis simul interpretamur . quartum autem , quod nonnulli addunt , *Memoriam excolere* , a scholasticis exercitationibus sejungo . domo enim afferuntur , quae in scholis memoriter pronunciantur . Una igitur scriptorum emendatio relinquitur : de qua illud brevissime dicam , non modo non impediri eam turba , sed adjuvari .

Cognoscit domi privatus doctor , quae scripsit alumnus suus : in qua quidem re ,
 quae

quæ ad ejus, quem instituit, eruditionem præstat, sive præstare debet, fere illa sunt, quæ sapiens poeta (a) diligenti alienorum versuum censori facienda præcipit:

*Vir bonus & prudens versus reprehendet
inertes,*

*Culpabit duros, incommis allinet atrum
Transverso calamo signum, ambitiosa re-
cidet*

*Ornamenta, parum claris lucem dare co-
get,*

Arguet ambigue dictum, mutanda notabit.

Habetis a privato doctore scriptorum emendationem. Num quid reprehendo? nihil sane. recte enim omnia atque ordine facta video; nec uni ab uno melius consuli posse intelligo. Sed mihi dicite, amabo vos: si plures, non unus, illud idem scriptum ad privatum hunc doctorem attulissent, atque eadem, quæ unus ille, peccassent, minusne cæteris una illa unius emendatione consuleretur? Certe non minus. æque enim omnibus, qui eadem peccassent, eorumdem peccatorum emendatio prodesset. Quid, si alia ille unus, alia plures illi peccassent? Nempe tum unius peccatorum reprehensio iis etiam, qui illa vitassent, valde conducere: sive quod, cum casu illa, non ratione vitassent, æque de illis admoneri eos utile est, ac si nequaquam vitassent; sive quod peccati, etiam judicio ac voluntate vitati, reprehensio atque notatio vehementer ad ejus cum certiore scientiam, tum firmiorem memoriam diu-

(a) Horat. in Arte poet.

diuturnioremque facit; five denique quod objurgatio illa, aut etiam animadversio, quam in unius reprehendendis peccatis, castigandaque segnitie adhibere doctores solent, reliquos a peccando non modo in eodem, sed etiam in similibus peccandi generibus continet. Hanc igitur multiplicem utilitatem ex unius peccatorum reprehensione turba perciperet. Quid? unus ille, e cuius reprehensione tanta doctrina in reliquos, tamque insignis utilitas redundaret, num vicissim posset ex aliorum peccatis ac reprehensione proficere? Non posset: siquidem sola ipsius a doctore, illi una addicto, peccata corrigerentur. Esetne hoc illi utile? Immo valde quidem adversum, & discendi celeritati maxime infestum. Possumusne aliquam rationem excogitare, qua hic quoque unus hac in doctrinæ parte adjuvetur, & ne tantis utilitatibus fructuque careat? Possumus, & facili quidem negotio possumus. Qui tandem? Reliquorum etiam, quos ad privatam hanc scholam accessisse, atque idem, emendandi causa, attulisse scriptum fingimus, a privato doctore peccata proferantur, reprehendantur, castigentur. eandem tum unus utilitatem ex multorum prolatis, reprehensis, castigatisque peccatis consequetur, quam consequi ex unius emendatione multos vidimus. Placet ita fieri? Quid ni placeat, si non alia ratione possumus huius unius cumulationi eruditioni doctrinæque consulere? Quid hoc? nonne, si ita fiat, tum ad emendationem scriptorum, maxime discantibus profuturam, turba advocatur?

an non animadvertitis, e domestica nos in publicas esse scholas delapsos? nonne publicum e privato doctorem fecimus? nonne ab illo unum adolescentulum, quo commodius is atque utilius institueretur, abduximus, & inter æquales in scholis publicis collocavimus? Satisne videmur confiteri (si res una illa, cui maxime turba obstat videbatur, scriptorum nempe emendatio, discipulorum multitudine non impeditur, sed adjuvatur) reliquam publicarum scholarum institutionem longe privatæ multumque præstare, & ad celeritatem discendi esse maxime accommodatam? Nam quid dicemus? Commodius una in domo multiplicem disciplinam disparibus alumni impertiri, quam in scholis publicis eandem cum paribus discipulorum ordinibus communicari? Hoc quidem cum rationi, tum rei ipsius naturæ adversari perspicuum est. An promtiores ad unum modo docendum alacrioresque privatos, quam ad multos instituendos publicos doctores accedere? At solitudine concidere animum docentibus, facultatemque minui; contra excitari illum frequentia, hanc autem augeri constat. Discendumne studia, privata institutione commoveri, publica retardari? At torpere solos, acui autem congregatis industriam, fierique eos ex æmulatione assiduaque inter se contentione sollertiores vidimus. An denique præcipiendi, interpretandi, emendandique rationem uni magis accommodari? quam nemo est, qui non æque pluribus convenire, sine cujusquam detrimento, intelligat: cum præfer-

fertim ipsa scriptorum emendatio in turba
utilior ac multitudine evadat. Quid igitur
dubitamus, publicas scholas, in invidiam
ab obtrectatoribus imperitisque hominibus
vocatas, & atrocissimi maleficii reas injuria
factas, sententia nostra absolvere; &, lon-
ge ab iis diuturnitatis in docendo abesse cri-
men, pronunciare? Dixi.



ORATIO VI.

IN ADVENTU

FRANCISCI III.

LOTHARINGIÆ, BARRI

ET MAGNI ETRURIÆ DUCIS

AD FLORENTINOS

CORAM

ZENOBIO DE' RICCI

ORDINIS

HIEROSOLYMARIÏ EQUITE COMMENDATARIO

ET EJUSDEM MAGNI DUCIS A CUBICULO

*PRINCIPIS MANDATO AC NOMINE**PRÆSIDENTE*

HABITA

IN ÆDE S. JOANNIS EVANGELISTÆ

VII. KAL. MARTIAS MDCCXXXIX.

I vestrum incredibilem mærorem, Florentini, in acerbissimo luctuosissimoque JOANNIS GASTONIS PRIMI funere, non obscuris doloris significationibus collegii hujus sodales olim prosequuti sumus, dabit isisdem, opinor, hanc veniam, ut summam lætitiā vestram in auspiciatissimo jucundissimoque FRANCISCI TERTII adventu, publica etiam atque illustri gratulatione prosequamur. neque enim minus æquum vobis debet videri, lætari nos in vestris felicitatibus, quam mæstos in acerbitati-

tatibus fuisse. Certe, si non tantam in fecundis rebus vestris præ nobis lætitiā ferremus, quantum mæroris atque tristitiæ in adversis ostendimus, simulatus ille ipse dolor videri posset, nec magis vestra causa, quam privato nostro aliquo incommodo esse susceptus. non enim possumus acerbe casus tristes aliorum ferre, ut non iidem iacunde prosperos ac fortunatos feramus. Ac tum quidem vox oratoris audita est nulla ex hoc loco; vel quod propter vim inusitati doloris obmutueramus, vel quod nulla orationis nostræ facultate levare ægritudinem vestram posse consideremus, vel denique quod consolandi provinciam melioribus auctoribus integram reservari malleamus. at vero in hoc tempore, domestico etiam ex nostroque numero esse locum oratori intelligimus. neque enim aut lætitiæ comes est taciturnitas, aut non aliquem voce etiam nostra lætitiæ vestræ cumulum asferre nos posse speramus, aut, etiamsi gratulationis officium æque commode atque alios exsequi te posse diffidas, idcirco esse prætermittendum homines arbitrantur. Ego autem, cui hæ partes impositæ sunt ac demandatæ, vobis ut, in recentissima hac tantaque lætitiā vestra, omnium meorum sodalium nomine gratuler, fatis me illis meoque muneri esse faciurum confido, si lætitiæ hujus ipsius vestræ causas mea oratione complexus, & felicitatem vestram in FRANCISCI TERTII fortunatissimo imperio retentam ac constitutam commemorans, jure ac merito tantopere lætari vos ejus adventu præsentiaque docuero. Vos
quæso

quæso atque obtestor, ut me de felicitate vestra, maxime libenti animo studioque dicentem, benignitate atque benevolentia ea, qua consueſtis, audiat.

Ac primum quantæ felicitati vestræ tribuendum est, Florentini, quod sine ulla hostilis belli vobisque calamitosi non modo vi aut impressione, sed ne terrore quidem aut suspicione, etrusci hujus imperii tanta sit nuper facta mutatio; eaque tranquillitate ac quiete novus hic repente dominatus statusque rerum constitueretur, ut non externus atque longinquus accitus, sed domesticus & paratus ac præsens adscitus esse heres videatur? Repetite ac vobiscum ipsi recordamini præteritorum temporum memoriam, vetustissimis annalium monumentis ac litteris consignatam. Vix reperietis, sine gravibus bellis summaque rerum omnium perturbatione atque hominum maximis calamitatibus, alienorum in vacua imperia successiones contigisse. Quæ quidem ego bella ut justissima plerumque, nec, nisi legitimi juris obtinendi voluntate aut certe opinione, fuisse suscepta concedam: tamen vehementer miseras ac calamitosas videri eas gentes necesse est, de quarum imperio, vel justissimo jure, utrimque certatur. Quin etiam, quo justius cepisse arma sibi pars utraque videtur, eo acrius pertinaciusque contendunt, eo minus ab injuriis ac detrimentis inferendis abſistunt: contingitque nonnumquam, ut miserandum in modum diripiantur urbes, regionesque vastentur eæ, quarum possessionem ac fructum sibi quisque

deposcit, belloque persequitur: ut sæpe is, qui vicit, non satis, aut ubi consistat, aut quibus imperet, habeat. Veritus enim, ne suum facere non posset, quo de contendebat, perdere illud maluit, quam suis hostibus concedere; cumque adimere illis vellet, quod possiderent, sibi vix, quo potiretur, reliquit. itaque sic tandem domini plerique evadunt, ut eos, quos appetere ac propemodum deperire videbantur, partim perdiderint, partim affixerint; & in fidem amicitiamque recipiant, quos ante tamquam adversarios atque hostes tractarunt, quorumque bonis atque fortunis bellum funestissimum intulerunt. qui quidem si imperium moderate ferunt, fortes eos ego atque etiam sapientes appellare possim; felices ac fortunatos appellare quis possit? Vos prope uni, Florentini, in omni fere temporum memoria, hoc assequuti estis, ut, vetustis dominis amissis, in novorum potestatem, sine partium contentione ac sine ulla vestra calamitate, veniretis. inventus est, qui ita præesse vobis atque imperare voluerit, ut, nisi vobis rebusque vestris salvis atque incolumibus, imperium recusaturus videretur; qui non aut improvidos occuparet, aut invitos ac repugnantes caperet, aut, quos alii etiam deposcerent, sibi uni vi atque armis vindicaret: sed volentes atque exoptantes, nemine interveniente aut recusante, non tam sub ditionem ac potestatem redigeret, quam in suam fidem patrociniumque reciperet; qui denique non otium vobis ac tranquillitatem bello turbisque ac

jactu-

jaëturis vestris quæsierit, sed beatissimam pacem ac sempiternam pacis adjumentis atque insignibus constituerit : ut non iratus vobis Deus immortalis, id quod nonnulli suspicabantur, ob aliquod delictum, qui optimum vestrique amantissimum principem e medio repente sustulerit, sed certe placatus atque amicus sit existimandus; qui, siquidem illa eventura erant, quæ acciderunt, ita res admiranda quadam providentia gubernarit, ut, in tanta imperii, tamquam orbis, conversione, vix impressam orbitam videretis; mutatisque repente dominis, vestræ pristinae felicitatis minime esse immutatam conditionem sentiretis. ita vobis superior est princeps ereptus, ut continuo sit alter maxime opportunus ac commodus, Dei benignitate, donatus; nec ille successorem imperii hunc temere fortuitoque nactus, sed consilio ac voluntate destinasse & reliquisse heredem videatur. certe, si non JOANNES GASTO sine liberis decessisset, si moriens, id quod tunc optabatis, filio aliqui suo imperium atque opes suas tradidisset, non video, qui tranquillius id ac minore cum rerum vestrarum motu transigi, qui melius tum vobis, Florentini, consuli posset.

Sinite me, quæso, hoc loco, recentis lætitiæ vestræ augendæ cumulandæque causa, paullisper veteris doloris vestri memoriam recordando renovare. neque enim reficere vulnus illud commemorando, sed obduci plane cicatricem, si qua hiabat, præsentium rerum adspectu volo. Scio, id

vulgo in principibus, iis præsertim, quibus diu mansuetis ac commodis usi sumus, expeti atque efflagitari, ut, siquidem mori ipsi debent, non toti quodammodo moriantur; aliquemque ex sese genitum ac procreatum, in spem generis submittentes, suam quamdam expressam in eo vivamque imaginem hinc abeuntes relinquant. quod ubi contingit, levatur magna ex parte in principum suorum obitu luctus populorum. non omnino destitutos sese homines unius morte arbitrantur, quos alicui ex eadem stirpe superstiti concreditos & commendatos intelligunt: paternamque in filiis atque avitam virtutem, animos præsertim illos liberales, mites, amantes, de suis populis unice sollicitos atque anxios, esse iterum revocandos atque instaurandos confidunt. hac illi spe erecti atque elati, nihil tam averfantur atque exhorrescunt, quam suorum principum orbitates, nihil tam exoptant ac possunt, quam regis sobolis propagationem: quam si impetrarint, præsertim post longam votorum spem atque expectationem, videmus, eos præ gaudio, non gestire atque exsultare, sed propemodum insanire. Non possum equidem, quod bonum plerisque mortalium videtur, non bonum ducere. nisi multæ ac magnæ utilitates in principum liberis ostenderentur, non tantopere de iis expetendis atque efflagitandis fere universæ gentes consentirent. inest profecto sua commoditas, & ad plurimas cum publicas, tum privatas res, in perpetua principum ex eadem gente successionem, opportunitas. fruuntur

tur sane eo bono, quibus datum est; quo vos etiam, Florentini, si ita superis visum esset, frueremini. verumtamen sic intelligite; alia vobis ratione, atque haud scio an commodiore, a Deo immortalis, cui certe estis carissimi, esse provisum. nihil esse video de vestra felicitate detractum. detractum dico? aliquid etiam esse illi additum confirmo. etsi enim, nascentibus principum liberis, populorum sit tanta lætitia; eaque re una homines maximum reipublicæ bonum suamque omnem incolumitatem contineri ac dignitatem putent; tamen, quam sæpe sua ipsorum spe atque opinione fallantur, nec causam fuisse, cur tantopere iis nascentibus lætarentur, quos adultos parum sibi aliquando commodos, sive imbecillitate consilii, sive naturæ ac voluntatis pravitate, experiuntur, testantur scilicet quotquot in hereditariis imperiis non boni principes exstiterunt. Quod si, jam tum in nascendo, quales futuri essent, aliquo certo signo atque indicio declararetur; si de eorum sapientia, justitia, liberalitate, de reliquis virtutibus, quibus rempublicam administraturi olim sunt, tanto ante sciri ac provideri sine ullo errore posset: tum profecto, liquida plane atque sincera, nec ulla metus aut suspicionis acerbitate permixta, populorum voluptas & in recens natis principibus lætitia illa esset ac gratulatio iustissima. ac ne tum quidem non aliquid tamen ad eam augendam ac cumulandam posset accedere, si, quæ bona in universos olim profectura conspicerentur, eorum fructus,

tionis molestia, sed quod tanta nobilitate conspicuus, tantis virtutibus præditus, tam denique vestri amans vobis princeps obtinuerit.

Si generis vetustam neque interruptam claritatem spectarimus, audebo dicere, ne si optio quidem daretur, ex clariore magisque nobilitata gente deligi potuisse. ab ipso Carolo, Francorum rege, in quem longo intervallo Romanorum vetus imperium revocatum est atque translatum, quique non populari assentatione, sed incredibilium virtutum admiratione, Magni cognomen est consequutus, Lotharingicæ familiæ hujus duci primordia non ignoratis. Num multas toto orbe terrarum familias arbitramini tam antiqua, tamque illustri posse nobilitate censerî? nonne, si quæ amplissimæ existimantur, ab eodem illo, auctore ac principe amplitudinem suam repetant necesse est? nam, quam multi ex hac gente tum bellum domi præstantes ac plane singulares viri deinceps atque admirandi prodierint, quibus imperiis atque honoribus, quantaque nominis celebritate floruerint, quid me attinet commemorare? Possem Gothofridum Bullionium, illum, cujus ductu atque auspiciis iter est ad Hierosolymorum urbem, antea obstructum atque interclusum, Barbarorum internecione, nostris exercitibus patefactum; & religiosissimum, illud humani generis ad salutem, Deo vindice, revocati, monumentum, Christi sepulchrum, ex hostium ditione ac potestate ereptum, populo christiano est restitutum: possem

duos Carolos , quartum & quintum , Lotharingæ clarissimos Duces : possem duos Guisæ item Duces , Franciscum atque Henricum : possem innumerabiles alios proferre ; qui , cum pacis artibus apprime florent , maximis bellis , præsertim pro Religione suscipiendis , perfecerunt , ut , non cum aliis , sed secum ipsi de summa dignitate & in omni laudis genere præstantia certare viderentur .

Verum me rapit ad se jam dudum , & quodammodo absorbet orationem meam , FRANCISCI TERTII incredibilis vis animi ac magnitudo , pietas , moderatio , sapientia , justitia , fortitudo , virtutes omnes ; quibus majores suos non tam singulos æmuletur , quam unus exhibet universos : quæ quidem tantæ sunt , ut constitui satis ac adjudicari non queat , plusne ille majoribus suis , an illi majores sui debeant , & num ille ex suis , an sui ex illo crescant . hoc brevissimum dictu est , idemque verissimum , non egere alienis laudibus , qui abundet suis ; nec , si nullos tales ex sua gente majores habuisset , idcirco hos hominem , satis per se cognitum atque spectatum , minus admiraturos . Quo quidem loco hoc mihi levius onus imponi video , eoque me breviorum esse oportebit , quod FRANCISCI TERTII virtutes cum notissimæ vobis , tum etiam summa in admiratione sunt : ut earum a me non modo exornatio , sed ne commemoratio quidem quæri aut expectari videatur : quorum alterum molestum vobis , de notissimis rebus a me doceri ; alterum
mihi

O R A T I O VI. 153

mihi periculofum ac turpe, ipfi illi, quem exornare velim, incommodum atque inimicum, fi forte opinioni de illo veltræ mirificæ, ampliffimisque judiciis minime orationis meæ ftudio celebrandi hominis ac facultate responderem. Perficiam tamen, ut neque in virtutum ejus commemoratione verfer, & tamen intelligatis, ita me univerfus fuiſſe complexum, ut a nemine neque diſtinctius explicari, neque uberius ornari amplificarique potuerint. adefſote igitur animis, quotquot heic adefſis corporibus, & me de FRANCISCI TERTII virtutibus nullam præcipuam commemorantem, ac tamen nullam prætermittentem, diligenter attendite. neque enim vereor, ne aut quidquam mihi arrogaffe, quod præſtare non poſſim, aut quidquam FRANCISCO, quod illi debeatur, videar derogaffe. breve eſt, quod dicam, ſed quo uno & fidem meam liberaro, & omnia illi ſumma conceſſero.

FRANCISCUS TERTIUS iſt eſt, cui CAROLUS SEXTUS, Imperator Auguſtus, & ſummam belli græviffimi contra Turcas commiſerit, & MARIAM TERESIAM, filiarum maximam natu cariffimamque, deſponderit. Potuitne FRANCISCUS TERTIUS magnificentiſſus, cumulatiſſus, explicatiſſus a me, quam ſapientiſſimi Cæſaris tanto ſtudio judicioque laudari? quæ poteſt huic, bellica præſertim, virtus abeſſe, quem ſuis provinciis in poteſtate retinendis, ſui nominis dignitatî conſervandæ, Chriſtiano imperio ab immaniffimis gentibus tutando, omnium mortaliſſum ſecuritati præſtandæ, CAROLUS Cæſar

G 5 præ

præposuit, & Eugenio illi magno atque invidiissimo subrogavit? non possum magis laudare Cæsarem, quam Cæsarem appellando: neque ulla major FRANCISCI TERTII laudatio esse potest, quam tanti a tanto Cæsare fieri.

Agite vero: quanta ejusdem hominis dignitas ex eo, immo vero in eo declaratur, quod idem Cæsar dignum judicaret, cui filiam carissimam, electissimam, faminam, in matrimonium daret? Non ille hunc delegisset, si quem magis probasset: & certe alium probasset, si quem potiorē reperisset. præter enim patriam caritatem illam, qua parentes in liberos natura sunt propensi, ut eos etiam, qui minus videntur diligendi esse, maxime diligant, eisque optimam vivendi conditionem facultatemque comparant; illa etiam Cæsari amoris erga filiam, & paternæ de ea bene, ex animique ejus sententia, collocanda, curæ ac sollicitudinis causa accedebat, quod pro lectissima, nec suo modo, sed omnium gentium amore dignissima femina laborabat. capiebatur mirandum in modum eximia virginis honestissimaque forma; in qua neque majestas pulchritudinem desideraret, nec pulchritudo quidquam de majestate decerperet; ut altera re matrem pulcherrimam, altera verendum augustumque patrem, mira quadam utriusque rei confusione ac temperamento, referret: indolem præsertim egregiam, suavissimos castissimosque mores, perspicax ingenium, plurimarum rerum scientiam, dicta, facta filia rarissimæ non modico neque usita-

usitato patrum amore, sed immenso quodam ac singulari prosequabatur. Huic tantæ tam eximiæque virtuti pari virtute vir quaesitus est; quem non modo Cæsar, verum etiam Cæsaris filia, cui maxime consultum in hac quidem re ipse Cæsar volebat, tanto conjugio dignum judicaret. Habetis igitur utriusque gravissimis judiciis, CAROLI MARIEQUE TERESIE, FRANCISCUM TERTIUM reliquis prælatum omnibus: ut omnes summasque virtutes constitem sit inesse ei, quem Cæsar sibi generum legit, Cæsaris filia sibi conjugem optavit. Si quis adhuc, quanta sit FRANCISCI TERTII dignitas atque amplitudo, non satis intelligit, nec de ejus universis maximisque virtutibus satis a me esse dictum arbitratur, is specie quidem mini facultatique meæ non nihil detrahit; re autem vera plus, quam ego velim ac res ipsa patitur, tribuit atque concedit. majorem enim orationi meæ, quam tantis, quantas attuli, auctoritatibus fidem habiturus videtur, qui meæ potius vocis auctoritatem ac testimonium requirit. Ego autem nihil mihi, omnia tribui veris argumentis ac rationibus volo.

Vobis igitur mirifice gratulor, Florentini, omniumque gratulatione felicitatem vestram prosequendam censeo, qui Cæsaris Filiaque Cæsaris judicio probatum, hoc est, omni virtutum, quæ cadere in hominem possunt, genere præditum atque ornatum principem nacti estis. Qui si idem amore est erga vos incredibili quodam ac singulari, si tantarum virtutum fructum in ve-

stram incolumitatem ac commodum est collaturus, ac sui quodammodo oblitus de vobis est unice cogitaturus; immensum quiddam atque infinitum est, quod ad vestram totiusque Etruriæ felicitatem accedat. De quo ne dubitare possitis, duo illa paullisper tempora animis vestris proponite: alterum, quo primum fuit huic imperio destinatus; alterum, quo nuper ad vos ex Germania venit. nihil illo vestri vestrorumque commodorum amantius fieri aut cogitari posse intelligetis.

Lotharingæ, quæ Galliæ Belgicæ regio est multo amplissima ac florentissima, FRANCISCUS TERTIUS imperitabat. erat id ei paternum avitumque & ab ultimis usque maioribus, jure hereditario, traditum ac commendatum imperium: quod ita diligenter ac studiose retinebat, ut in eo conservando suas omnes totiusque posteritatis suæ fortunas esse positas & constitutas arbitraretur; nihilque mallet, quam inclyto conjugio, affluentibus copiis ac multiplici prole florescentem, patrio inter suos regno consensescere. Colebant autem eum populi sic ac diligebant, ut sua bona sibi diripi, vitamque adeo eripi mallent, quam suum ab se divelli principem ac distrahi passuri esse viderentur. Ecce autem de Etruriæ successore subrogando, vestris temporibus ita poscentibus, & de florentissimo hoc imperio FRANCISCO TERTIO committendo agi cœptum est. Cohorruit Lotharingia univèrsa improvise acerbissimoque nuncio: vox propemodum ac spiritus est, tam horribilis calamitatis denun-

nunciatione ac metu, omnibus interclusus. mærebant, afflictabantur, prope exanimati concidebant. denique, cum jam nihil in vita fore posthac iacundum sibi, FRANCISCO amisso, considerent, crudelem vitam abrumperere ac mori potius, quam in tanta rerum suarum acerbitate versari cupiebant. una modo spe illa sustentabantur animi, fore, uti conditionem FRANCISCUS nequaquam acciperet, suorumque rationes potiores, quam alienorum duceret. verum, ubi non ita esse intellectum est, ac de vestris commodis cogitantem illum Etruriam Lotharingiæ præferre senserunt: tunc enim vero desperare rebus suis omnino cœperunt; & vicem dolentes suam, fortunæque inconstantiam atque impetum inculcantes, durius secum agi, quam cum cæteris gentibus, atque atrocius statuerunt. etenim cæteris eripiuntur fere principes necessitate moriendi atque natura; sibi viventem atque adeo vigentem florentemque eripi intelligebant: ut in acerbissimo suo gravissimoque casu non expectata communis humanitatis conditio, sed multo ante repræsentata videretur. Ex sensu doloris vestri, quem tam acerbum, Florentini, in obitu superioris principis, non sine ratione iustissimisque causis, suscepistis, quam graviter Lotharingi abitum sui principis atque amissionem tulerint ac ferre debuerint, existimare potestis. nam in obitu quidem vel carissimorum, etsi gravi dolore ac desiderio angimur, tamen, cum naturæ repugnare, nec necessitati fatoque parere minime sani esse sentiamus, ratione in

in consilium advocata, naturales illos immoderatosque motus, ubi paullulum sese effuderunt atque jactarunt, cohibemus continuo atque comprimimus. at vero in carorum hominum discessu, quos non mortali conditione, sed casu voluntario aliquo in perpetuum amittimus, non a natura, cui esse acquiescendum putamus, sed ab hominum iniquitate, cui resisti ac repugnari in nostris incommodis posse atque adeo debere censemus, invadi nos ac violari arbitramur; ut iniquius aliquando atque ægrius vivorum, quam mortuorum discessum atque discidium feramus. Neque hæc FRANCISCUS non intelligebat; quantoque in mærore Lotharingi, profectione illa sua ac fuga, futuri essent, videbat. erat illi grata ac jucunda tanta suorum erga se studii benevolentiaque significatio; amabat amorem; dolore ac luctu commovebatur. verumtamen obversabatur illi ante oculos Etruria; quæ illecebris nescio quibus suis, occultaque quadam amoris vi ac vehementi, eum ad sese rapiebat potius, quam invitabat. cessit enimvero blandissimo lenocinio; tradidit sese atque addixit Etruriæ; vosque jam tum mente animoque complexus, alienos prætulit suis, nec, nisi vos, duxit suos.

Hoc quantum est, Florentini! quam inusitatum! quam inauditum! quantaque in eo incredibilis erga vos vis amoris ostenditur! neque enim mediocribus quibusdam vinculis adstricti patriis quisque regionibus retinemur. heic incunabula, heic sedes, heic gentis insignia, heic monimenta majorum,

con-

consuetudines amicorum, conjunctiones propinquorum, senectutis perfugium, &, vel in ipsa morte, multa tot inter caros solatia, funeris piæ complorationes, sepulturae domesticæ religiones. itaque sapienter inductus esse a summo poeta (a) prudentissimus vir Ulysses existimatur; cui cum Calypso immortale ævum, secum si perpetuo manere vellet, polliceretur, negavit; Ithacamque illam suam, in asperrimis saxis, tamquam nidulum, affixam, ipsi immortalitati anteposuit. Nimirum omnes omnium caritates: Patriæ caritas vincit. sed hanc ipsam tamen rerum omnium victricem caritatem FRANCISCI TERTII inaudita erga vos atque incredibilis caritas vicit. statuit, hanc, quæ vestra patria est, sibi non esse alienam; illam, quæ vestra non esset, non duxit suam: ac, tamquam inter vos vobisque unice natus esset, vobis inter vos ac vobiscum vivere, animum vestri amantissimus princeps induxit.

Jam, quale ad vos iter, abdicato Lotharingiæ imperio, proxime instituerit, extremo loco cognoscite. expleri felicitatem vestram ac plane cumulari, tanta ac tam singulari amoris significatione, intelligetis. Professionem ille quidem aliquamdiu italicam distulit; neque statim, ac vester esse princeps cœpit, vobis præsentiae suæ copiam fecit. maximo difficillimoque bello implicatus, quo bello rei Christianæ salus ac dignitas agebatur, itineris faciendi tempus publicis temporibus esse transmittendum putata-

(a) *Homer. Odyss. l. v.*

tavit. verum ille ita a vobis abfuit, ut vestra etiam incolumitati atque otio tam maxime prospexerit, suisque laboribus atque periculis, sollicito animo atque amantissimo consuluerit. non ferocissimorum hostium impetum atque immanitatem pertimescebat, non ullam dimicationem, non ullum vitæ discrimen in acie atque in præliis pro communi, vestraque potissimum, salute deprecabatur. equidem de tanto imperatore non possum dicere, cavisse eum sibi aliquando, quo caveret vobis; vitæque suæ aliqua in re pepercisse, ut eam vestrae felicitati ac bono reservaret. illud mihi videor vere esse dicturus: si quid illi, in tanto bello quotidianisque contentionibus atque periculis, humanitus accidisset, non id fortissimo viro doliturum fuisse, quod vitam, naturæ debitam, immortalitati ac gloriæ redderet; sed quod vestro conspectu, multo jucundissimo atque exoptato, antequam e vita excederet, caruisset. Sed omen tristissimum atque horribile ac omne periculum superi averterunt; sibi vobisque servarunt; incolumem atque victorem præstiterunt. Ponuntur arma; miles in hiberna dimittitur; res bellicæ paullulum conquiescunt. Num heic FRANCISCUM etiam, num amantissimi principis de vobis curam ac sollicitudinem, num desiderium quamprimum videndi vos, Florentini, conquieturum putatis? Iter illi ex Hungaria continuo Viennam: Vienna confestim ad vos cogitabat. Quo tuus iste cursus, impiger atque invictæ imperator? quo tanta festinatio ista atque celeritas pertinet?

nul-

nullamne diuturno militiæ labore atque opere, assiduisque ac difficillimis itineribus defatigato corpori atque confecto, nullam tanti belli administratione ac curis defessæ menti atque contractæ convenit requietem ac relaxationem dari? atqui victrices legiones tuæ, te non modo permittente, sed imperante, curant sese hoc tempore atque reficiunt; vacuæque curis atque laboribus, summa tranquillitate in hibernis atque otio suavissimo perfruuntur. iniquum est profecto, ducem, cessante milite, laborare. quid? sævissimam anni maximeque infestam tempestatem non animadvertis? dabis te igitur summa hieme in iter? non montium difficiles lubricosque adscensus atque descensus, non torrentium ac fluminum periculosos transitus, non viarum salebras asperrimas cæcosque hiatus, non imbres, non nives, non vim ventorum ac frigorum pertimescis? nos tectis urbium parietibusque defensi insolitam cæli intemperiem atque inclementiam ferre vix possumus. quid sub dio, inter Apenninorum pruinas illas ac nives, iter habentibus, fiet? Sed ne perpetuo quidem ac non interrupto itinere venire in Italiam, cursuque consueto poteris. obvallatos aditus atque interclusos pestilentiae metu ac suspicionibus offendes. si recte te atque animum tuum novi, ægrius hæc moras, quam reliquas itinerum difficultates feres. molestum est, tot inter cæli terræque incommoda, peregrinari: properantem vero in medio cursu detineri ac retardari, certe molestius ac non ferendum.

dum. Hæc omnia, princeps, vitæ, vitæque tuæ, qua nostra omnium continetur, valetudinique peperceris, si istud iter in aliam, quæ mox ventura est, magis idoneam tempestatem distuleris. perfer modo desiderium: sine, paullulum frangat sese vis hiemis atque cæli: dum itinera libera atque aperta fiant, paullisper exspecta. ferius ad nos, modo tutius ac sine molestia tua, princeps, veni.

Hisce vocibus amantissimis Etruria, ut mihi quidem videtur, principem suum, ubi primum de ejus consilio huc ad vos, post tanti belli labores, perque itinerum tot incommoda, veniendi cognovit, anxia atque sollicita compellabat: quibus incensam moræque impatientem hominis cupiditatem restingeret ac retardaret. Quid ille? num sibi persuaderi quidquam eî passus? num orationi succubuit? num precibus concessit? Cessisset ille quidem (nam quid est illo mitius atque iadulgentius?) neque quidquam repugnasset, nisi in eo, quod rogabatur, amoris erga vos suo, acri ac vehementi, vim quamdam fieri, aut certe modum statui præscribique sensisset. non ille ita vos diligebat, ut, vel rogatu vestro, posset aut minus diligere vos, aut minores, quam ipse vellet, diligendi vos significationes dare. de itinere etrusco, sine cunctatione suscipiendo, agere adhuc armatus bellicque egregio pulvere pæne sordidus cœpit.

Hæc jam certe uxor amantissima intercedet: &, quod Etruria a principe non potuit, ipsa a viro profecto impetrabit. num
ab-

abire, vix ex belli ore tantisque periculis ereptum, ex longoque, quo pæne contabuerat, desiderio receptum; & diuturnis perque incommodis itineribus sese, tam adversa tempestate, committere carissimum atque amantissimum conjugem sinet? Quod si se comitem ac sociam itinerum ac laborum adjungere generosa atque amans virago destinarit; si, ne cupido profectionis viro retinendo molesta sit, sibi, viri cupidissimæ, remanendo infesta ac gravis, una simul proficisci atque in iter se dare constituerit: huic certe suavissimæ filiæ tali consilio providentissimus pater obstabit, mater amantissima repugnabit. non poterit tantam, utriusque auctoritatem illa defugere: nolet hunc acerbissimum carissimis parentibus dolorem inurere: si non imperio, at certe precibus lacrymisque flectetur. ita **MARIAM TERESIAM** parentes abire non sinent; **FRANCISCUM** abire non sinet uxor; Etruria sui principis incommodorum metu curaue le-yabitur.

Sed jam tempus illud metus ac sollicitudinis abiit, Florentini. nunc decet, quoniam quidem tam belle res e vestroque commodo processerunt, tantummodo lætari vos atque gestire, nec de præteritis vestri principis incommodis, nisi ut eximium ac singularem hominis erga vos amorem, in iis vestra causa suscipiendis ac tolerandis, intelligatis, cogitare: quibus usque adeo deterreri se non est passus, ut in eorumdem societatem non modo inclytum **FRATREM**, verum etiam augustam **CONJUGEM**,

GEM, volentem illam quidem, nec viro quidquam de amore erga eosdem vos concedentem, vobis quam illi certe commodior, vestri studiosissimus cupidissimusque vocarit. Iter longum atque difficile, horrida maximeque infesta tempestate, non mærore, non lacrymis amantissimorum sui carissimorumque permoti, læti atque alacres ingressi sunt: nec vero illi, quam difficilis esset via, sed quam longa, cogitabant: cujus si brevitatis incommodis suscipiendis redimi potuisset, multis partibus plura ac graviora, quo fieret illa brevissima, suscipere non dubitassent. Nihil solet esse viatoribus tam opportunum tamque jucundum, quam paratæ diversoriorum stationes; ubi diurnis laboribus molestiaque defuncti, nocturnæ quietis aliquid ac levationis defatigatis corporibus, tædioque affectis animis impertiant. Quo reliqui capiuntur ac recreantur, eo nihil illis, ad vos inflammato studio properantibus, odiosius atque molestius: ut quiete defatigari, itinere ac cursu levari ac refici viderentur. assiduus illis de vobis inter se sermo; vix ulla secum, nisi de vobis, cogitatio. quo propius Etruriam accedebant, eo minus eos tanti itineris suscepti tantorumque incommodorum pœnitebat: quinimmo eo ipsi magis de tali consilio suo propositoque gaudebant. Ut vero in conspectu ex edito quodam propinquoque loco Florentia fuit, non secus affectos eos intimisque commotos sensibus affirmant, ac si, non hospitam tum primum terram adspicerent, sed dulcissimam patriam, ex longo
erro-

errore ac veluti postliminio , reviserent .
Hæc inter itinerum asperitates , animorum
autem tam sedulas atque officiosas curas ,
tandem ad vos vestri amantissimi principes
pervenerunt .

Heic ego jam finem dicendi faciam ne-
cesse est . plura ac majora vel in ipso illo
primo adventu vidistis atque experti estis ,
quam quæ ego assequi aut complecti ora-
tione mea possim . O noctem illam beatam
& prope ad immortalitatis memoriam con-
secrandam ! o occursum illos vestros , cum
dignitatis , tum etiam inusitatæ cujusdam
jucunditatis plenissimos ! o effusas gratula-
tiones ! o secundos festosque clamores , qui-
bus peregre venientes excepistis ! quis non
interfuit ? quis non gaudio lætitiæque exsi-
livit ? quis non , suorum principum adspectu
mirifice captus ac delinitus , populorum fe-
licitatem intra mœnia receptam sensit ? o
consequentes deinceps dies , vobis Etruriæ-
que universæ auspiciatissimos , & futuræ omni
posteritati vestræ , tamquam sacros , quot-
annis colendos ac celebrandos ; quibus , tot
jam signis atque indiciis amoris , tam brevi
tempore , editis ac declaratis , quam cari
vestris principibus essetis , sentire potuistis !
Videtis profecto , prima illa hisce novissimis
pulcherrime respondere . Etrusci imperii suc-
cessorem , statim ac superiore principe orba-
ti estis , talem a Deo immortalis paratum
vobis atque oblatum , me dicente , cogno-
vistis , qui sine bello aut tumultu , sine ani-
morum ancipiti atque anxia , qualis futu-
rus esset , dubitatione , sine temporis mora ,
matu-

maturus jam tum atque perfectus, & summis virtutibus cum bellicis, tum domesticis præditus, amore præsertim erga vos singulari, olim in Etruriam veniens suis populis imperaret. Hac tanta felicitate, quæ vobis tum ventura ostendebatur, allata ac præfente nuper potiti estis. nihil jam, quo omnium gentium felicissimi & sitis & habeamini, esse reliquum intelligo, nisi (id quod ab eodem immortalis Deo omnes, qui vestro nomini ac commodis maxime favemus, enixe petimus atque precamur) ut vestris principibus diutissime vos, vestrorum principum filiis atque nepotibus, eorum similibus, vestra posteritas omnis atque Etruria universa, perpetua ac sempiterna successione, perfruatur. Dixi.



ORATIO VII.¹⁶⁷

PRO SCHOLIS PUBLICIS TERTIA

HABITA FLORENTINÆ

XVIII. KAL. FEBRUARIAS MDCCXXX.

CORAM

FRANCISCO MARIA MARTEILIO

FLORENTINÆ CIVITATIS ARCHIEPISCOPO.



Ellem equidem, Florentini, quod olim pollicitus sum (a), inquisitum me causas, in concionemque allaturum, quam ob rem fieri existimarem, ut e scholis publicis minores, quam oporteret, fructus vulgo a discipulis perciperentur, id una dumtaxat oratione (quod me facturum ostenderam) effici a me posse hoc tempore atque præstari. Nihil aut consilio illi meo atque promissis, nihil expectationi vestræ, nihil denique causæ ipsi accommodatius posset accidere, quam si unam eandemque rem non in tam multa tamquam membra conciderem, ex quibus mihi in singulos deinceps annos aliæ atque aliæ orationes nascerentur, sed universam paucis aliquot actionibus comprehensam atque conclusam tandem aliquando perorarem. Verum fit nescio quo modo, ut, cum eam causæ partem, de qua dicturus sum, mecum ipse attentius diligenter

(a) In Oratione II. pro publicis scholis anno 1738. habita.

gentiusque commentor, illico mihi non jam pars ea, sed totum quoddam, in alias atque alias partes necessariotribuendum, esse videatur. Certe tam multa sunt, quæ menti in illa cogitatione objiciuntur meæ, tam sæpe inter se varia atque diversa, tam denique ampla ac longe lateque patentia, ut, aut cursim ac leviter percurrere singula debeam, si omnia simul complecti velim (id quod, ut in aliis fortasse dicendi generibus ferri possit, atque adeo, si non incite confusæque fiat, laudari, in oratorio certe hoc nostro est vitiosissimum, atque a magistris artis jure reprehensum), aut, si explicanda res est, in bouoque, ut ajunt, lumine collocanda, & ad vulgi captum sensusque accommodanda, sequi partitiones illas meas & quasi membra cogar. Jam, cum causas, quamobrem diuturnior aliquando, quam, oporteret, adolescentulorum in scholis publicis sit institutio, mecum ipse attentius quærerem, has ita multas tamque certas reperiẽbam, ut in earum diligenti cum enumeratione tum commemoratione perspicuam ac manifestam earumdem, scholarum purgationem sitam esse intelligerem. videbam enim, non ingeniosos semper, sed sæpe hebetes ac tardos, & aliis fortasse facultatibus artibusque, quam huic litterarum, aptiores ad publica gymnasia confluere: alios autem non satis initiis illis atque elementis, sine quibus ad ulteriora adspirare nemo possit, institutos atque instructos accedere: aliis librorum necessariam copiam, parentum sive inopia sive avaritia, non suppete-

petere: alios, propter nimiam eorundem parentum, matrum præsertim, indulgentiam, non modo non suppliciis, sed ne objurgationibus quidem posse a magistris ad studiorum suscipiendos ac tolerandos labores cogi: alios ita ad publicas scholas mitti, ut tamen publicis præceptoribus committi non videantur; nemo enim, neque pater, neque patruus, neque avunculus, neque propinquus quisquam aut primum eos ad præceptorem, saltem officii causa, deducit, aut deinde de iis, eorumque studio ac diligentia quidquam totis annis ab eodem præceptore sciscitatur: ut mirum non sit, si & ejusmodi discipuli negligentiores ipsi evadant, qui se negligi a suis videant, & magistri publici, qui non minus eos a domesticis, quam se neglectos intelligunt, minus diligentiae aliquando in iis erudiendis impendant. Sed parum est, discipulos nulla parentum aut propinquorum voce publicis doctoribus commendari. exemplo sæpe domestico a discendo proficiendoque abducuntur. aulæa, tabulas pictas, specula, statuas, lectos, peristromata, fellas, abacos, candelabra, argenti vim atque auri domingentem intuentur; librariæ supellectilis, præter accepti & expensi codices, nihil usquam vident. conviviiis, cantibus, aleæ, saltationibus, salutationibus, nocturnis cœtibus atque colloquiis operam assiduam dari animadvertunt. hoc unum studiorum genus, quod unum coli a parentibus adamarique sentiant, colendum sibi liberi atque admandum putant; &

H

rum

rum exemplis, quam scholasticis alienorum ad alia quædam studia cohortationibus vim atque auctoritatem inesse oportere, sibi prope jure persuadent. Hæ sunt, Florentini, studiorum illæ ac studiosorum in publicis gymnasiis moræ. hinc illa doctrinæ tradendæ, sive potius percipiendæ, sæpe diuturnitas. privatarum domorum crimen in publicas scholas confertur: patrumfamilias ac domesticorum culpa atque peccato publici doctores offendimus; & aliorum, non nostra, infamia laboramus. Non unius orationis hæc sunt, sed plurimarum; siquidem unumquodque patefaciendum atque illustrandum est. Videte, quanto etiam latius hoc pateat. nihil eorum, quæ proxime commemoravi, hodierna hac mea oratione attingam. ea in aliud tempus integra reservabo. aliam quamdam, vulgo minime animadversam, sed meo judicio certissimam atque gravissimam, diuturnioris hujus in scholis publicis institutionis causam hoc tempore afferam atque explicabo. sic enim statuo: Ingratum nonnullorum, cum a magistris recesserunt, in eisdem animum, multum eorum, qui in scholis publicis exercentur, progressibus in litteris obesse. Fortasse vere id etiam de iis, qui privatis doctoribus utuntur, dici queat. sed certe & usitatus est, in turba ingratos reperiri, &, si incommodum privatis etiam scholis hoc vitium est, sit sane earum etiam causa, me publico doctore pro publicis scholis agente, defensa. neque enim id mihi unquam proposui, ut in publicarum scholarum defensione

NON

non nisi ea dicerem, quæ illarum dumtaxat causæ prodesse; quasi reliquis scholis irascerer, nec tam publicas defendere, quam privatas accusare videri vellem. Quam sit igitur hoc ingrati discipulorum animi vitium publicis magistris invisum, & qua ratione discentium progressus retardet, ita dicam, si a vobis ante petiero, ut me dicentem, qua soliti estis, humanitate, ac diligenter audiat.

Accidere hoc sæpenumero crebroque usu venire, ut, quibus summa, post Deum immortalē atque parentes, debetur ab hominibus gratia, iis nulla ab ingratis discipulis, e scholis ubi excefferint, habeatur, notius est, quam ut testificatione aut mea aut cujusquam indigeat. audistis enim profecto, nonnullos aliquando existisse, quī, magistri qui sibi olim fuerint, omnino nescirent: audistis, qui, tamenetsi nossent, tamen dissimularent, obviosque tamquam ignotos præterirent: audistis denique, qui oderint, vituperarent, insectarentur. nota sunt, quæ de Evathlo ab A. Gellio (a) contra Protagoram, de Aristotele contra Platōnem ab Laertio (b), de Tisia contra Coracem ab Suida, sive dicta sive facta, a discipulis nimirum contra magistros, commemorantur. sed, ne longius abeamus, legistis, opinor, summi illius apud vos, sæculo decimoquinto exeunte, doctoris Angeli Politiani quasdam ad Georgium Merulam datas litteras (c): qui-

H 2 bus

(a) *Noſt. att. l.V. cap.10.*

(b) *In Arist. vita.*

(c) *Epist. Lib.XI.*

bus in litteris illa sunt. Solent minuti quidam & pusilli famam quoque libenter magistrorum suorum detrectare. Cujusmodi hominum malignitates, ingratumque animum in nos quoque, interdum magis etiam, quam volumus, experimur. Miror hominis sapientissimi moderationem, qui, in rem, indignissimam acerbissimique sensus, ingressus, ita orationi moderatus est suæ, ut factum modo commemorarit, de facti indignitate de suoque sensu siluerit. sed ille nimirum non id, illa cum scriberet, agebat, ut in ingratos discipulos ullos suos inveheretur, & ad disceptationem cum Merula, violatæque amicitiae purgationem properabat. At vero vix arbitror reperiri quemquam posse, qui quidem expertus sit tale aliquid aliquando, cui non eorum, quos edocuerit, ac tamquam alter patris eduxerit, immo quodammodo procrearit, ingrati in se animi commemoratio, aut vero etiam cogitatio, & acerbissimum dolorem inurat, & justissimas etiam doloris sui voces eliciat atque exprimat. possumus tardos ferre discipulos, possumus cessantes, possumus garrulos, possumus feroces atque protervos, possumus & ingratos ferre non possumus. nimirum intolerabilius est hoc vitium atque inhumanius, quam ut ei ferendo hominum patientia par esse possit. reliqua odimus atque averfamur; hoc, tamquam auspiciū quoddam malum, detestamur a nobis, ac perhorrescimus. alia vel humana sunt, vel certe cum bestiis ferisque communia: ab hoc vel immanes ipsas beluas abhorre intelligimus, quas beneficiis

cūis hominum sæpe capi, gratiaque affici sentimus. tam denique est non humanæ conditionis hoc vitium atque naturæ, ut, qui se avaros, qui libidinosos, qui iracundos, qui etiam crudeles confiterentur, atque adeo præ se etiam ferrent, inventi sint: contra, qui ingratum fateri se velit, reperiatur nemo. itaque illi ipsi, qui vel maxime hoc vitio laborant suntque ingratiissimi, non se beneficio non respondere, sed nullum a se deberi profitentur: non gratiam illi quidem tollunt, sed merita non agnoscunt: neque interim animadvertunt, duplici se, quando ita se gerunt, esse nomine ingratos, & quod beneficio non respondent, & quod ne sentiunt quidem beneficium. Quid ego, inquit ex istorum ingratorum grege aliquis, quid ego magistris illis, puerilisque ætatis meæ moderatoribus debeam? num illi me doctrina illa sua tradenda doctum effecerunt? non ego mihi met, legendo quærendoque, doctrinam deinceps, quæcumque est in me, meo Marte comparavi? illi me tantummodo rudem atque impolitum ad doctrinam quodammodo edolaverunt. Atqui hoc quidem satis est, o ingratiissime, ut illis plurimum debeas. nam ne mater quidem tua virum te peperit, sed infantem. attamen, quod vir sis, matri tuæ debes: nisi enim te infantem peperisset, numquam certe vir esse potuisses. At, quæ me magister ille meus edocuit, poterat quivis e magistrorum turba edocere. Nempe, tum non tu quidem nemini, sed huic potius, quam illi tuo, deberes. At certe, si nulli me magistro pa-

rentes mei commendassent, poteram tamen ipse per me, quod nonnulli ingenio naturaque adjuti fecerunt, & crebris doctorum hominum congressionibus, & librorum assidua diligentique lectione, litteras discere. Primum nescio. deinde, si concederem, tamen te eadem etiam tum referendæ gratiæ tamquam vincula invitum ac reluctantem obligarent atque constringerent. deberes. nimirum doctis illis hominibus, quorum eruditis sermonibus profecisses: deberes illorum librorum scriptoribus, qui tecum doctrinam suam, scribendi labore suscepto, communicassent. hi tibi pro magistris, immo plane magistri tum essent; hisque deberes. saltem Deo illi immortalis bonorumque omnium largitori deberes; qui te eo ingenio atque acumine præditum esse voluisset, ut, etiam sine doctoris ullius opera, posses per te ipse discere. alio tum magistro nempe uterere, non omni careres: gratiæ versuram, ut ita dicam, faceres, non omnino debitor esse desineres.

Hæc plerique, quamquam verissime planissimeque dicta, tamen sive non intelligunt, sive, qua perversitate ingenii morumque sunt, non intelligere sese simulant: certe ita se gerunt, ut meritam præceptoribus suis debitamque gratiam non modo re, sed ne verbis quidem aut memori saltem mente persolvant. quinimmo, quod de Aristotele magister Plato esse olim questus dicitur (a), tamquam equulei ferocientes, qui matrem vix
nati

(a) *Apud Laertium in Vita Aristotelis.*

nati calcibus sæpe suam petunt, sic illi in præceptores suos, vixdum in doctrinarum per eos tamquam lucem editi, recalcitrant atque infestissimi reperiuntur.

Quod si divina quadam animi præfensione magistri ipsi possent eos, qui tales futuri essent, ante cognoscere, caverent, opinor, ab iis, nullumque esse illis in gymnasiis suis locum, ubi consisterent, paterentur; nec istas tamquam viperas in sinu foverent, a quibus scirent aliquando crudelissimo se morfu esse laniandos. nunc, quod divinare nemo possit, qui potissimum sint tales evasuri, timentur etiam ii, qui fortasse gratissimi futuri sunt: omnesque, paucorum vitio, discipuli, non dicam odio a magistris habentur, sed certe minus amantur; nec negliguntur illi quidem, sed fortasse non ita sedulo diligenterque excoluntur.

Ajant, lanistam olim quemdam ab suo ipsum discipulo ad singulare certamen in ludo gladiatorio provocatum, ante quam congrediretur, domesticis imperasse, ut, cum initum certamen esset, seque aliquantum cum discipulo batuisse ac dimicasse sensissent, clamorem repente e proximo conclavi tollerent, strepitumque rixæ ac pugnæ similem cierent. quod illi cum ita, uti erant jussi, fecissent, eoque improvise inopinatoque tumultu adolescens commotus, oculos paululum vultumque ad eam partem, unde strepitus exaudiebatur, convertisset: tum lanistam, momentum illud ac defensionis moram captantem atque arripientem, continuo petitionem suam magnis viribus plagamque

conjecisse, & adversarii imparati pectus gladio transverberantem dixisse: *Hoc te scilicet non docueram; cominus pugnantem nihil, nisi de adversario, cogitare oportere.* Nempe hic discipuli ferocitatem jamdiu timens, &, ne arte, quam docebatur, aliquando contra magistrum abuteretur, veritus, quod sibi damno ac calamitati esse poterat, id in tradenda arte non docuit. recte ne, an secus, non disputo. illud dico: si quando segniores in docendo magistri publici reperiuntur, si non, quantum possent, in erudiendo contendunt, si non iterant præcepta artis atque inculcant, si multa etiam reticent continentque, si denique non nisi certas illas scholæ præstitutasque horas cum discipulis versantur, nec quidquam, nisi id, quod prætermittere sine justa reprehensione non possunt, obeunt ac præstant: hæc, inquam, aliaque ejusdem generis discendi subsidia, certe multum discentibus profutura, sed non debita neque tamquam ex pacto atque convento postulanda, si negligunt: id non ulli ipsorum socordiae ac voluntati, sed usitatae quotidianæque discipulorum, in referenda, pro tantis beneficiis atque promeritis, gratia, negligentiae dico esse tribuendum.

Quod cum vel in magistris mercede conductis fieri necesse sit, quid tandem in iis, qui gratis docent, futurum putatis? Etenim non omnino ingratis utuntur iis, quos docent, quicumque magisterii sui minerval ali-quod atque stipendium percipiunt: nec, si non satis, mercede ulla, tantus eorum labor
atque

atque meritum exæquatur, idcirco non aliqua saltem ex parte pensatur. Contra, qui gratis docent, nisi discipulorum caritate, benevolentia, officiis remunerentur, quid esse reliquum arbitramini, quo eorum animi, in gravissimo molestissimoque munere, recreentur? Te ne ego, tanto cum labore meo, molestia, temporis jactura, valetudinis incommodo, erudiam? faciam: quoniam id meæ vitæ ratio institutumque postulat. tu vero mihi nihil contra rependes? Sed quid potissimum velle me putas? num pecuniam? contemsi meam: num censes, alienam me concupiscere? an munera? habeto. tu tibi ista, quibus ego nec capior nec frui possem; quoniam me quidem alia delectant ac tenent. quin, si diligentem mihi operam docenti dederis, si institutioni laborique meo, in te erudiendo, responderis, si probus, si litteratus adolescens evaseris, munusculis ego te augebo atque ornabo meis. Quid ergo est? nihil ne retribuere mihi abs te reddique volo? immo aliquid; verum tamen ejusmodi, ut, etiamsi ego non peterem, tu tamen tua sponte facere deberes, neque posses sine nefario scelere præterire. quid tandem? mini ut, si te cum fide, si cum assiduitate, si cum diligentia, si nec æstivis maximis caloribus, nec hibernis immoderatis frigoribus retardatus, si studia mea atque oblectamenta dimittens, si nihil de me meisque commodis cogitans, deque uno te tuisque utilitatibus atque eruditione sollicitus, patienter aliquot annos amanterque instituero, mihi ut, inquam,

Hic, ne:

ne sis ingratus aliquando futurus; ut, a me cum recesseris, ne, quæ pro te fecerim quæque tulerim, ullo umquam tempore obliuiscaris; ne te operam apud me posuisse poeniteat; ne institutionem meam diligentem atque benevolam, gratuitam certe, reprehendas atque traducas; denique ne inimicitias mihi olim bellumque denuncies, neve armis tibi a me traditis contra me (me miserum!) amantissimum tui præceptorum discipulus inhumanus atque crudelis utare. numquid a te aliud peto? nihil. num non iusta, num non debita, num non concedenda peto? possumne abs te hoc impetrare? Taces videlicet tu: nihil recipere ac polliceri de te vis. quod si jam pollicereris, non crederem, atque diffiderem. puer sit atque etiam infans oportet, qui, quæ fides sit habenda pueris, non intelligit. Nam sæpe, experimento ipsi suo maloque, plurimi magistri publici didicerunt, eos, quos in gymnasiis diligentius laboriosiusque instituerint, quibus præcipuam curam culturamque adhibuerint, quorum denique causa invidiam aliquando atque sermones reliqui discipulorum cœtus subierint, omnium deinde maxime ingratos atque insensissimos existisse. En cur ego docendo contendam, cur elaborem, cur vigilem, cur & sudem & algeam, cur palleſcam, cur tabeſcam, cur in gymnasiis ignotus atque obscurus conſeneſcam: ut ingratiſſimos eos olim experiar, quorum causa tam multa incommoda ac tanta ſuſceperim!

Hæc,

Hæc, hæc inquam, Florentini, magistros publicos secum ipsos reputantes, eos præsertim, qui non mercede aut emolumentis adducti, sed hominum caritate, rei que publicæ juvandæ studio excitati ad docendum accesserint, &, quam male plerisque, ac fortasse etiam sibi, docendi major atque impensior cura successerit, hominumque, non dicam in referenda, sed vel in habenda gratia, præpoſitam illam quidem, attamen frequentem, in maximis beneficiis atque promeritis, consuetudinem contemplantes: putatisne, si non omnes, at certe aliquos non vehementer commoveri, non magnopere deterreri, non plane animos despondere, non aliquid de industria in docendo atque alacritate remittere, non aliquando de magisterio deponendo cogitare, non negligentius agere atque languidius, non denique minus, quam possent, quamque adeo vellent, de maximo discipulorum profectu laborare? Quæ si discipulis esse incommoda, ut certe sunt, confitemur: videtis profecto, quæ sit incommodorum origo; ex quo fonte tanta labe emanet; quæ sit ratione malo isti occurrendum. Si remissionem docentium, quandam volumus atque languorem torporumque tollere, si alacres eos, si intentos, si sedulos atque industrios, totisque viribus ac contentione discipulorum studiis atque doctrinæ fervientes efficere: discipulorum corrigenda consuetudo est atque emendanda: multum quidem ad studia litterarum cohortandi sunt adolescentes, verum ad officiorum humanitatisque non minus: curandum

H 6. est,

est, ut doctorum suorum studiosi æque ac doctrinarum sint; nec, etiamsi doctrinas aliquando amare ac colere destiterint, a doctorum amore cultuque desistant; intelligentque, tum se in humanis litteris maxime profecisse, cum erga eos, per quos profecerint, humanissimi gratissimique reperientur. Hæc autem non voce modo illis, verum multo etiam magis exemplis factisque commendanda: ostendendumque, si referre parem non possumus, haberi certe a nobis, quantam maximam possumus, præceptoribus illis nostris, quorum e ludo prodierimus, gratiam.

Sed quid ego? qua in urbe? apud quos loquor? necessaria fortasse alibi, Florentiæ quidem supervacanea hujus erga magistros discipulorum officii admonitio cenferi debet. vere enim hoc dicam. multa legens, nonnulla audiens, quædam etiam aliquot locis curiosius investigans atque perquirens nullos mihi videor præceptoribus suis gratiores, quam florentinos, discipulos reperisse. Date hanc mihi hoc loco veniam, Florentini, ut, omissis querelis illis, quibus fortasse sum usus pluribus, quam oportebat, ex severitate illa orationis atque tristitia reliquam dictionem meam ad hilaritatem jucunditatemque convertam, & in discipulorum ex vestra urbe gratissimorum commemoratione ac laude consumam. nolo enim cuipiam fortasse videri, discipulorum meorum animis, qui sunt mihi merito ipsorum carissimi, voluntatique diffidere; qui de ingratidis discipulis generatim tam multa dixerim, nihil de gratis præcipue proprieque com-

commemorarim. Illud etiam ex hac oratione commodi, ut opinor, accedet, quod, proposito gratorum exemplo, eorumque egregia indole ex hoc loco publice collaudata, habebunt adolescentes optimi, quod etiam in hac parte imitentur. Quod si facere animum induxerint, removebitur tum nempe a scholis publicis illa, quam ego unam ex multis esse causam affirmavi, cur in iis aliquando discentes minus, quam oporteret vellemusque, proficiant. neque enim ego magis vitia, si qua sunt in re litteraria, demonstrare, quam emendare, nec magis vitiosos castigare, quam juvare percupio.

Jam illum, quem paullo ante de ingratissimis discipulis suis conquerentem audistis, Politianum, gratissimos expertum esse scitote, quos quidem ego sciam, tres florentinos nobilissimos atque doctissimos, Franciscum Puccium, Baccium Ugolinum, Petrum Delriccium, sive, ut ipse appellare se maluit, Crinitum. Puccii quidem illa sunt; quadam in epistola (a), nomine etiam Ugolini conscripta: *Habemus, inquit, in manibus quotidie ego & Ugolinus tuus hunc librum* (Miscellaneorum Centuriam primam; singulare Politiani opus, significat), *legimus, decantamus, ediscimus...* Ac cum illo recognoscere juvat, quæ pridem, cum istic eramus, te prælegente, didicimus: tum vero pleraque alia, de liberalitate tua addita, quasi antistarium quoddam, avida ac pendenti aure combibimus... *Quicquid ipsi sumus, si*
H 7
quid

(a) Politiani epistolarum Lib.VI.

quid sane sumus, id totum tuo beneficio sumus, & quæ sequuntur. Quæ quidem gratissimorum hominum ingenua ac liberalis testificatio quam jucunda optimo præceptori acciderit, declaravit is scilicet iis litteris, quibus epistolæ illi in hæc verba rescripsit. *Incredibili me voluptate tuæ litteræ affecerunt, non tam, crede, quod nostræ Miscellanea laudent (quamquam id etiam) quam quod apud me, qui tibi olim præceptor obtigerim, singularem quandam vel eruditionem, vel eloquentiam tuam profitentur. Ut enim agricola vehementer exultat, ubi generosos sætus ex arbore ipsa legit, quam suis quondam manibus consueverat... ita nos magnopere delectatos illa epistola tua scias, quæ mirificos istius ingenii, nostra opera culti, nobis fructus exhibuerit... Nec mihi certe quicquam gratius, quam discipulos emittere, me quoque ipso doctiores; præsertim si grati, si memores, si non in præceptorem quoque ipsum, sicut in parentem equulei, recalci- trent. At certe non talis, tertius ille Politi- tiani discipulus, Crinitus fuit: qui quidem, ex tñ. lo, acerbo sane fato, ætatis anno videlicet quadragesimoquarto, amantissi- mo præceptore, id maximis curis assiduisque vigiliis egit, ut, collectis tanti viri atque editis monumentis, vitam quodammodo de- fundo atque immortalitatem donaret: cum- que alteram Miscellaneorum centuriam pa- ratam jam a magistro atque instructam sci- ret, eaque nusquam post ejus obitum com- pareret (videte, quæso, atque admiramini, si- ve potius cum animis vestris exosculamini*
aman-

amantissimi discipuli singulare erga præceptorem suum studium atque pietatem) capita rerum, sibi non ignota, quorum nempe alia a vivente acceperat, alia in schedulis ab eodem notata repererat (quibus de rebus in centuria illa deperdita, sive, ut non temere suspicabatur, a plagiario aliquo sublecta atque occultata, Politianus egerat) typorum ope vulgavit: ut, si quando sub alieno nomine illa scripta prodissent, manifesti reus furti editor teneretur; suaque magistro laus, merita quippe ac debita, redderetur. (a)

Sed hæc nimis antiqua: temporibus propiora videamus. media illa, ab ætate Politiani, quæ possem de gratis florentinis discipulis commemorare, ad ætatem hanc nostram, omnia ex oratione mea circumcidam atque amputabo. non dicam, nisi de iis, quos, si non plerique vestrum, at certe aliqui novistis ac recordari potestis. nec vero, nisi viventes nullos nominare decresem, (b) quod ignorem, an ipsi nominari se velint,

H &

Ion-

(a) De hac tota re agit ipse Crinitus binis litteris ad Alexandrum Sartium, Epistolarum Politiani libro XII.

(b) Inter viventes florentinos gratos discipulos nominari in primis oportebat Alexandrum Politum, hominem vere doctum atque eruditum, Scholarum Piarum decus, in Pisano Lyceo humaniorum litterarum professorem, nobisque amicissimum. Is, in præfatione luculentæ interpretationis suæ Eustachii
in

longinquos mihi appellare necesse esset. heic,
heic inquam, in vestro numero, nonnullos
præsentes intueor, qui, quantum in græ-
cis

in Homeri Iliadem commentariorum tomo III.
non tam oblata, quam, ut videtur, quæsi-
ta, studii sui gratissimique in præceptorem
olim suum animi testificandi occasione, *scbe-
das meas, inquit, perscrutanti incidit mi-
hi nuper in manus epistola multis ab hinc an-
nis græce ad me adhuc puerum scripta ab Ja-
cobo Maria Ayrolo, viro doctissimo, & latine
& græce atque hebraice eruditissimo So-
cietatis Jesu: sub cujus ego præceptis græce
linguæ rudimentum puer posueram. Quæ qui-
dem epistola est hujusmodi ... Hæc ad me,
cum in pueris adhuc agerem, Ayrolus: cu-
jus ego epistolam referendam huc censui, non
tam memoriæ gratique animi causa, quod,
Ayrolo duce atque præceptore studiorum illo-
rum meorum, multum pro illa ætate in græ-
cis latinisque litteris profecerim, quam quod,
quæ ille me puerum diligentissime monuit,
eadem monenda esse judicem adolescentes hys
nostros, qui græcarum studio litterarum du-
cuntur: multa iis nimirum græce esse scri-
benda, multumque Græcorum scripta dies no-
ctesque esse pervolutanda. Nec minor tribuen-
da laus esset piissimæ memoriæ eximæque
gratiæ, quam magistris suis non magis ha-
bet, quam plane refert Joannes Baptista Fa-
giuolius, Charitum etruscarum omnisque li-
beralis festivitatis atque ingenui joci parens,
scriptorumque multitudine atque elegantia
tota*

cis litteris profecerunt, tantundem summo illi græcæ linguæ doctori, Antonio Mariæ Salvinio, se debere, libera voce scriptisque, profitentur. eorum sunt illa nempe, quæ in ore

tota Italia notissimus, in quodam etrusco carmine, quod haud ita, pridem ingeniosissime suavissimeque scriptum *de vitæ diuturnitate non negligenda*, ad clarissimum doctissimumque virum Benedictum Brescianum, condiscipulum olim suum, æque præceptoribus suis gratum, misit: cujus est hoc initium:

Caro Bresciani mio, la non è baja:

*Noi fiam, senz'avvedercene, in un volo
Giunti alla trista età della vecchiaja.*

E a quest'età ci siamo noi non solo

In tempo velocissimo arrivati,

Ma quel, che resta, è sol fatica e duolo:

Come son presto gli anni miei passati!

E, ch' i' dica anche i vostri, contentatevi;

Perch' i' non credo sian privilegiati.

Di quand' eram' scolari ricordatevi,

Che saran sessant'anni, e più, finiti:

S' e' non vi pare, a riscontrargli fatevi:

Che n'andavam' a scuola a' Gesuiti,

A quei Maestri di color, che fanno,

E di dottrina e di bontà forniti:

A quei vò dir, che tanto utile danno,

Lor' essendo istituto principale

Giovare a tutti in ogni dì dell'anno:

Non vi son ferie nel lor annuale:

Sempre in fazione, or fuori, or in Città;

In chiesa, in pulpito, e al confessionale.

Alle

ore habent assidue, quæque publicis litterarum monumentis consignata passim videmus : *Salvinus , magister meus , hoc aut illud sentiebat : sic dicere solebat : ita me docuit .* Quam quidem ego gratiam , doctissimo sanctissimoque viro ab amantissimis discipulis habitam ac relatum , eo esse illi justius debitam existimo , quod nemo Salvinio gratior in suos præceptores exstiterit . quantum enim lau-

*Alle lor squole adunque in quell' età
Andavam' egualmente : ond' è , che noi
Ci conosciamo da quel tempo in quà .
Io di più bene mi ricordo poi ,
Che fin d' allora dimostrasse ingegno ,
E i' era nel gran numero de' buoi .
S'io mi sia mantenuto , io non m'impegno .
Ma voi sapeste innanzi di imparare ,
E più d' ogn' altro trapassaste il segno .
Dalla Prima sapeste voi volare
A un tratto alla Rettorica : ed io forte
Non mi muoveva , e stavavi a guardare :
Il Padre Glaria , ch'ebbe allora in sorte
D'avervi alla sua scuola , vi faceva
A tutt' i suoi discepoli far corte .
Ma il buon Padre Naselli , che me aveva
Per suo scolar , di me si vergognò ,
Quanto il vostro di voi se ne teneva .
Solo in questo ciascun si somigliò :
Voi finito lo studio , e io abbozzato ,
A varj impieghi ognuno s' addattò . &c.
In mortem vero Vincentii Glariæ , quem
habuit etiam ipse in rhetoricis magistrum ,
hoc scripsit idem ingeniosissimus gratissimus-
que*

laudum maximarum præconium, quantaque cum voluntate atque studio, Vincentio illi Glaria, gymnasii hujus ipsius, cui ego nunc præsum, moderatori, tribuit, posteritatisque memoriæ sempiternæ commendavit? quem quidem in Benedicti Averanii, condiscipulū olim sui, sibi & ætate & studiorum similitudine conjunctissimi, Vita (a) & aman-

tissi-

que poeta hendecasyllabum carmen, admodum ipse adolescens:

Deplorate, Licci, Squole piangete.

Il Glaria, vostra gloria, or giace estinto;

Se popolato aveste ogni recinto,

Adeffo solitudine sarete.

L'acquistato splendor voi perderete,

Resteravvi di squole un nome finto,

Nè il vostro pregio sarà più distinto:

Tutto l'assorbirà l'onda di Lete.

Più non sarà chi senza alcun ritegno

Si faccia eterno dall'Occaso all'Orto;

Se manca di virtù chi fu il sostegno.

Nè meraviglia fia, se resta afforto

Nell'ignoranza ogni elevato ingegno.

Già con Vincenzio anche il sapere è morto:

(a) Prodiit hæc Vita inter Arcadum illustrium Vitas Romæ MDCCX. a Salvinio scripta, cujus hæc sunt verba: *Questo Padre (Vincenzio Glaria), che insegnò per lo spazio di molti anni l'arte del dire a tutta la Nobiltà e Cittadinanza Fiorentina, e a molti nobili forestieri, e per la sua singolare vivacità di spirito e fecondità d'ingegno bizzarro e poetica fece allievi di considerazione,*

ne,

*tissimum sui praeceptorem, & sibi carissimum, & insignem rhetorem appellat: cujus e ludo, inquit, quem florentini patricii omnes ac ci-
ves, plurimique praeterea externi nobiles ho-
mi-*

*ne, e che si può dire, che dalla sua scuola, come dal cavallo trojano, usciti sieno molti e molti ingegni, che hanno fatto onore a Firenze, stimava tanto il nostro Corileo (id enim fortitus erat nominis inter Arcades Averanius), che non emendava niente delle sue composizioni, anzi solea dire talora ingenuamente, comporre egli da maestro. Rurfus in funebri Averanii laudatione, Florentiae cum aliis etruscis sermonibus anno 1715. edita, idem Salvinius: Andato, inquit, alle scuole di quella illustre Compagnia, che sotto il nome di Gesù, al servizio del Pubblico milita, tosto alle prime scuole passò; mostrando una finezza di giudizio sua propria e singolare, non se ne stando al comune scolastico compito, nè deferendo a' maestri, se non in quanto in grandissima venerazione gli ebbe, e come padri suoi gli riverì, e con ogni maniera d'ossequio gli offerì... ma suoi maestri reputava molto più essere que' buoni e quei gloriosi, dalla venerabile antichità rispettati: ne' libri de' quali continuamente leggendo, e con riflessione leggendo (lo che a' giovani non è così agevole) da loro la via e maniera del bene e dirittamente studiare apparava... e l'amantissimo mio maestro nella rettorica, uomo insigne, per tanti soggetti di primo grido allievi suoi, non emendava
nien-*

min
run.
res
flor

nien
ne
tra
Sal
rit
ma
est
feri
tri
nu
vet
no
nii
fe
fa
di
or
eu
se
G
n
c
t
J
c
i
a

mines , multorum annorum spatio , celebrarunt , tamquam ex equo trojano , quamplures præstantissimis ingeniis exierunt , quibus florentinum nomen est illustratum . Ego vero
fic

*niente nelle composizioni di lui . Hoc loco , ne quis forte Vincentii Glariæ facultati detractum quidquam ab amantissimo discipulo Salvinio arbitretur , quod Averanium affirmarit omnia in discendi ratione solis veteribus magistris tribuisse , illud animadvertendum est ; magistros publicos non modo ægre non ferre , sibi in eo genere nihil a discipulis tribui , sed id unum auditores suos monere numquam desistere , ut sibi non nisi unos veteres magistros ad imitandum proponant . nos quidem , ex quo docere institimus , nihil umquam gravius discantibus præcepisse , quam ut id plane in rhetoricis studiis facerent , quod Salvinus Averanium fecisse discentem memorat , testis est vel ille locus orationis nostræ *pro publicis Scholis* primæ , ejus loci initium est : *Cum ante annos ferme septemdecim &c.* In eadem sententia fuisse Glariam , nec alia , quam quæ nos nostros monuimus , monuisse discipulos eum suos crediderim ; siquidem erat illorum utilitatum progressusque studiosus . De eo certe Josephus Averanius in Benedicti fratris vita , quæ Florentiæ anno 1717. prodit , ita testatur : *Erat in eo (Vincentio Glaria) singularis comitas , facilitas , humanitas ; quibus devinctos auditorum animos incendebat amore literarum .* Itaque Benedictus , qui nihil
*ma-**

sic sentio : si ex Vincentii Glariæ ludo non nisi unus Salvinus exisset , non propterea ul-
lum Italiæ gymnasium Vincentii Glariæ ludo
esset illustrius . tantum Salvinii ingenio , do-
ctrinæ , probitati tribuo .

Agite vero , reliquos videamus : sed
nondum pedem e gymnasio hoc nostro effe-
ramus . Magnum est Laurentii Bellinii inter
doctos nomen , magna inter Medicos aucto-
ritas . Vidi ego tanti viri operum volu-
men (a) cum hac in fronte , suo ipsius chi-
rographo , inscriptione : *Spectatissimo Magistro
suo Patri Vincentio Glariæ Auctor plurimis
nominibus obstrictus .*

Qualem autem & quantum virum fuisse
Petrum Andreæ Forzonium Accoltum pu-
tatis ? quanto ingenio ? quam latinis græcis-
que litteris eruditum ? quam summis prin-
cipibus , quam denique Salvinio ipsi carum ?
Declarat laudatio Forzonii funebris ab Sal-
vinio . apud inclytum Apathistarum cœtum
ante.

magistro in imitando tribuebat , plurimum
in eo ipso tribuisse homini est existimandus :
qui quidem , auctore magistro , solos veteres
in scribendo auctores sequutus sit . Utinam
auditores nostri omnes , similiter ut Aver-
nius , a nobis nostra cohortatione desciscant ,
& ad unos veteres illos magistros , Cicero-
nem præsertim , se conferant .

(a) Exstat in Bibliotheca Collegii Floren-
tini Soc. Jesu editum Bononiæ 1683. continet-
que tractatus de Urinis & Pulsibus , de Mis-
sione sanguinis , de Febribus , de Morbis ca-
pitis & pectoris .

ante annos fere viginti habita, florentinifque typis millesimo feptingentesimo tricesimo tertio vulgata. ex qua. antequam, quæ ad declarandum Florentinorum erga magistros suos liberalem gratumque animum pertinent, recito, finite me, deprecandæ nescio cuius invidiæ causa, pauca præfari. Non is ego sum, Florentini, qui non intelligam, laudes, tantas præfertim, quantas nostri ordinis hominibus tributas aut a Salvinio, aut ab aliis gymnasii hujus. celeberrimis gratissimisque alumnis, jam ex me audietis, ab alio potius, quam a me, prodi ac prædicari convenire. ego vero, si talia summorum hominum testimonia nota esse omnibus arbitrarer, aut possent iis, quibus ignota sunt, alia ratione innotescere, revocarem profecto ipse me, orationemque meam alio, maxime libenti animo ac voluntate, transferrem. nunc, nisi dixerò, quæ causa dici ac commemorari postulat atque adeo flagitat, prævaricari quodammodo, quod est oratori turpissimum, & prodere eos ipsos homines viderer, quorum laus est illa maxima, quod tam large, tam liberaliter, tam propemodum sine more aut modo, magistros suos gratissima cum testificatione laudant. Quod si tam sæpe iniquorum conviciis ac maledictis, quod non ignorare vos arbitror, in hoc ipso docendi genere appetimur; cur non in eodem liceat aliquando, æquorum commendatione ac laudibus, vestras nostrasque aures personare? Denique, harum ipsarum laudum nullam ad me partem arbitror pertinere; cuius si similes essent

fent ii, qui laudantur, immerito atque adeo injuria laudarentur. Jam ad propositum institutumque revertamur.

In ea igitur, quam de Forzonii laudibus habuit, oratione Salvinius, non minus saum laudantis (a), quam illius ipsius, quem laudat, animum erga institutores suos gratum atque benivolam ostendens, *Inter omnes, inquit, Religiosorum hominum cætus, præcipuo quodam amore ac singulari, illius toto orbe celebratæ Societatis Jesu patres prosequebatur; a quibus ipse sapientiæ, pietatis, atque eloquentiæ lac suxerat: qui quidem, totius anni curriculo, habendis sacris concio-*

(a) Habuit hoc omnino Salvinius, ut occasionem quodammodo captaret, omnesque laudandi eos, quos magistros habuerat, tamquam ansas gratissimus discipulus arriperet. id cum ex hoc Forzonianæ laudationis loco, tum ex aliis intelligitur: ut illud est, ne singula persequamur, sermone inter *Accademici* septuagesimo octavo, qui Florentiæ anno 1712. prodierunt: *La quale (Firenze) il fior della gioventù e della nobiltà di tutta Italia, che quivi (in Siena) in un seminario, da un nobilissimo cittadino, e della sua patria, come si dee, amantissimo, nobilissimamente fondato, ad arti nobilissime sotto la disciplina ed auspicj de' Padri della gloriosa ed immortal Compagnia di Gesù attendevano, a noi per alcun tempo rifugiato, nel suo seno ha raccolto.*

cionibus, summa cum laude exercent sese atque inalescunt. Hos, quemadmodum testatur ipse, in quamcumque urbem peregre iter faciens accesserat, invisere primos solebat. Atque hæc quidem de Forzonio Salvinus.

Locus autem ipse, in quo esse habitam hanc orationem supra commemoravi, admonet me, ut de præstantissimo illo viro, cui tantum Florentinæ litteræ debent atque debebunt, quoad præclara hominis instituta viguerint; quem Salvinus ipse viventem dilexit ex omnibus plurimum, mortuum diu luxit, perpetuoque voce scriptisque laudavit; qui doctrinæ magis an sanctitate clauerit, nescias, nisi quod summum in utraque re fuisse eum ac singularem confitendum est; quo gymnasium hoc idem nostrum alumno mirifice gloriatur ac propemodum superbit: de Augustino Coltelinio, clarissimi Apatnistarum cæstus institutore, admonet me, inquam, locus, ut aliquid dicam. sic enim se vir gratissimus adversus eos, a quibus fuerat a puero eruditus, in omni vitæ gessit, ut merito, inter gratos florentinos discipulos, principem locum habere posse; vel concedente Salvinio suo, videatur. Italicam *Mercurii bilinguis* interpretationem suam (a) Coltelinus editurus (quod egregium

(a) Præmisit interpretationi suæ Coltelini quoddam hac inscriptione opusculum: *Discorso dell'origine, uso, progressi e utilità del*

gium Guillelmi Batei , e nostra Societate hominis , opus , recens in Italiam ex Hispania Gaspar Scioppius attulerat) statuit , non nisi Joanni Paulo Olivæ , summo tum ordinis nostri moderatori , laborem illum suum esse in-

del Mercurio Bilingue del Sig. Osilio Contalgeni (h. e. Agostino Coltelini) Accademico Apatista , all'Illustrissimo e Reverendissimo Padre il P. Gio: Paolo Oliva Generale della Compagnia di Gesù . In Firenze . Per Francesco Onofri Stampatore Archiepiscopale 1672. Nec modo in nuncupatoria epistola , verum etiam aliquot opusculi hujus locis amantissime honorificentissimeque de suis institutoribus loquitur . cujusmodi sunt illa pag. 5. La qual' opera (Mercurii Bilinguis) per relazione dello stesso Comenio e del Carpani , fu attribuita a' Padri della Compagnia di Gesù , e a molta equità : perchè questa insigne Religione , e nello spirito e nelle lettere , si studia sempre , a maggior gloria di Dio , di trovar nuovi mezzi , per beneficiare i Prossimi . & pag. 26. Nel medesimo tempo (anno nimirum ab ortu Christi circiter 1626.) i Padri Gesuiti , i quali riguardano sempre la gloria di Dio e il servizio pubblico , aveano anch' essi in Pinti un'altro nobile e distinto Seminario , retto con quella pietà e prudenza , ch' è propria di sì gran Compagnia : i cui Seminaristi se n'andavano a coppie , in forma di processione , con mol-

inscribendum . Jam nuncupatoriæ epistolæ , qua Olivam Coltelinus affatur , illa sunt fere extrema : *Quod si mea hæc interpretatio hominibus eruditis minus forte arriserit , quemadmodum ne mihi quidem ipsi satis arridet , non deerunt profecto tibi , quos ad meas emendandas adhibeas : id quod mihi ego perhonorificum ducerem . Profiteor enim , velle me ad extremum usque spiritum ab iis doctis , omnique observantia dignissimis , collegis tuis , discere , quibus tam multa ab ipsa pueritia mea debeo ; in eo præsertim , quod ad christianam vitæ institutionem , qua virtus omnis continetur , rationemque pertinet . Utinam egregiis ego documentis proficere didicissem : profecto sperarem nunc ego magis , minus timerem . Confido tamen fore , bonus ut Jesus servorum suorum precibus , eorum præsertim , qui sunt ex ejus dilecta Societate , commotus , animadversionem atque supplicium remittat peccanti mihi omne atque condonet . Hactenus doctissimus , sanctissimus , gratissimus Coltelinus .*

Suntne reliqui ulli gymnasii hujus alumni , quos inter gratos florentinos discipulos.

molto decoro e profitto , alle Scuole del Collegio di S. Giovannino : e ancora ce ne sono de' viventi , sì nostrati come forestieri . Ma l'uno e l'altro , per la sopravveniente pestilenza , si chiuse ; e dopo di essa , non sò per quale ne fusse la cagione , per nostra disavventura , non si riaperse , con iscapito non ordinario della Città .

los possim commemorare? Sunt profecto, rique non pauci. Verum de his, hoc quidem tempore, dicere supersedeo, ne recentissimo ac nobilissimo amoris erga magistrum, non ex nostro quidem ordine, sed tamen gymnasii hujus nostri olim alumnum, clarissimi viri, & ejusdem gymnasii item olim alumni, exemplo prædicando ac celebrando non ullus locus relinquatur. nolite enim existimare, Florentini, mihi quidquam jampridem aut jucundius accidisse, aut vehementius esse probatum, aut ad imitandum esse visum accomodatius, quam quod nuperrime, præter opinionem quidem, sed valde ex voluntate cognovi. cum enim, haud ita ante multos hos dies, insignem, quæ ad Sancti Marci est, bibliothecam longo intervallo reviserem (in qua me non tam veterum librorum copia atque præstantia, quam clarissimorum patrum, & in omne officii erga me genus paratissimorum, doctrina ac comitas sæpe ac diu libentissime detinet), mihi vix primum illud amplum magnificentumque peristylum ingresso recens ab læva parte, parieti inclusum, obtulit sese: ac pernobile monumentum. summa conspiciebatur, opere anaglyptico sculpta, hominis mihi non ignoti facies, altero tantum latere, dextero nempe, conspicua: cui marmorea subiecta erat tabula, litteris prægrandibus perscripta. accessi propius, videndi cognoscendique percupidus. agnosco Josephi Averanii notissimos mini, meoque animo, ex quo ille a nobis recessit, nullo non tempore infixos, vultus, egregiam, &

Au-

ORATIO VII. 197

Augusti ævo dignissimam, inscriptionem (a) lego. reperio, a nobilissimo discipulo, cum mærore ac lacrymis, illud præceptori clarissimo cenotaphium esse excitatum. Heic ego, ut Alexander olim ad Achillis tumulum in Sigæo cum constitisset, non potui quin intimis verissimisque sensibus exclamarem: *O fortunate senex, qui tuæ disciplinæ tam memorem gratumque alumnum, virtutis atque doctrinæ adeo spectatum doctumque præconem habueris!*

Hæc

(a) Subjicimus heic eam ipsam inscriptionem.

JOSEPHO AVERANIO

CIVI FLORENTINO BENEDICTI ET NICOLAI FRATRI
 IN PISANA ACADEMIA LIII. ANNOS LEGVM INTERPRETE
 JURISCONSULTORVM XVI TEMPORIS MAXIMO
 PHILOSOPHIA GEOMETRIA ASTRONOMIA
 GRÆCIS LATINIS LITTERIS POESI ELOQVENTIA
 ROMANÆ HISTORIÆ COGNITIONE CLARISSIMO
 RELIGIONE MORIBUS SPECTATISSIMO
 PRÆCEPTORI OPTIMO
 QUI VIXIT ANN. LXXV. MENS. V. D. IV.
 OBIT IX. KAL. SEPT. ANNO A CHRISTO NATO
 MDCCXXXVIII.

ANTONIUS NICOLINIVS
 EX MARCHIONIBVS PONTIS SACCI
 ET CASTRI CAMILIANI
 M. M. D. S. P. F. C.

Hæc præclara exempla, domestica præfertim atque præsentia, velim florentina juvenus proponat sibi, atque imitari, condiscat. retineat acriter atque constanter eam laudem, quæ præcipua hujus gentis ac nominis censeretur debet. faveat, studeat, habeat, quam debet, reddatque, quam potest, præceptoribus suis gratiam: nec tam humanas a scholis publicis litteras, quam humanitatem referat. id si nos vulgo fieri magistri publici servarique animadverterimus, minime est dubitandum, quin multo promptiores alacrioresque ad sedulo ac diligenter docendum futuri simus; ut, quæ nobis habebitur aut referetur gratia, ea jure ac merito habita aut relata fuisse videatur. Dixi.



HIERONYMI
LAGOMARSINII

E SOC. JESU

AD VIRUM CLARISSIMUM
JACOBUM FACCIOLATUM
EPISTOLA

Qua, quid in M. Tullii Ciceronis contra
L. Pisonem oratione interciderit,
demonstratur.



HIERONYMI LAGOMARSINII

E SOC. JESU

Ad Virum Clarissimum

JACOBUM FACCIOLATUM EPISTOLA

Qua M. Tullii Ciceronis in L. Pisonem orationis principium, quo caremus, non minus ducentis & sedecim versibus consistisse demonstratur: tum ex media circiter eadem oratione non multo minorem versuum sortem esse jacturam ostenditur.

Hieronymus Lagomarsinius e Soc. J.
Jacobo Facciolato suo S. D.



Ἐν ἡμετέροις, mi Facciolate. Scripseram ad te quibusdam litteris, sperare me, fore, ut, quantum ex initio orationis M. Tullii Ciceronis in L. Pisonem periisset, possem plane demonstrare. illud etiam addideram, videri mihi, multum præterea ex media circiter oratione deesse; quam tamen nemo eruditorum (nisi quod omnes ἀκρίτως norant) non reliquis partibus integram ad nos pervenisse ad eam diem existimarat. Tu quid de illa spe mea, quid de hac nova opinione tecum ipse senseris, nescio. hoc scio, cum eadem

I

hæc

hæc apud doctos quosdam viros, familiares meos, commemorassem, fuisse mihi omniam prope convicio acclamatum. nisi enim integer orationis illius codex aliquis reperiretur, fieri posse uno omnes negabant ore, ut, quantum ex ea, quibusve ex locis intercidisset, certa ratione ulla cognoscere-mus. abesse quidem ab initio nonnulla, ex his fragmentis, quæ Asconius Padianus servavit, intelligi concedebant; quin, ex unius fragmenti inscriptione, versibus octoginta, & quod excurrit, auctiorem eam olim fuisse deprehendi: verum neque reliquorum versuum supra octoginta summam, neque versuum ipsorum genus atque mensuram sciri: eas ob res vereri se, ne, quemadmodum ante aliquot annos ex rotundis quadrata geometrarum legibus atque momentis facere frustra tentassem (id enim a me olim tentatum sciebant), sic inanis meus omnis esset in re, fortasse abditiore, per vestiganda labor futurus. Verum ego, qui regiam quamdam viam, quæ certo me eo, quo contende-bam, duceret, nescio quo casu fuisse mihi ingressus videbar, de re tota, hominum tanta auctoritate posthabita, cogitare non destiti. sed, cum haud ita multum in itinere progressus in quædam monstra incidissem, cum his congregari ac decertare tum nolui. videbam enim, mihi non cum illis modo, sed cum aliis etiam hostibus deinceps esse pugnandum; nec paucarum horarum pugnam illam, sed diuturnum quoddam bellum futurum; meque propterea institutum commentariorum opus, quod nosti, quodque jam-

jamdiu a me, tantoque opere flagitas, diutius, quam oportuisset, intermissurum. itaque loco tum quidem cessi, sed ita, ut receptus honestus quidam ille, non turpis fuga videretur, prælium deinde magis opportuna tempestate initurus. retuli me, tamquam in hiberna, ad commentarios illos meos; multumque & sudans & algens, tandem, quæ in Pisonianam inchoaveram, Deo favente, perfeci. quo eodem auspice, nihil cunctandum ratus, castra movi, in hostium conspectum veni, signa contuli, victoriam reportavi. Tibi jam miranda illa reperta, adducta doctis illis amicis meis visa, & totius indagandæ rei rationem exponam. quæ si tibi, homini acutissimo, probabuntur, non dubito, quin & illis & reliquis doctis viris omnibus probanda sint.

Ajo igitur primo, deesse ex initio orationis in L. Pisonem tantum versuum, quantum ferme est ab illis verbis: *Quid centuriatus palam venditas? &c.* quibus verbis caput 88. inchoatur (sequor autem ea capitula, sive eas particulas ac sectiones, quas Alexander Scotus in Ciceronis opera primus induxit) ad extremam usque orationem: hoc est, versus Patavinæ editionis anni 1730. sedecim supra ducentos.

Ajo secundo, deesse præterea aliquod ex media circiter oratione; idque tantum ferme esse, quantum est ex illis verbis capituli 89. *Quod populari illi sacerdoti &c.* ad eandem extremam orationem; hoc est, versus Patavinæ ejusdem editionis centum nonaginta novem. Cum *ferme* autem semel &

iterum dixi, id intelligi volui, vel plane tantum deesse utroque ex loco, quantum deesse affirmavi, vel, si quid discrepat, id esse ejusmodi, ut cum extrema universæ orationis periodo, ut multum dicam, compareretur.

Q. Asconii Pædiani, scriptoris sane vetustissimi (ut nunc potissimum exordiar) eruditissimos in aliquot Ciceronis orationes commentarios, quod omnes sciunt, habemus (a). is, qui ab oratoris illius ætate propius aberat, integris & emendatioribus certe, quam nos, Ciceronis codicibus usus est. Hanc autem commentariorum digerendorum rationem, consuetudinemque servavit, ut orationum illarum locos, enarrationis alicujus sua opinione indigentes, ex ipsis deinceps orationibus excerptos describeret; quos continuo subiecta enarratione illustraret. atque hinc factum est, ut, cum orationes Ciceronis quædam perierint, ut *pro C. Cornelio*, *contra competitores*, *pro M. Scauro*, earum tamen frag-

(a) Quos hodie Asconii eruditissimos commentarios habemus, Poggio Florentino debentur. Is eos in S. Galli monasterio, quod abest ab urbe Constantia passuum viginti milia, Concilii Constantiensis tempore, una cum plurimis aliis antiquis codicibus reperit, *non*; inquit in epistola quadam sua, anno 1417. ad Guarinum Veronensem data, *in bibliotheca, ut eorum dignitas postulabat, sed in tæterrimo quodam & obscuro carcere, fundo scilicet unius turris, quo ne capitales quidem rei damnarentur.*

fragmenta cum illis Asconii commentariis manserint. Ut autem facile is posset ad ipsos locos, perpetuis Tullii orationibus insertos, si quando ita vellet, recurrere, versuum numerum in Tulliani codicis margine deinceps notavit; &, ad quam eorum summam ea Ciceronis verba, quæ ipse in suum codicem explicanda transferebat, pertinerent, excerptis illis suis inscribere consuevit, ita exempli gratia: *Versu 100, vel versu circiter 100, vel circa versum 100. &c.* Atque in Pisoniana quidem illam consuetudinem tenuit, ut versus sic deinceps numeraret, ut, usque ad octingentesimum, referret ad primum sic: *Circa versum a primo ex. gr. 100. 200. 300. 800.*; tum, mediis interjectis, ubi ad octingentesimum vicesimum a novissimo ventum esset, referret ad ultimum sic: *Circa versum a novissimo 820. 700. 600. &c.* Hæc tibi, homini peritissimo, jamdiu nota, mihi tamen præmittenda esse duxi, ut, si forte hujus epistolæ aliis, non æque peritis, copiam feceris (quod cur nolim, causa nulla est: aliorum enim judicia etiam exquiri est utile) paratiores ad reliqua accedant.

Principio, quales Tulliani codicis, quo usus est Asconius (quem posthac *Asconianum codicem* appellabo) versus fuerint, hoc est, intra quem vocabulorum, atque etiam syllabarum litterarumque modum ferme constiterint, statuendum est. Hoc statuere, quo reliqua omnia nituntur ac demonstrantur, quodque propterea omnium difficillimum fore videbatur, casus quidam fecit, ut non ita

difficili negotio possem. etenim, cum casu in Pisonianæ exemplar, itic apud vos ab Joanne Manfrè ante tres annos editum, incidissem, cumque in ea forte cogitatione tum essem, ut, quales Asconiani codicis versus fuissent, arithmetorum adhibitis rationibus invenirem, institui Asconianos cum Patavinis comparare. cumque illis verbis (quæ capite 95. leguntur) *L. Opimius ejectus est e patria &c.* inscripsisse sic Asconium viderem, *Circa versum a novissimo. LXXX.* cœpi ex iisdemmet exorsus, quæ versuum summa in Patavino codice ad extremam usque orationem conficeretur, numerando percensere. Quid quæris? reperi, sic utramque inter se summam congruere, ut vix unius versiculi, quo auctior erat Patavinus codex, discrimen interesset. Hæsi primo prope attonitus; tum gaudio plane exsilivi: continuoque, spe quadam mirifica, cætera quoque paria futura, incensus, ad superiora verba properavi; quibus Asconius inscripsit, *Circa versum a novissimo CXX.* Ea sunt, *Ecquid vides? ecquid sentis? &c.* quæ cum in codice Patavino non amplius tredecim & centum versibus ab extrema oratione abesse deprehendissem, vehementer conturbatus sum, atque animum prope despondi. cum enim tantulo intervallo discrepantiam tantam factam viderem, quo magis ab extremo recederetur, eo minus reliqua conventura arbitrabar. Quod non ita tamen fuit. nam rursus ad superiora progressus, pleraque concordare reperiebam: donec discordiam in quibusdam tantam offendi, ut pæne, quod volebam assequen-

quendi spem omnem ac cogitationem abjecerim. Hæc illa nempe monstra fuere, quibuscum neque tum, neque deinde, cum eandem rem tentassem, voluisse me decertare paullo ante dixi. At superiore mense diu multumque universa ac singula meditatus, statui, vitium Asconianis quibusdam numeris omnino inesse; non Asconii ipsius, sed vel librariorum, vel typographorum culpa. Quod minime mirum cuiquam debet videri, qui modo considerarit, nulla in re sæpius ab iis hominibus, quam in describendis numeris, fuisse peccatum. quæ res fecit, ut infinita propemodum lectionum varietas occurrat, quoties in Antiquorum libris vel anni vel pecuniæ computantur. Corrigemus igitur Asconianos illos mendosos numeros, sed ita, si necessarium esse intellexerimus, necessitatem post ostendam: nunc omnium, qui sunt in Asconio, eorum etiam, qui ad Pisonianæ deperditam partem pertinent, numerorum paradigmata proponam: quibus alia e regione respondebunt, Patavinorum versuum summas exhibentia. Sed illud mihi ante monendus es: cum Joannes iste Manfrè primæ totius orationis litteræ duorum versuum spatium attribuerit, & paginæ 370. duos item versus detraxerit, quos tamen in probatissimis codicibus Gruterus & Pithœus reppererunt; me utriusque rei rationem, ut par erat, habentem, in prima pagina non sedecim, sed quatuordecim versus tantummodo numerasse; contraque paginæ 370. duos reliquis quadraginta duobus addidisse.

Orationis in L. Pisonem, qualis in Aſconiano codice olim fuit, verſuum ſeries ac ſumma.

PARADIGMA I.

1. CIRCA VERS. A PRIMO * <i>Quod minimum &c.</i>	
2. A PRIMO LXXX. <i>Hoc non ad contemnendam &c.</i>	
3. PAULO POST. <i>Hic cum ad Padum &c.</i>	
4. A PRIMO * <i>Lautiorem pater tuus &c.</i>	
5. A PRIMO CCLXX. <i>Ego in C. Rabirio &c.</i>	
6. A PRIMO CCC. <i>Ego cum in concione &c.</i>	A quo verſu CCC. ad ſuperiorem CCLXX. fuere verſus
7. A PRIMO CCCXX. <i>Cujus fuit initium &c.</i>	30.
A quo ad ſuperiorem fuere	20.
8. A PRIMO DCXX. (corrigo DCX.) <i>ſeplaſia mehercule &c.</i>	A quo correcto ad ſuperiorem fuere
9. A PRIMO DCCC. <i>De me cum omnes &c.</i>	290.
A quo ad ſuperiorem correctum fuere	190.
CIRCA MEDIUM. <i>Appel-</i>	
<i>latus eſt hic vulſurius &c.</i>) Omnium ſumma 538.

PARADIGMA II.

1. A NOVISSIMO DCCC. (corrigo DCCCXX.) <i>Me conſequentibus diebus &c.</i>	
2. A NOVISS. DCCCXX. (corrigo DCCXX.) <i>O ſultes Camillos &c.</i>	A quo corr. ad ſuper. corr. fuere
3. A NOVISS. DCLX. (corrigo DCL.) <i>Eadem cupiditate &c.</i>	100.
4. A NOVISS. DLX. <i>Eſt quidam Grætuſ &c.</i>	A quo corr. ad ſuper. corr. fuere
5. A NOVISS. CCCXX. <i>Quamquam quod ad me &c.</i>	70.
6. A NOVISS. CC. <i>Quod populari &c.</i>	A quo corr. ad ſuper. fuere
7. A NOVISS. CXX. (corrigo CX.) <i>Ecquid vi-</i>	240.
8. A NOVISS. LXXXX. <i>L. Opimiuſ ejeſtuſ &c.</i>	120.
A quo ad ſuper. corr. fuere	90.
	20.
	Omnium ſumma 730.
	Ejuſ.

*Ejusdem orationis, qualis nunc est in Patavina editione
anni 1730. versuum series ac summa.*

PARADIGMA III.

1. Hæc desiderantur -	
2. Desiderantur .	
3. Desiderantur .	
4. Desiderantur . Nobis quidem primus orationis versus est in illis verbis, <i>Jamne vides, bellua &c.</i>	
5. <i>Ego in C. Rabirio &c.</i> Hic versus a primo illo <i>Jamne</i> <i>&c.</i> est. LIIII. a primo autem Asconiani cod. CCLXX.	
6. <i>Ego cum in concione &c.</i> A PRIMO LXXXV. A quo ad super. sunt versus	314
7. <i>Cujus fuit initium &c.</i> A PRIMO CV. A quo ad super. sunt	202
8. <i>Septasia mehercule &c.</i> A PRIMO CCCXCVII. A quo ad super. sunt	292
9. <i>De me cum omnes &c.</i> A PRIMO DLXXXIIII. A quo ad super. sunt	187

Omnia summa 530.

PARADIGMA IIII.

1. <i>Mo consequentibus diebus &c.</i> A NOVISSIMO DCCCXXIII.	
2. <i>O stultos Camillos &c.</i> A NOVISS. DCCXVII. A quo ad super. sunt	106
3. <i>Eadem cupiditate &c.</i> A NOVISS. DCXLVIII. A quo ad super. sunt	692
4. <i>Est quidam Græcus &c.</i> A NOVISS. DLVI. A quo ad super. sunt	91
5. <i>Quamquam quod ad me &c.</i> A NOVISS. CCCXXII. A quo ad super. sunt	234
6. <i>Quod populari &c.</i> A NOVISS. CCII. A quo ad super. sunt	120
7. <i>Ecquid vides &c.</i> A NOVISS. CXIII. A quo ad super. sunt	89
8. <i>L. Opimius ejestus &c.</i> A NOVISS. LXXXI. A quo ad super. sunt	22

51 Omnia summa 732.

In primo paradiſmate correxi numerum illum 620. ex eoque detracta decade, repoſui 610. Cum enim Aſconianus codex cum Patavino ſic belle cohæreat, ut ab illis verbis *Ego in C. Rabirio &c.* (quæ in Aſconiano ad verſum 270. a primo integræ orationis verſu pertinebant; in Patavino ad 54. a primo deficientis pertinent) ad illa *De me cum omnes &c.* verſuum ſumma plane conſentiat (intercedunt enim in utroque verſus omnino triginta & quingenti); cumque in ſuperioribus intervallis a 270. ad 300. atque a 300. ad 320. nihil ferme diſcrepet: minime credibile eſt, a verbis *Cujus fuit initium &c.* hoc eſt, ab ipſo verſu 320. ad verba *Seplaſia mehercule &c.* adeo breves, & rurſum deinde a verbis ipſis *Seplaſia mehercule &c.* ad illa *De me cum omnes &c.* adeo longos Aſconianos verſus fuiſſe, ut primum illud intervallum octo verſibus longius, alterum ſeptem verſibus brevius, quam ſimilia Patavini codicis intervalla, evaderet. Quod ſi, ejecto 620, numerum 610. veluti poſſiliminio revocaverimus, tunc rurſus inter ſe conſentire utriuſque codicis intervalla reperientur, minimoque diſcrimine ſibi invicem reſpondere.

Aliquanto plus operæ ponendum eſt in emendandis ſecundi paradiſmatis quattuor numeris: nempe 120. 660. 820. 800. quos in 110. 650. 720. 820. mutandos eſſe contendit. De ſingulis videamus.

Si in illo 120. nihil ineſſet mendæ, tunc a verbis *L. Opimius eſectus &c.* ad verba *Ecquid vides &c.* in Aſconiano codice verſus triginta interceſſiſſent, cum non niſi duo & vigin-

viginti in Patavino intercedant : rursusque a verbis iisdem *Ecquid vides &c.* ad superiora illa *Quod populari &c.* novem versibus Patavino brevior Asconianus codex fuisset. Quonam modo centum & decem versuum intervallo (tantum est enim a verbis *L. Optimus ejectus &c.* ad illa *Quod populari &c.*) potuit hæc tanta utriusque codicis dissensio contingere , cum versuum 560. intervallo ; hoc est , a verbis *Est quidam græcus &c.* ad extremam usque orationem tanta existat utriusque consensio , ut vix quaternario numero inter se discrepent ? Omnia convenient, si ex illo 120. decadem sustulerimus : quod quidem corrigentes fecimus..

Venio nunc ad mendosum illum 660. a quo removeamus licebit denarium. item numerum , faciamusque sane 650. ut Patavini codicis versui 648. prope respondeat.. Et profecto quanam ratione fieri potuit , ut , cum intervallo , quemadmodum vidimus, versuum 560. non nisi quattuor versibus Patavino auctior Asconianus codex existerit , nunc idem , non nisi centum utrique additis , duodecim versibus auctior evaserit ?

Mendosum etiam esse tertium illum Asconianum numerum 820. plane perspicuum est . Nam , cum hætenus sibi omnia in utroque codice ita constiterint , ut , etiamsi eos numeros , quos mendosos esse deprehendimus , fuisse sine menda putarimus , tamen inter utriusque codicis versus maximum discrimen sit versuum non amplius duodecim : tanta repente varietas , ut , qui versus est in Patavino codice a novissimo 717. is fuerit.

in Asconiano a novissimo 820. induci non videtur potuisse.

Sed quid adhuc de perspicua illius numeri menda dubitamus? Nonne is numerus 820. inscriptus est illis verbis. *O stultos Camillos &c.* quæ sunt propius finem orationis; cum illis *Me consequentibus &c.* quæ longius ab eodem. fine absunt, inscriptum sit *Circa versum a novissimo 800.*? Omnino sive librarii sive typographi centenarium de suo hic addiderunt, & ex DCCXX. fecere DCCCXX. quod. facere est adeo facile, ut mihi quoque, hæc modo scribenti, alter pro altero numerus calamo exciderit. Refingamus ergo nos illum numerum 820. in 720. & tum, qui versus est in Patavino codice a novissimo 717. is in Asconiano fuisse a novissimo 720, revocatâ concordia, reperietur.

Supereft emendandus primus ille ejusdem paradigmatis secundi numerus DCCC. Atque hætenus quidem, in emendandis reliquis, aliquid, vel a librariis vel a typographis additum, detraximus: at hic est aliquid, ab iisdem omissum, omnino addendum: & ille numerus DCCCXX. quem illi proxime commenti fuerant, huc est revocandus. Certe illa verba *O stultos Camillos &c.* (quæ in Asconii manuscripto codice pertinuisse ad versum 720. vidimus) ad hæc *Me consequentibus &c.* (siquidem hæc ad versum 800. pertinerent) versuum octoginta intervallo distare debuissent: quæ tamen in Patavino sex & centum versibus distant. Unde autem Patavino codici, in reliquis cum
Asco-

Asconiano tam concordi, subito sex & viginti versus, qui ab Asconiano abessent, accedere potuerunt? Addamus igitur Asconiano viginti. Tum eadem verba illa *O stultos Camillos &c.* a superioribus *Me consequentibus &c.* centum, hoc est, sex minus quam in Patavino, versibus aberunt: quod sane est tolerabile. Neque tamen, si etiam facere omnia paria in utroque codice voluerimus, quidquam vetat, illis octo centenariis non viginti, sed sedecim monadas addi, fierique integrum numerum non DCCCXX., sed DCCCXVI. etsi Asconius numeros, qui sunt infra denarium, non solitus est adhibere.

Sustulimus, nec sine ratione, ut opinor, eas mendas, quæ in quinque Asconianarum tredecim inscriptionum numeros irrepserant. Quod si emendatis codicibus uti potuissem, non dubito, quin corrigendi hoc labore omni supersedissem. Equidem multa Asconii vulgata exemplaria consului; sed, quod ad inscriptos numeros pertinet, æque mendosa (a). Nam, cum homines etiam

quædam

(a) Manuscriptis etiam exemplaribus eadem, quæ vulgatis, illorum quinque numerorum perversitas hæret. Qua ratione id acciderit, non est difficile suspicari. Poggius in eadem illa epistola ad Guarinum Veronensem data, de qua in superiore annotatione egimus, non solum a se repertos Asconii hos commentarios, sed etiam *transcriptos, & quidem velociter*, fuisse testificatur, quos ad Leonardum Arretinum, & Nico-

docti nihil ad rem pertinere arbitrarèntur, quotos Asconius quosque Tulliani, quo usus ipse fuerat, codicis versus dixisset, omnis est ab iis in hoc genere librariis atque typographis peccandi licentia atque impunitas data.

Nicolaum Florentinum Constantia quamce-
 terrime in Etruriam mitteret. Ea fortasse
transcribendi velocitas fecit, ut aliqua (&
 sunt certe in his commentariis multa per-
 peram mendoseque scripta) ac præsertim
 hos ipsos numeros minus ille accurate emen-
 dateque scripserit. ex Poggii autem apogra-
 pho illo, in Etruriam allato, omnia, quot-
 quot manu scripta habemus, Asconii exem-
 pla descripta olim fuisse credibile est: ut
 necesse fuerit, quæcumque menda in illud
 forte irrepsissent, reliquis, ex eo propaga-
 tis, adhærere. Ejusmodi exempla Florentiæ
 in bibliotheca Mediceo-laurentiana exstant
 omnino quinque. eorum uni, quod in plu-
 teo LIV. adservatur, numero 5. extra nota-
 tum; adscriptum in calce monumentum hoc
 legitur: *Finis argumentorum quarundam ora-
 tionum Ciceronis, eorum, quæ invenimus in
 monasterio S. Galli: quæ licet imperfecta &
 in compluribus locis corrupta esse videantur,
 non mediocrem tamen bene studentibus poterunt
 utilitatem afferre. Die 25. Julii MCCCCXVI.
 B. de Montepoliciana.* Minime dubitandum
 est, quin illo B. significetur Bartholomæus
 Politianus, ille, qui Martini V. Pont. Max.
 fuit ab epistolis, quique cum Poggio, in
 eodem munere collega suo, Constantiam pro-
 fectus

data. Qua in re certe illos ratio vehementer fefellit. Ut enim in rerum natura ex iis, quæ sunt ante omnium oculos posita, quæque vulgo neglecta prætereuntur, si quis sit paullo ingeniosior atque sagacior, mentisque aciem

fectus Asconii commentarios illos cum plurimis antiquis codicibus in monasterio S. Galli & ipse reperit. ex allato autem monumento intelligimus, ipsum sibi Bartholomæum eodem commentarios sive ex antiquo codice, sive ex Poggii exemplo descripsisse seu describendos curasse: ex quo Bartholomæi exemplo, non modo ex illo Poggii, potuerunt etiam reliqua propagari. sed, cum ipsemet de illorum *imperfectione & in compluribus locis corruptione* testificetur, possumus numerorum illa menda Constantiensis exemplaris vitio potius, quam aut Poggii, aut alterius, in eo describendo, festinationi aut negligentiae assignare. quod quidem si vitiosum in illis numeris fuit, frustra eos corrigere, codicum, qui omnes ex illo primo, tamquam fonte, fluxerunt, ope conemur: sed necessario ad aliam corrigendorum rationem, hoc est ad probabiles conjecturas, confugiendum est. Hæc eo, in hac Romana hujus epistolæ editione, adscribenda fuerunt, quod nonnulli, qui Venetam anni 1734. viderant, horum ipsorum, quæ dicta sunt, ignorantia, mirati sunt, totum hoc de corrigendis Asconianis numeris negotium ingenio dumtaxat ac conjecturis, nulla codicum manuscriptorum fide aut auctoritate advocata, fuisse actum atque transactum.

aciem intendat, causasque eorum omnes & consequutiones diligenter inquirat, mira sæpe quædam & sive constituendis sive amplificandis artibus atque doctrinis perutilia deprehendit: sic in antiquis litterarum monumentis nihil debet adeo leve videri, quo non aliquid ab aliquo litteris ipsis accommodatum possit extundi.

Utriusque codicis consensione ejusmodi demonstrata, ut inter versuum centenaria ferme tredecim vix unius & alterius versus discrimen intercedat: tandem id, quod prior loco proposuimus, evidenter ostendamus: nempe ab initio Pisonianæ tantum periisse, quantum ferme est ex illis verbis *Quid centuriatus palam venditos &c.* (quibus verbis caput 88. hujus orationis inchoatur) ad extremam ipsam orationem: hoc est, versus Patavinæ editionis sedecim supra ducentos.

In verbis illis *Ego in C. Rabirio &c.* constituit Asconius totius orationis versum a primo ducentessimum septuagesimum. Is versus in Patavina editione anni 1730. (quam eadem, qua Asconianum codicem, versuum longitudine sive mensura constare docuimus) est ejusdem orationis, non integræ, qualem Asconius habuit, sed, qualis ad nos pervenit, mutilæ, non nisi quinquagesimus quartus. Periit igitur ex orationis initio tantum versuum, quantum est a 54. ad 270. Est autem ea summa ducentorum & sedecim versuum. Ducenti igitur & sedecim versus ex orationis in Pisonem initio perierunt.

Pergamus porro ad reliqua, quæ proposuimus, demonstranda, nempe, deesse
etiam

etiam aliquid ex media circiter hac oratione ; idque tantum ferme esse , quantum est ex illis verbis capitis 89. *Quod populari illi sacerdoti &c.* ad eandem extremam orationem , hoc est , versus centum nonaginta novem.

Orationis totius medium fuit in illis verbis capitis 38. *Appellatus est hic Vulturius &c.* quibus inscripsit Asconius *Circa medium* . Ab iis ad orationis finem sunt in codice Patavino versus duo & quinquaginta supra mille . Totidem autem ab iisdem verbis ad orationis initium esse debuerunt . At , si rationem omnium , qui nunc quidem exstant , inire voluerimus , ab iis verbis *Appellatus est &c.* ad illa , quæ nobis prima sunt , *Jamne vides , bellus &c.* non nisi sexcentos triginta septem superesse reperiemus . Igitur , ex superiore dimidia oratione quadringentos & quindecim periisse versus , perspicuum est . Ex hac tota amissorum versuum summa subductis ducentis illis ac sedecim (quos ex ipso initio intercidiisse supra ostensum est) , reliqui sunt , qui præterea perierint , centum nonaginta novem . Hi quo ex loco absint , quærendum est .

Verba illa *Appellatus est &c.* (in quibus orationis medium ab Asconio constitutum est) quantum a versu octingentesimo a novissimo (in quo versu sunt illa *Sed Placentini municipii &c.* cap. 53.) distabant , tantumdem a versu octingentesimo a primo (in quo sunt illa *De me cum omnes &c.* cap. 35.) distare debuerunt . Nunc autem ab illis *Sed Placentini municipii &c.* ducentis & quinquaginta versibus distant : ab his vero

De

De me cum omnes &c. tribus modo & quinquaginta. Ergo hoc ipso intervallo (nempe a verbis *Appellatus est &c.* in quibus medium orationis fuit, ad superiora verba *De me cum omnes &c.* centum nonaginta & septem versuum facta jactura est: quæ quidem summa nostris illis 199. quos, præter deperditos ex initio orationis 216. versus, ex superiore dimidia oratione periisse docuimus, minima sane, hoc est duorum versuum, varietate respondet. quæ ipsa varietas fortasse nulla intercederet, si certum orationis medium nobis Asconius indicasset; qui tantummodo *Circa medium* verbis illis *Appellatus est hic vulturius &c.* inscripsit.

Quod autem tantumdem prope versuum ex hoc loco, quantum ex initio orationis intercidit, qua tandem id ratione acciderit, libitum mihi est etiam inquirere, neque non assequi ac tenere visus sum. Non enim dubitandum est, quin omnes orationis hujus codices, qui ad nos pervenerunt, ex uno aliquo exemplari, ita, ut nostri codices sunt, mutilo, descripti fluxerint. Mutilatio autem illius illa qui contigit? Sic, opinor. Prima ejus, &, si vis, etiam secunda ac tertia, pro voluminis modo, pagella, qua orationis principium illud ducentorum amplius versuum continebatur, a reliquis casu aliquo, ut sit, avulsa exciderat atque perierat. ea res similem in altera orationis parte versuum jacturam aliquanto post attulit. ita enim ii libelli, ex quibus volumina conficiuntur, ab antiquissimis temporibus confectui consarcinarique consueverunt, ut binæ
aut.

aut ternæ aut quaternæ paginæ, æquis utrinque spatiis complicatæ, atque aliæ aliis deinceps insertæ (quas, non satis latino quidem, sed usitato ac certe satis intellecto vocabulo, sive duerniones, sive terniones, sive quaterniones vocant), a tergo, qua parte omnium plicatura incidit, trajecto filo consuantur. Jam, si prima ejusmodi alicujus libelli pagina, si secunda, si tertia abscindatur, tum eodem casu ultimam, penultimam, reliquasque prioribus quibusque abscissis respondentes, ex posteriore ejusdem libelli parte item abscindi necesse est. abscindi autem a libris: paginas, easdemque brevi tempore hæud amplius apparere, ac disperire, prope unum atque idem esse, quotidie experimur. Credibile est igitur, abscissis ac deperdisis in antiquo illo exemplari, unde orta exempla nostra ac propagata sunt, primis paginis, ultimas item unius & ejusdem libelli paginas, mediis manentibus, eodem illo casu intercuisse: ut propterea æquam prope partem orationis posterior hæc jactura, ac principii illa prior abstulerit.

Neque vero movere quemquam debet, quod versuum aliquanto minor numerus ab hoc orationis medio, quam ab initio perierit. Non enim necesse est, pari paginarum numero parem versuum utrimque numerum confici; quos, pro majore aut minore tum ipsorum inter se, tum litterarum ac dictionum alterius ab altera intervallo, plures aut pauciores, pari paginarum mensura ac numero, fieri ac numerari intelligimus. Quid, quod repetuntur sæpe eadem a librariis.

riis atque iterantur, aut etiam aliunde translata, atque aliena per errorem inculcantur? quibus rebus versuum quidem numerus augetur, & cum aliarum paginarum versibus adæquatur; at, rejectis deinde atque expunctis supervacaneis illis, non nisi necessarii atque legitimi computantur; ut, cum plures revera fuerint, pauciores tamen numerentur. Non igitur, si quid forte tale, aut ejusmodi aliquid (quod certe potuit accidere) in harum, de quibus agimus, posteriorum paginarum aliqua commissum olim a librario est, æqualem in iis, ac non aliquanto minorem, quam in totidem superioribus fuit, versuum numerum exigere ac flagitare debemus.

Habes, mi Facciolate, inventorum meorum prope mathematicam, ut mihi quidem videtur, demonstrationem: quam ego si non multorum dierum labore atque molestia stetit mihi dixerō, mentiar, verum iis nunc ita delector ac perfruor, quasi Circuli illam, quam vocant, quadraturam, a tam multis, a meque ipso olim tentatam, reperissem. ut enim fuerit in tenui re labor: at præclarum est atque jucundum, ea, quæ doctissimi homines indemonstrabilia (licetne mihi per te Apuljanum verbo semel uti?) esse judicabant, tam certa ratione demonstrasse.

Quid, quod sua etiam constat, neque ea mediocris inventis meis utilitas? posthac enim Ciceronis studiosi ubi ad illa Pisonianæ verba cap. 38. venerint: *Quas res gessisti in imperio, exercitu, provincia consulari? Quas res gesserit, quero? Qui ut venit statim nondum commemoro rapinas &c.* non hærebunt, ne-

neque quo illa *Qui ut venit statim* referantur, quoque sint denique progressura, frustra quærent. interpretes vero non, ut hætenus fecerunt, aut loci difficultatem dissimulabunt, aut miras quasdam longissimeque petitas ac plane incredibiles commentationes suas ad ejus pravitatem corrigendam afferrent: sed, cum illa verba in eam orationis partem commodum incidere intellexerint, a qua tantum versuum abesse docuimus, supervacaneo labori parcent, ingeniis suis non abutentur, ibique orationis lacunam esse confitebuntur (a). Equidem volo, typographo isti tuo mandes, ut, cum Pisonianam una cum

(a) Hanc hujus loci lacunam sic Cl. V. Josepho Oliveto probavit hujus auctor epistolæ, ut is in magnifica illa sua omnium Ciceronis operum Parisina editione, anno 1740. inchoata, & 1742. absoluta, deficientis orationis notam inter voces *statim* & *Nondum* apposuerit, & hæc præterea in sua ad hunc eundem locum adnotatione admonuerit: *Vult autem Hieronymus Lagomarsinus, hic lacunam esse, ac prope mathematica ratione demonstrare aggreditur. Vide illius ad Jacobum Facciolatum epistolam, qua, quid in M. Tullii Ciceronis contra L. Pisonem oratione interciderit, demonstratur.* Atque idem clarissimus vir in præfatione primi Orationum tomæ, qui universi operis quartus est, commemorata Jacobi Facciolati & M. Antonii Ferratii egregia in Ciceronis orationibus illustrandis opera, qua multum se in com-

men-

cum doctorum & meis, indocti sane hominis, enarrationibus edet, atque ad eum ipsum locum perveniet, post verba *Qui ut venit, statim*, lectores moneat, *Multa de Pisonis in primo suo in Macedoniam adventu flagitiis de-*
fide-

mentariis suis perficiendis ad jutum ingenue ac grate confitetur, de Lagomarsinii etiam in eodem genere industria polliceri sibi ac cæteris aliquid, immo vero plurimum, pro sua humanitate voluit. ait enim: *Plura item, nec dubito, præbuisset Hieronymi Lagomarsini... diligens industria; qui, dum hæc Parisiis molior, ipse Venetiis has ipsas orationes edit (id est, edere cogitat) cum veteribus ducentis codicibus, ut fama est, collatas ac recognitas. Quod unum licebit, si ante Venetiis ad nos commeent, quam ultimus meus officinam reliquerit, in hunc mantissa, ex illis collecta, conferetur. Italiae gratulemur interim, bonarum artium parenti, quod egregiorum hominum, quos ipsa peperit, studiis æterna sit Latine facundie in majorum suorum ac suis sedibus propagatio. Valde quidem Lagomarsinius optaret, esse se talem, cui hæc jure ac merito, non officii atque urbanitatis causa tribuerentur. Sed certe, quod ad Ciceronis non modo orationes, sed reliqua etiam opera pertinet, non voluntas illi eorum cum suis commentariis edendorum, sed facultas adhuc atque commoditas defuit. Alia scriptio- nis est ratio, alia editionis. studio, opera, diligentia scribuntur edenda: sed aliis quibusdam adjamentis, quæ scripta sunt,*
sunt,

fiderari. Sed quando illa edet? Nempe cum ego reliqua absolvero, ad teque misero- mittam autem, quemadmodum quidem spe- ro, quæ ad volumen primum pertinebunt, venturo autumno omnia. Nimis, inquires, fero. Quid faciam? mihi in aurem infusurari illud dies noctesque sentio *παύειν βραδέως*: eique præcepto, tamquam Apollinis oraculo, esse mihi obtemperandum puto. Qua quidem in re habeo te auctorem ac ducem; a quo
Ale-

sunt, eduntur. Ac solet is de Cicerone suo ex se quærentibus, ecquando tandem tam pridem ac tam sæpe ostensum atque promissum editurus sit, duobus versiculis respondere, altero Martialis hexametro, altero pentametro suo,

Sint Macenates, non deerunt, Flacce, Marones:

Sit mihi Mæcenat, non deerit Cicero.

Verum hæc adhuc furdus, ut ajunt, cecinit. Ait præterea, eruditis studia sua se debere; eaque ad diem, immo in dies singulos persolvere xeligiose solere: pecuniam vero, quæ ad studiorum suorum fructum, cum iisdem eruditis communicandum, necessaria est, nec a quoquam mutuam accepisse, nec propterea cuiquam se debere. Non igitur, inquit, Ciceronis nostri editionem (quod quidam, studio nostro, in eam apparandam impenso, nequaquam contenti, prope quotidiano, odioso certe atque molesto efflagitatu faciunt) repetere a nobis quisquam atque exigere, tamquam debitam, debet; qui, quod debuimus, solvimus, quod non solvimus, non debemus.

Alexander Bandiera noster, qui nuper istinc ad nos venit, mihi narravit, Glossarii illius, quod jamdiu in manibus habes, non magnam sane partem esse perfectam. quod opus, sane laboriosum ac prope immensum, utinam tibi bonus Deus tantum ætatis viriumque tribuat, ut ingenti litterarum latinarum bono possis absolvere. namque errant, qui humanorum hominum studiis consuli plus & orationibus & poematis scribendis putant. fatis est veterum orationum atque poematum, si quis modo aureos illos Græcorum ac Latinorum libros pervolutare velit: recentium vero plus etiam, quam est fortasse fatis. illa, illa, inquam, est studiorum pars adhuc inchoata, & absolutionem perfectionemque suam desiderat, qua homines ad ipsos auctores veteres cognoscendos intelligendosque adjuvantur. quam qui opem ingenio atque industria sua pro virili portione mortalibus tulerit, næ is hac una opera multo melius, quam sexcentis orationum ac poematum voluminibus, de universo hominum studioforum genere merebitur. quamobrem incumbe in eam rem unam, quod facis, sedulo atque constanter: meque, prodesse hominibus in simili genere conantem, patere paullo serius, modo utilius, inchoata mea perficere. Vale, mi Facciolate, meque tui amantissimum amare perge. Florentiæ XVIII. Kalendas Decembres MDCCXXXIII.

F I N I S.



1492016638





